











PAULINI A S. JOSEPHO

L U C E N S I S

Cler. Reg. Scholarum Piarum

E T

IN ARCHIGYMNASIO ROMANÆ SAPIENTIÆ

*Eloquentiæ Professoris*

ORATIONUM

Tomus alter.



R O M Æ

Typis Zempelianis An. MDCCXLVIII.

---

SUPERIORUM PERMISSU.



*SSmo Domino Nostro*

**BENEDICTO XIV.**

**PONT. OPT. MAX.**

*Paulinus a S. Iosepho Schol. Piar.*



CC E ad pedes  
tuos, BEATISSIME PATER, alter  
orationum mearum libellus,  
a 2 qui

qui ut publici juris fieret ,  
tuoque nomini inscriberetur ,  
non meum certe de ejus præ-  
stantia judicium , sed mi-  
rifica animi tui facilitas &  
humanitas fecit . Quoties e-  
nim illas , quæ altero tomo  
continentur , laudare , quæ  
incredibilis benignitas tua  
fuit , quoties de alteris his in  
lucem edendis mecum loqui ,  
& quasi stimulos addere di-  
gnatus es ? Neque id mirum ,  
quod non eas modo discipli-  
nas , quæ dignitatis tuæ ma-  
jestatem decent , excolendas  
& amplificandas curas , sed e-  
tiam

tiam ad ceterarum artium literarumque studia provehenda cunctos omnium ordinum homines incitas atque inflamas; quemadmodum qui de variis studiis in omni hebdomada coram te fiunt Academici coetus, rem satis indicant. Itaque pudebat me jam differre tempus, atque has ultra ea gloria fraudare, quam ab inscriptione nominis tui acciperent. Verum alia quoque me ad id permovebant. Silentio mittam perpetua singularis tuæ erga me benevolentiae signa: ob quam tibi plurimum  
me

me debere fateor ; eoque  
 magis , quod nullis meis in  
 te meritis , sed innata qua-  
 dam penitusque tibi insita  
 benefaciendi vi ac propen-  
 sione id facis . Neque vero  
 mihi mens est hoc loco ma-  
 ximas & amplissimas tuas  
 commemorare virtutes , quæ  
 passim omnium prædicatio-  
 ne celebrantur ; non modo  
 Romæ , sed apud exteras  
 quoque nationes , atque eas  
 gentes etiam , quæ præclara  
 Romanorum Pontificum ge-  
 sta limis oculis aspiciunt .  
 Quis enim tam rudis , aut a  
 nobis

nobis tam remotus est , ut non audiverit , aut legerit , quæ de reconditis & sanctioribus Catholicæ Ecclesiæ doctrinis abs te jam multa prodierunt , & adhuc prodeunt , volumina , quæ quidem te sanctissimum perinde ac doctissimum Pontificem ubique gentium prædicant ? Quis ignorat , quæ ad Pontificium ærarium restituendum providentissime mandasti ; quod ut magno & gravi ære alieno sublevares , quicquid in tuos conferre honestissime poteras , in illud comportari ,  
ingen-

ingentesque Vacabilium summas ad ipsius ærarii rationes pertinere voluisti? Quocirca te non minus in re Oeconomica, quam in divinis & Ecclesiasticis disciplinis (quod valde rarum est) scientissimum esse vidimus. Nihil dicam de singulari illa animi constantia, qua jam tot annos te geris erga tuos tibi sanguine conjunctissimos, quos exemplo a multis ætatibus non audito, neque ad Urbem accedere passus es. Verum his omnibus, quæ olim posterum magnopere suspicient,

ac



ac de te vera cum gloria prædicabunt, prætermiſſis; ad illud venio, quod ad me propius pertinere videtur, quodque tibi ſempiternæ laudi fore minime dubito: ad hæc ſcilicet noſtra Romanæ Sapientiæ ſtudia, quibus inſtaurandis, & ſaniorẽ conſilio atque ordine dirigendis, nuper animum, mentemque adjeciſti. Hoc ego unum, ut vere dicam, triginta & amplius annos optaveram maxime: hoc erat mihi unice in votis, quo de perſæpe fueram cum viris gravibus & doctis collocutus; hoc de-

b                      nique

x

nique illud ipsum, quod ego  
quasi divinans, te aliquando  
facturum esse prænunciavi (\*).  
Videbatur enim mihi pror-  
sus a dignitate Urbis alienum,  
Romanam Sapientiam negle-  
ctam jacere: & quæ tantopere  
præteritis temporibus ceteras  
Orbis academias studiorum,  
celebritate ac doctorum fa-  
ma superaverat, id temporis  
prope dicam deferi, atque  
omnibus esse despectui. Quid  
tum? singulari Dei Opt. Max.  
consilio factum est, ut ad  
hanc bonarum artium sedem  
aliquando oculos tu conver-

(\*) V. pag. 206.

teres; & quanquam infinitis  
 pene negotiis impeditus, ma-  
 xima tamen sollicitudine pa-  
 ternaque cura studiorum no-  
 strorum patrocinium ac tute-  
 lam susciperes. Intelligebas  
 enim probe satis non esse,  
 si Princeps per se doctus sit  
 maximeque literatus, nisi is  
 faciat, ut ipsa quoque litera-  
 rum studia, bonæ artes & di-  
 sciplinæ apud suos vigeant.  
 Idcirco tu & accitis aliquot  
 novis politioris doctrinæ vi-  
 ris, & necessariis ad natura-  
 lem Philosophiam compara-  
 tis instrumentis, & lectioni-

bus præterea numero auctis,  
 aliisque recte ac sapienter  
 provisus, illud jam effecisti,  
 ut tum novitate studiorum,  
 tum discipulorum frequentia  
 Romana Sapiaientia dudum,  
 in veterem splendorem resti-  
 tuta esse videatur. Cum igitur  
 academiæ ipsius, quot-  
 quot sunt, professores gratias  
 tibi inde habeant maximas  
 & immortales; quod nimi-  
 rum satis intelligunt, ex re-  
 literaria tam provide sapien-  
 terque instituta, longe majus  
 sibi decus amplioremque bo-  
 nis artibus dignitatem esse.

acces-

accessuram ; ego sane , qui si non doctrina & bene dicendi arte , at certe diuturnitate docendi , atque erga optimas disciplinas studio nemini concedo , meum esse duxi , BEATISSIME PATER , communi omnium nomine testatum id facere , publiceque profiteri , singulos tibi esse , perpetuoque fore hoc maximo & singulari beneficio obstrictos : cum omnes præsertim sperent , se gravioribus auctos laboribus , auctum quoque a te iri uberioris beneficentiæ tuæ fructibus ; unde  
 fibi

sibi major copia sit & honeste vivendi, & lucubrationes eruditas, ingeniiq̃ sui monumenta typis evulgandi ratio, quemadmodum majores nostri sæpe & magna cum laude fecerunt; atque inde universo pateat Orbi, BENEDICTO XIV. Pontifice, *Romanam Sapientiam, neque Bononiensi, neque Patavino Gymnasio, vel doctorum præstantia, vel auditorum concursu concedere*, id quod Leonis X. tempore contigit, ut Paulus Jovius testatur.

JOAN.

## JOANNES DIDACUS

A MATRE DEI

*Cler. Regul. Pauperum Matris Dei  
Scholarum Piarum*

VICARIUS GENERALIS.

**C**UM Tomum alterum Orationum, quas in Archigymnasio Romanæ Sapientiæ habuit P. Paulinus a S. Josepho Cler. Reg. Scholarum Piarum, Assistens noster Generalis, & in eodem Archigymnasio Eloquentiæ professor, duo ex Nostis, quibus commissum fuit, recognoverint, atque approbaverint: ut typis mandetur, si iis, ad quos spectat, ita videbitur, facultatem in Domino concedimus. In quorum fidem &c. Datum Romæ in Ædibus nostris Scholarum Piarum S. Pantaleonis die 30. Septembris 1747.

*Joannes Didacus a Matre Dei Vicarius Generalis.*

Loco  Sigilli

*Jo: Vincentius a S. Jacobo Secret.*  
Reg. fol. 252.

IM-

IMPRIMATUR,

Si videbitur Rñno Patri Mag. Sac. Pal. Apost.

*F. M. de Rubéis Archiep. Tarfi Vicefg.*

## A P P R O B A T I O .

**P**AULINI a S. Josepho Clerici Regularis Scholarum Piarum, viri eloquentissimi, Orationes duodecim, quæ Tomo altero continentur, jussu Rñni P. Aloysii Nicolai Rodulphii S. Palatii Apostolici Magistri legi summa animi voluptate. Sunt enim scriptæ tam eleganter, tam distincte, tam ornate, tam copiose, tam graviter, ut nihil supra desiderari posse videatur. Quare dignas esse censeo, quæ publicentur, cum nihil, quod bonis moribus, decretisque Religionis Catholicæ adversetur, contineant. Dabam in Ædibus Miner. 8. Idus Novembres an. 1747.

*F. Thomas Maria Mamachias Ord.  
Præd. S. Theol. Mag. & Casa-  
natensi Bibliothecæ Præfectus.*

AP-



## A P P R O B A T I O .

**J**ussu Rm̃i P. Aloyſii Nicolai Ridolſi, Sac. Pal. Apoſt. Magiſtri attente legi Orationes duodecim varii argumenti, quas in Lyceo Romanæ Sapientiæ vir clariffimus habuit P. Paulinus a S. Joſeph e Clericis Regularibus Scholarum Piarum. Sum ex iis, qui miror antiquos: non tamen, ut quidam, temporum noſtrorum ingenia deſpicio. Neque enim quaſi laſſa eſt, & effata natura, ut nihil jam laudabile pariat. Atque adeo legi Paulinianas Orationes ad exemplar veterum ſcriptas tam bene, ut eſſe quoadque poſſint exemplar (Plin. lib. 6: epiſt. 21.). Ita quibus olim verbis Plinius Virginii Romani poeſin, hujus ego eloquentiam proſequi mihi poſſe videor, ſapientiam ſcilicet copioſe & ornate loquentem, quæ non modo ad ingenia adoleſcentium excolenda doctrinis & multijugi rerum pulcherrimarum cognitione, ſed etiam ad mores conformandos aptiſſima ſit, hominesque potiſſimum literatos ad bene beateque vivendum optime inſtituat. Ex Aracæli VIII. Kal. Januar. 1747.

Fr. Joannes De-Luca Venetus  
Examinator Episcoporum.

IMPRIMATUR.

Fr. Nicolaus Ridolſi Mag. Sac. Palatii Apoſt.  
Ordinis Prædicatorum.

6

IN.

## INDEX ORATIONUM.

I.	<i>De literis &amp; eloquentia cum ceteris disciplinis conjungendis.</i>	pag. x
II.	<i>De M. Tullio Cicerone imitando.</i>	30
III.	<i>De studio poetarum ad literas &amp; eloquentiam necessario.</i>	63
IV.	<i>De prematura ingenii sui opinione.</i>	89
V.	<i>In sciolos I.</i>	109
VI.	<i>In sciolos II.</i>	132
VII.	<i>De laudibus Leonis X. in anniversariis ejus parentalibus.</i>	160
VIII.	<i>De optimis artibus nobili juvenuti necessariis.</i>	176
IX.	<i>De probitate viro literato necessaria.</i>	209
X.	<i>De vi &amp; potestate literarum.</i>	246
XI.	<i>De laudibus Leonis X. in anniversariis ejus parentalibus.</i>	270
XII.	<i>De felicitate viri literati.</i>	294
		DE

DE LITERIS ET ELOQUENTIA  
CUM CETERIS DISCIPLINIS  
CONJUNGENDIS.

ORATIO I.

*Habita vii. Idus Novembr. MDCCXXX.*



LETANDUM mihi magnopere, Adolescentes optimi, maximeque vobis gratulandum intelligo, quod multa frequentia tantoque concursu & alacritate ad literarum & eloquentiæ studia in hoc Romanum Gymnasium vos hodierno die convenisse video. Quid enim mihi optabilius, quid jucundius contingere potest, quam præclara hac indole præstantique ingenio juvenum corona me septum intueri, quorum ad optima

A

tima

tima studia complectenda magna sit voluntas animorumque consensus? Quid autem vobis utilius, ac vestræ dignitati magis accomodatum, quam cum gravioribus disciplinis, in quas plerique in hoc ipso Gymnasio incumbitis, elegantiores quoque literas & eloquentiam conjungere, quæ quidem illis vitam & spiritum conferunt? Fortunati plane, quod vobis minus arriserit perniciosissima eorum sententia, qui putant, nostra hæc studia minime necessaria esse, ut quis in Philosophia, in Jure civili, in Medicina, ceterisque gravissimis disciplinis excellat. Quam quidem stultissimam opinionem, etsi satis exemplo vestro confutari video, tamen quo studiorum vestrorum rationem reddere, & imperitis ejusmodi hominibus, si quando opus sit, os obstruere, eorumque audaciam reprimere valeatis, ita prorsus inanem ac repu-

pudiandam a vobis esse ostendam, ut quam isti turpiter decipiantur, clare, penitusque percipiatis. Atque hinc profecto fiet, ut vobis currentibus calcaria, ut ajunt, addantur. Qui vero de hujusmodi studiorum necessitate dubitant, quanquam utilia ac jucunda illa esse intelligant, ii perpensis rationum momentis, animo confirmantur, sibi-que tandem persuadeant, liberalium omnium disciplinarum splendorem & decus, si linguæ ornamenta negligantur, evanescere. Ad hanc autem ipsam literarum & doctrinæ societatem, quam viro docto summe necessariam esse contendimus, non id laboris & vigiliarum, quod imbecillo quidam animo sibi fingunt, requiri intelligetis. At siquidem viam facilem & expeditam, quam in suprema orationis parte indicabo, persequi volueritis, studia hæc vobis plana & jucunda fore polliceor.

Et quidem primum Deo Opt. Max. gratias immortales ago, semperque agam, quod Romæ, in Urbe scilicet omnium nobilissima, splendoris & elegantiae domicilio, non in oppido, aut in rusticano aliquo pago, hodie verba facturum sim, ubi homines agrestes, & inculti me necessario aliqua de decore ac dignitate, quæ rei maxime convenit, dicentem haud facile cogitatione comprehenderent. Sed mente recreor, quod mihi res est cum adolescentibus ornatissimis, splendide ac liberaliter educatis, qui pene cum ipso nutricis lacte munditiam fuxerunt ac decus, quique non minus ore ac vultu, quam veste, capillis, ceteroque corporis habitu ornatum & elegantiam præ se ferunt. Vos itaque, Adolescentes optimi, non tantum testes in hac causa, sed iudices quoque, & causæ patronos adesse volo. Etenim rogo vos per vestram fidem,

dem, ingenuumque ætatis vestræ pudorem, quid est, quod singulari studio tantoque opere ceteris in rebus munditia, nitor, & elegantia requirantur, in oratione autem ornatus tanquam minime necessarius rejiciatur? Si tecta construantur, sedulo curant artifices, ut prospectus ædium, vestibulum, porticus, peristylum, impluvium, ac cetera sint hujusmodi, ut ab elegantia & dignitate minime abhorreant. Si navis ædificetur, quanta cura adhiberi solet, ut latera, carina, puppis, antennæ, ac reliqua ita fabricentur, ut non solum possint ventis ac procellis resistere, sed etiam decus habeant ac nitorem? Si denique vestis, si arma, si tela comparanda sint, satis non est, ut ea valeant omnem a corporibus nostris propulsare vim, nisi quoque nitida ac decora appareant. In ceteris igitur rebus non utilitas sola, sed etiam dignitas

tas & elegantia vobis cordi est, in oratione autem id, quod proprium & decorum est, contemnendum negligendumque esse putabitis? Non ita sane. Quemadmodum enim rusticanus infimæ plebis sermo nobiles viros summopere dedecet, ita sapientum dignitatem maxime deprimit atque deformat oratio rudis, vulgaris & impolita. Quæ quanto clarissimis disciplinis dedecori sit, quantoque viros doctos incommodo afficiat, ex iis, quæ dicturi sumus, satis aperte videbitis.

Complures quidem, non e grege imperitorum, sed sapientes mirantur, quomobrem per hos dies non eadem sint, quæ quondam, proposita bonis artibus præmia; nec opibus, ut olim, augeantur præclara ingenia, nec honoribus, nec dignitate, nec gloria viri docti, ut superiore memoria, cohonestentur. Dolent abiisse faustissima tempora, in qui-



quibus homines excellenti ingenio, ac singulari doctrina ornatos certatim principes viri apud se retinebant, quos plurimi facere, & tanquam oracula consultare solerent. Dolent memoria nostra doctrinæ studia plerisque viliora esse, ac despecta jacere. Utinam hæc ita falsa essent, Auditores, ut a nobis omnino, aut aliqua ex parte negari possent. Sed unde ejusmodi doctrinæ contemptus? Unde tantum erga honestissimas disciplinas fastidium? Equidem video pluris hodie fieri a nobilibus viris peregrinum aliquem augendi luxus artificem, novarumque deliciarum inventorem, quam hominem doctrina & eruditione præstantem. Non sum nescius, potentissimos reges hoc tempore bellorum, magis, quam literarum studio teneri, & omnem fere literariæ reipublicæ curam abjecisse. Verum aut ego fallor, aut non hinc potissimum petenda est do-

doctrinæ despectio. Ex iis nimirum, qui in studiis modo versantur, in doctrinas hoc malum maxime invasit. Negligunt hodie plerique omne sermonis decus, dicendique nitorem, quo optimæ disciplinæ olim tantopere exornari solebant; unde fit, ut illæ sordidæ ac squalidæ appareant, neque venustate & gratia in sui amorem & existimationem alliciant. Est suus scilicet non modo matronis, sed etiam ingenuis disciplinis cultus & decor, quem si illis detrahas, si illuvie ac situ deformatur, tantum abest, ut quemquam ad se illiciant, sui que amore capiant, ut potius nauseam ingentem ac stomachum moveant. Fuit, fuit olim alia, cum barbaries & inscitia dominarentur, bonarum artium æstimandarum ratio ac pretium. Suspexit magnus ille rex Macedonum Alexander Chærii poetæ versus, magnoque  
auri

auri pondere locupletandum putavit hominem, quem Horatius Flaccus risu magis, quam præmiis dignum fuisse arbitratus est. Longe alia nunc est temporum nostrorum ratio. Excellat oportet usquequaque, & sit numeris omnibus absolutum id, quod delicato hujus seculi judicio comprobetur. Profecto satis non est per hos dies solidum aliquod, & succi plenum cibi genus mensi apponere, nisi illud & exquisitè conditum, & splendidis auro argentoque patinis inferatur. Ita sane ætati huic nostræ minime sapiunt volumina, quæ plurima quidem doctrina referta sint, sed impolito incultoque stylo confecta, patinis veluti ligneis, aut fictilibus afferuntur. Hoc autem tam limatum & politum judicandi genus si unquam memoria nostra in hac Urbe vixit, in posterum certe vigebit quam maxime: cum nuper singulari Dei providentia ad sum-

B mum

mum Pontificatum fuerit evectus Clemens XII. patria Florentinus e nobilissima Corfinorum gente, vir cum omnis doctrinæ, tum literarum elegantiorum amantissimus, qui in omni fortunæ gradu viris doctrina præstantibus domum suam, tanquam publicum bonarum literarum & eloquentiæ domicilium, patere voluit; ut proinde non immerito speremus erga homines doctos, & hoc præcipue Romanum Gymnasium eum talem fore, quales ejus cives Leo X., Clemens VIII., & Urbanus VIII. fuisse Pontifices beneficentissimi ac sempiterna memoria digni. Verum ut eo redeam, unde paululum discessit oratio, non est igitur, cur miremur, quod bonis literis a doctrina sejunctis, humiliore loco disciplinæ omnes positæ sint, & ab antiquo gloriæ splendore usque adeo desciverint.

Veteres quidem sive Græci, sive  
La-

Latini non rerum tantum, sed rerum  
 simul & verborum rationem habue-  
 runt. Non Philosophiam, non Jus ci-  
 vile, non Medicinam duntaxat didi-  
 cerunt, sed verborum etiam, quo de  
 illis loquerentur, quoque illas gravi-  
 ter & ornatè explicarent, splendori  
 summopere studuerunt: quorum scri-  
 pta cum admirabilem habent dignita-  
 tem, tum vero oratio ea est sententia-  
 rum gravitate ornata, atque iis verbo-  
 rum luminibus illustrata, ut nihil pos-  
 sit ab homine vel dici sublimius, vel  
 divinius excogitari. Nam ut a Græ-  
 cis, primis illis locupletissimis doctri-  
 narum parentibus, exordiar, quid causæ  
 fuit, quod sapientissimus ille Plato,  
 qui a Panætio philosophorum Homerus  
 appellari solebat, quo cum Cicero se-  
 malle errare, quam cum ceteris vera  
 sentire professus est, ille, inquam, li-  
 teratorum omnium princeps, ad ma-

ximum ingenium , quo a natura fuerat abunde donatus , sic quoque eloquentiæ studium adjunxerit , ut omnes tum rerum scriptores , tum oratores & copia , & gravitate verborum superaverit ; ac minime contentus ea gloria , quam sibi & intelligendi vi , & dicendi præstantia comparaverat , commentariis etiam elegantissimis editis dicendi doctrinam pertractaverit ? Quid Aristoteles , alterum sapientiæ lumen , cujus tanta fuit eloquentia , ut a M. Tullio aureum flumen fundere dictus sit , nonne dicendi artem summo studio auditores suos docuit , eisque magis Rhetorum copiam , quam Philosophorum tenuitatem in differendo proposuit , quod intelligeret , doctrinam quidem per se ipsam prodesse , sed si ad doctrinam eloquentia accedat , præclarum quiddam ac singulare existere ? Nihil de Teophrasto , nihil de Zenophon-

phonte, nihil de Lyfia, nihil de innumeris aliis præstantissimis Græciæ viris dicam, quos ob incredibilem eloquentiam dicendique leporem non minus, quam ob sublimium ac divinarum rerum præstantiam tantopere suspicimus & admiramur. Quid vero de latinis loquar? Profecto satis est nobis unum pro cunctis summum doctrinæ & eloquentiæ exemplum M. Tullius; qui primus e Græcia in Latium cum Philosophiam advocasset, quam politè, quam diserte, quam eleganter eam explicavit, viamque ceteris aperuit, scientiam illam scite ornateque illustrandi? Sunt vobis ante oculos ejus libri de finibus bonorum & malorum, sunt volumina Tusculanarum quæstionum, sunt de divinatione, de fato, de legibus, tum etiam de amicitia, de senectute ac de omni officiorum genere tribus libris mirifice comprehensa, quæ

quæ singula fatis per se loquuntur. Neque vero unus fuit ex omni memoria inter Latinos M. Cicero, qui Philosophiam, Jus civile, & omnem rerum scientiam dicendi elegantia exornaverit. Quid enim L. Crassus, Q. Scævola, Ser. Sulpicius, L. Lucilius Balbus, C. Aquilius, aliique complures, qui cum summa juris notitia bonas litteras & eloquentiam copulantes, non solum jurisperiti, verum etiam disertissimi esse, & haberi voluerunt? Cujus rei fidem faciunt paucissima illa aurea, quæ nobis de eorum scriptis supersunt fragmenta. Certe si vera sunt, quæ historiarum monumenta referunt, M. Porcius Cato Censorius, qui non solum optimus civis, optimus senator, optimusque imperator, sed etiam magnus jurisconsultus & orator fuit, eloquentiam sic adamasse dicitur, ut mira fuerit ejus in dicendo gravitas atque



que majestas ; & præter complures , quos de Jure civili libros conscripsit , orationes etiam amplius centum quinquaginta elucubratus est . O singularem majorum nostrorum diligentiam ! O admirandum literarum & eloquentiæ studium ! Quod si ad medicos me convertam , statim occurrunt doctissimi medicorum principes Hippocrates , & Galenus , qui medendi artem eloquentia præcipue propugnasse videntur . Nam præter purissimum elegantissimumque dicendi genus , quo utuntur in iis , quæ ad rem medicam explicandam pertinent , in aliis quoque disciplinis exornandis , quæ ad optimi cujusque medici præstantiam requiruntur , talem adhibent splendorem verborum ac sententiarum gravitatem , ut eloquentissimorum nemini cedere videantur . Et quidem Galenus non solum de animorum nostrorum motibus , in  
qui-

quibus concitandis maxima oratoris posita vis est, præcepta pulcherrima docuit, verum etiam integrum de arte Rhetorica opus conscripsit: usque adeo vir sapientissimus eloquentiam ad artem medicam necessariam esse putabat. Missum facio e nostris, ne dicendo longior sim, Cor. Celsum, cujus de medendi facultate commentaria tam nitide venusteque scripta sunt, ut nihil pulchrius. Quis autem sibi persuadeat, viros tales ac summopere occupatos ita ingenio ac tempore fuisse abufuros, si purum ejusmodi & ornatum dicendi genus ad graviores, quas ipsi profitebantur disciplinas, ociosum prorsus atque inutile judicassent? Non ita sanæ mentis, aut consilii inopes fuerunt, ut quid in unaquaque disciplina utile foret, aut inutile, satis superque non intelligerent.

Sed mutata est, inquiunt, jampridem

dem studiorum ratio. Fuit quidem, apud veteres non minor verborum, quam rerum cura. Nos autem scientia rerum contenti sumus, cum nemo in utroque & doctrinæ & scribendi studio excellere unquam possit. Hæc est, Auditores, imperitorum hominum vetus & inanis cantilena: quæ fortasse nobis aliquantum negotii faceret, nisi præsto essent tot clarissimorum virorum volumina, qui superiore ætate cum rerum scientia, tum dicendi facultate præstiterunt: quorum sane & numerus & auctoritas tanta est, ut ignavorum istorum perfugia obstruere facile possit. Nam renascentibus in Italia duo fere ab hinc secula literarum studiis, prima sapientum cura fuit, orationem barbarorum maculis expurgare, eamque veteri splendori restituere. Intelligebant enim viri prudentes, fieri non posse, ut liberales disciplinæ squali-

C

dam,

dam, diutinaque macie decoloratam, faciem in vividam splendidiorēque commutarent, nisi succo & sanguine bonarum literarum alerentur. Evolvite quidem temporum eorundem annales, perlegite ejus ætatis monumenta: nullo negotio percipietis, quo eorum industria & conatus evaserit. Nam tot statim magni nominis philosophi, tot præclari juris consulti, tot celeberrimi theologi extiterunt, ut brevi temporis intervallo omne doctrinæ genus & castitate sermonis, & eloquentiæ luminibus illustratum pristinas opes recuperarit. Quid ergo sibi blandiuntur isti ignaviæ patroni, qui doctrinæ studia cum bonis literis & eloquentia conjungere, rem perarduam & herculeo fere labore dignam clamitant? Majores nostri potuerunt latinitatis & eloquentiæ studia tot annos jam intermortua, ingenti labore summoque conatu quasi ab infe-

inferis revocare, potuerunt emendate politeque scribere: haud poterunt homines nostri delicatuli ea nunc assequi, ubi jam in tot gymnasiis & academiis exposita publice patent? At rerum scientia contenti sunt, verba negligunt. O excusationem ignorantiae minime ferendam. Fateantur potius sese rerum scientiam, perinde ac verba negligere. Nam ponamus quempiam doctrina multiplici instructum, sed naturali sermonis copia carere, vocabula inter loquendum quaerere, & quasi verba enumeret, in singulis periodis hæsitare; vel certe si quam habuit a natura loquendi facultatem, nullum tamen habere usum recte & accurate dicendi, nullam troporum, nullam figurarum, nullam boni ordinis notitiam illi præsto esse, adeo ut si non ætate, at in dicendo infans esse videatur: peto nunc a vobis, Auditores, quid aget, quo se vertet cum

isto suo doctrinæ thesauro homo miserimus? An poterit scientiam, quam sibi tanto labore tantisque impensis comparavit, communicare cum aliis, si deest verborum proprietas, & explicandi facultas? Audebitne cogitata sua coram viris doctis & eruditis palam facere, si sine magna sui difficultate, vel eorum qui audiunt molestia, loqui nesciat? O frustra susceptos labores. O inanes tot vigiliarum, quos expectabat, amplissimos fructus. Delitescat nimirum necesse est ob sermonis inopiam tacitus & obscurus, qui intelligendi acumine & eruditionis præstantia inter viros doctissimos eminare potuisset. Fruetur quidem, non inficior, sua secum doctrina, succo suæ contemplationis sibi vivens; sed præoccupata ab aliis doctrinæ præmia non sine animi dolore conspiciet. Quod si homines inter cetera ob eam causam gravissimis

mis studiis vacant, ut reipublicæ bono consulant, aut saltem patriæ utilitati prospicere valeant, quid tandem ab iis sperandum, qui aut barbare loqui, aut elingues ac muti omnino esse debent? Habeat quis sane optimas & sapientissimas de republica cogitationes: comprehendat probe ea, quæ Plato & Aristoteles cum de domestica, tum de publica felicitate præcepta tradiderunt: cognitum illi sit quicquid de jure belli & pacis Hugo Grotius conscripsit; egregie demum noverit vel sacros annales, vel decreta Conciliorum Pontificumque responsa: quid tandem illi proderunt tot tantæque doctrinæ opes, si de illis ipsis haud sciat graviter ornatèque dicere? Scire tuum nihil est, ait ille, nisi te scire sciat alter. Profecto nisi ad doctrinam accesserit sermo, quem bonum mentis interpretem Philo ille Platonius appellabat, quid te præter truncum,

cum, aut stipitem, aut hominis umbram homines judicabunt? Proinde Lucretius paucissimis illis verbis, hoc est sapere & dictis rationem reddere, sapientis viri summam comprehendebat.

At vero dicet quispiam, quid tu nobis fingis ejusmodi homines elingues & mutos, quos loquacissimos omnium esse constat? Ita sane. Quanquam enim multi sunt, quos antea dicebam, qui ob ingenuum pudorem tacere, quam publice balbutire malunt; plures tamen profecto invenias, qui plus loquacitatis & audaciæ, quam pudoris habent, qui nec impure scribere, nec latine nescire turpe putant, se vero doctos & sapientiæ promos condos venditant. Age vero, scribant aliquid, aut loquantur docti isti blaterones, ut eos nimirum solenni more Socratis intus & in cute videamus. O quot quantasque mihi videor videre doctrinarum

co-



copias . O quam magna & ampla eruditionis supellex comparatur . Res sacra agitur , proinde quicquid habent Biblia, Concilia, Interpretes , quicquid Græci ac Latini Patres conscripserunt, in unum congeritur , ut non tam oratio , quam Polyanthea componi videatur . Quid tum? præter innumera ferre argumenta , quæ singulæ disciplinæ, suam veluti symbolam , conferunt , opus adhuc macrum & exile videtur, nisi addantur & historiarum flosculi & apologi & poetarum carmina . Satis jam satis , imo plus quam opus sit ad satietatem . Sed quod dolendum magis est , omnia sic confusa , sic perturbata nulloque ordine digesta inferuntur , ut quale sibi poetæ finxerunt chaos , tale opus istiusmodi esse videatur . Nihil loquor dictionem barbaram & lutulentam , nihil nova & inaudita verborum portenta , nihil infelicem sermo-

monis siccitatem & inconcinnam elocutionem, quam sine fastidio audire nemo possit. Hinc tantum abest, ut qui adfunt, aut qui eorum scripta legunt, doctrinam in ipsis suspiciant & magni putent, ut potius de eorum ingenio pessime judicent, & homines ejusmodi memoria quidem multa, judicio autem minimo pollentes existiment. En fructus studiorum uberrimi. En fructuosa magnarum rerum scientia. En viri docti nomen tot studiis tantisque impensis quæsitum. Temeritatis suæ poenas jure ac merito luunt homines imperiti, quod nobilissimas disciplinas impuro sermone foedarint. Poeniteat illos aliquando elegantiores literas contempsisse, quæ magnum eorum doctrinæ splendorem contulissent & ornamentum. Fateantur sese tot annos in gravioribus studiis frustra contrivisse, humanioribus literis & eloquentia, unde illa nervos  
&

& vires accipiunt , temere atque imprudenter neglectis .

Sed barbaris istis literarum oppugnatoribus summo cum probro & dedecore rejectis , vos jam , Adolescentes optimi , compellat oratio mea . Jam vos probe intelligitis , quam necessaria sint , ad tuendam liberalium artium dignitatem , literarum & eloquentiæ studia : quæ quidem majores nostri in omni fere ætate ita cum doctrinæ studiis conjuncta esse voluerunt , ut nisi qui eloquens idemque dicendi peritus esset , nemo sapiens putaretur . Nam rudis & inculta , imo sine voce ac spiritu sapientia est , si quidem sapientia dici possit , cui deest sermonis gratia , dicendique venustas . Proinde mente ac judicio destitutus omnino sit oportet , qui sine adjumento literarum & eloquentiæ præsidio sperat aliquem gravissimarum disciplinarum se fructum capere , aut hominem

D

fa-



fapientem videri. Hæc autem omnia, summatim a me dicta fuerunt, non tam ornandæ amplificandæque eloquentiæ caussa, cujus dignitatem sustinere debeo, quam quo maxime utilitati vestræ servirem, animosque vestros contra literarum & eloquentiæ vituperatores confirmarem. Restat igitur illud unum, quod mihi ad extremam reservavi orationem, ut scilicet vobis quod facile sit, maximeque expeditum ad eloquentiam iter, quam brevissime ostendam. Nolite putare, me proponere vobis velle Hermogenis, aut Demetrii, aut Longini præcepta, vel Oratorias Quintilianian, aut junioris cujuscumque Rhetoricas institutiones, quas hoc tempore usus & consuetudo in scholas invexit. Nolo vos præceptis ejusmodi obruere, quæ quanquam minime reprehendo, tamen ea per se ad hominem eloquentem efformandum haud multum vale-

re

re arbitror. Utar fane viæ brevioris compendio. Quemadmodum enim, qui pingendi artem tradunt, tabulam aliquam affabre pictam ante oculos ponunt, ut frontem, supercilia, os & ceterorum membrorum conformationem tyrones coloribus exprimere, & quoad fieri potest, singula lineamenta corporis imitari studeant; ita quoque vobis ego hodierno die clarissimum, & ex omni parte absolutum eloquentiæ proponam exemplum, in quo quicquid splendoris, quicquid dignitatis & gloriæ dicendi arte continetur, uno veluti aspectu intueri, & contemplari possitis. Is est M. Tullius Cicero, Juvenes ornatissimi; qui naturæ providentia natus esse dicitur, ut in illo omnes vires suas eloquentia experiretur, qui magisne eloquentiæ, an illi ipsi eloquentia debeat, haud quisquam facile judicaverit: de quo hoc unum affirma-

ri potest, cum in hoc genere sic emi-  
nere, ut ipsius nomen pro oratore, &  
eiusdem in dicendo facultas pro elo-  
quentia apud posteros recepta sit. Nam  
cum se totum, ut Quinctilianus ait,  
ad imitationem Græcorum contulisset,  
effinxit in se uno vim Demosthenis, co-  
piam Platonis & Isocratis suavitatem.  
Quibus non contentus, Latinos quoque  
omnes accurate perlegit, tropos nota-  
vit, figuras observavit, & in unoquo-  
que oratore si quod esset artificium,  
deprehendit, ut nimirum in se uno po-  
steri haberent quicquid uspiam in di-  
cendi facultate existeret pulcherrimum  
& admirandum. Hunc ego, Adole-  
scentes optimi, eloquentiæ ducem, hunc  
egregium & immortalem dicendi ma-  
gistrum hodie vobis imitandum propo-  
no, in quem omnia vestra studia, cu-  
ras, cogitationesque conferatis. Quem-  
admodum autem non unus oculorum  
con-

conjectus in imaginem ab Apelle , aut a Parrhasio depictam , non unus penicilli ductus in tabula , neque adumbrata unius oris lineamenta , pictorem repente faciunt ; ita quoque nec unius Tullianæ orationis lectio , neque una data eloquentissimo viro exprimendo semihora eloquentiæ cupidum statim efficiunt eloquentem : sed meditatio sedula , exercitatio frequens , & usus quotidianus ad eloquentiæ fastigium Ciceronis imitorem extollunt. Hunc igitur oratorum eloquentissimum , quem nonnulli eloquentiæ Deum appellare minime dubitarunt , si me amatis , nunquam ex oculis , nunquam ex manibus , aut sinu deponite . Hunc spectemus , Quintilianii voce & cohortatione utar , hoc propositum sit nobis exemplum ; atque ille se profecisse sciat , cui Cicero valde placebit .

DE

## ORATIO II.

*Habita VI. Idus Novembres anno*

MDCCXXI.



UM superiore anno ex hoc amplissimo loco studiosis eloquentiæ Adolescentibus, qui ad hoc Romanum Gymnasium multa frequentia convenerant, facile & expeditum ad bonas literas & eloquentiam iter fore prænuñciaſſem, ſi M. Tullium Ciceronem diligenti ratione ſtudioque ſibi imitandum proponerent; fuerunt quidam, quantum ego intellexi, quibus oratio mea probari omnino non potuit: quod cum ſemper ardua & gra-



gravis, magnisque ingeniorum disce-  
 ptationibus digna quæstio visa fuerit,  
 an videlicet unus Cicero, an alii quo-  
 que boni & præclari auctores imitandi  
 essent, ego statim quasi e tripode rem  
 definire, nec partibus auditis senten-  
 tiam ferre ausus sim, uno duntaxat ad  
 imitandum Cicerone proposito: quo-  
 circa me temere & arroganter fecisse,  
 arguebant, quod tam multos Latinos  
 scriptores, & quidem omnium judicio  
 elegantissimos, parvi fecerim, & M.  
 Tullium, cujus elocutio multorum  
 opinione verbosa, & stylus Asiaticus,  
 ceteris ad imitationem prætulerim.  
 Equidem poteram causæ bonitate con-  
 fisis, obrectationes hujusmodi neglige-  
 re: cum præsertim nemo eorum, quo-  
 rum dignitatem revereri, auctoritati-  
 que parere debeo, orationem meam  
 interpellaverit. Verum cum animad-  
 verterem præclaram illam controver-  
 siam

fiam de uno, aut de pluribus imitandis inter doctissimos viros fuisse sæpe in iudicium magna animorum contentione vocatam, nunquam tamen satis explicatam, nunquam definitam; subiit animum causam ipsam quasi comperendinatam recognoscere, non tam ut iudicium meum interponam, quam ut cupidi eloquentiæ adolescentes, quos in hac studiorum instauratione frequentes adesse video, cognitum habeant; quid de illa viri graves & docti senserint, quibusque de causis nos proximo anno unum Ciceronem præ ceteris imitandum esse statuerimus. Adeste igitur animis, Adolescentes optimi, quos si unquam alias, attentos vos hodierno die maxime cupio. Agitur enim modo non de oratore, aut de historico, aut de poeta aliquo, ut fieri solet, interpretando, sed de M. Tullio oratore omnium eloquentissimo vobis in eloquentiæ imperato-

ratorem & ducem constituendo . Agitur de præstantissimo dicendi magistro, in cujus imitatione castissimæ latininitis, & germanæ eloquentiæ fundamenta nituntur . Agitur demum de expedita ac perfacili via, qua optatos & uberimos ipsius eloquentiæ fructus percipere possitis .

Non defuerunt quidem superiores memoria magni nominis viri, qui sive veterum gloriam se consequi posse diffiderent, sive ingenio suo plus nimio tribuerent, omnem in literis imitandi rationem de medio sustulerunt. Sed hos strenue refellit apud Ciceronem clarissimus orator M. Antonius : qui de oratore recte instituendo disputaturus, totius veluti ædificii basim imitationem posuit, & tanquam id quod esset primo cogitandum præcepit. Ergo hoc sit primum, inquit, in præceptis meis, ut demonstremus, quem imitemur .

E

Hæc

Hæc eadem Quinctilianus vestigia persequens, ad oratoris stylum efformandum & elocutionem comparandam, multa satis accurate de imitatione conscripsit. Ubi plurimis & eloquentissimis enumeratis auctoribus, ex quorum lectione tum verborum copia, tum varietas figurarum & componendi ratio ab oratore peti debent, illud clare deducit, eloquentiam magna ex parte imitatione contineri. In eadem quoque sententia fuere postea Paulus Cortesius, P. Bembus, Picus Mirandulanus, Bartholomæus Riccius, alique viri plurimi ingenio & eloquentia clarissimi, quorum extant docti & eruditi de imitatione libelli. Et sane cum omnia, quæ ad rationem artis pertinent, imitatione cum fieri, tum perfici videamus, anne una ars bene dicendi, quæ omnium difficillima atque pulcherrima, imitationem repudiabit? Cum igitur  
nul-

nullus sit dubitandi locus, quin in eloquentiæ studiis nos ad aliorum exemplum conformari oporteat, illud quærendum superest, multine sint, an unus **M. Tullius** ad imitandum, neglectis ceteris omnibus, feligendus.

Atque hic statim mihi videor audire non tam voces, quam clamores & vociferationem eorum, qui rem indignam & injuriæ plenam esse clamitant, in literarum studiis unum omnibus præferri Ciceronem, & tot alios graves & magnos literarum parentes, **Plautum**, **Terentium**, **Cæsarem**, **Salustium**, **Livium**, aliosque ingenio præstantes & immortalis gloria dignos, tanquam abortus, aut nothos reiici atque contemni. Hoc autem Ciceronis ipsius exemplo confutari quis non videt? Cum ille non unum, sed eloquentissimum, quemque tum Græcorum, tum Latinorum imitandum susceperit, & hoc pacto

in se uno effingere potuerit vim Demosthenis, Platonis copiam, & Isocratis jucunditatem. Anne in unum M. Tullium ingenii opes natura effudit universas, adeo ut nihil pulchre, nihil venuste cogitatum, aut ingeniose dictum in tot aliis præclaris scriptoribus inveniat, quod dignum sit, ut nos imitemur? Atqui illud, Cicerone ipso faciente, certum est, in natura nihil ex omni parte perfectum atque beatum, existere: perinde ac illa ceteris, quod largiatur, non sit habitura, si uni omnia largiretur. Ex quo fortasse contingit, ut neque Demosthenes ipse Ciceroni per omnia satisfaceret, sed aliquando sibi ille dormire videretur. Quod nimirum, cum ad eum exprimendum se penitus tota mente & cogitatione contulisset, non omnia tamen loquendi ornamenta dicendique lepores in eo reperiēbat. Et tu nobis in uno  
Cice-

Cicerone cuncta existere, ac nihil omnino deesse persuadebis? Imo tantum abest, ut omnis in eo efflorescat dicendi virtus, ut potius multa præclari ejus ætatis oratores in eodemprehenderint vitia. Nam dialogi auctor affirmat, Ciceronem dum adhuc viveret, a Licinio Calvo reprehensum fuisse, tanquam solutum & enervem, a M. Bruto ut fractum & clumbem, ab aliis ut tumidum, inflatum, redundantem, atque Asianum. Præterea A. Gellius testatur, Gallum Asinium scribere non dubitasse, Ciceronem parum integre, improprie, atque inconsiderate esse locutum; & Largium Licinium de illo tam male sensisse, ut in ipsum quoque ediderit librum convicii plenum, cui titulus Ciceromastix.

Audistis, Adolescentes optimi, quæ improbo ore in M. Tullium evomunt maledicta, qui vos ab ejus imitatione conan-

conantur abducere? At vero nisi hæc falsa, & contra eloquentissimum virum ab ejus inimicis temere effictaprehenderitis, me hominem impudentem & mendacem arguitote. Nam qui tandem sunt tam acerbæ criminationis auctores? ii scilicet, quorum partim Ciceronem oderant, partim ejus gloriæ invidebant, partim denique obtestandi studio ad eum vituperandum incitabantur. Nam cum eo tempore nonnulli Romæ oratores essent, qui sicco, arido & exangui dicendi genere utebantur, quod se Atticorum more dicere videri vellent, quorum oratio pressa erat, ac subtilis; copiosam & profluentem M. Tullii eloquentiam æquo animo ferre non poterant, atque ipsum tanquam fractum & clumbem, otiosum & inanem, unoque verbo Afrianum appellabant. Ex hac schola prodiit Licinius Calvus, qui, ut M. Seneca



neca testatur, iniquissimam diu litem cum Cicerone de principatu eloquentiæ habuit, cujus tamen dicendi rationem non modo Cicero ipse ut jejunam & attritam sæpe reprehendit, sed ne Seneca quidem, aut quisquam alius probavit unquam. Quid ergo mirum si Calvus idem Ciceroni quoquo modo potuit, par pari referre, atque ipsum tanquam dissolutum & enervem criminari voluerit? Quæ judicii æquitas expectari ab eo poterat, cujus animus odio atque invidia flagrabat? De Bruto autem, qui & vir probus, & Ciceronis amicissimus semper fuit, cujus nomine librum de claris oratoribus Cicero ipse inscripsit, certe quidem aliter judicare debemus. Etenim non odio, sed amoris potius, & singulari erga eundem benevolentia tribui debet, quod ipsum de stylo quasi fracto & elumbi, ut sibi videbatur, non invidiose, sed ami-

amice moneret. Erat enim magna inter utrumque diversitas styli ac dissimilitudo. Erat M. Brutus, ut a Cæsare vocabatur, disertus potius, quam eloquens: contra vero Cicero fluminis instar profluens, fusus & copiosus, ita ut ab eodem Cæsare tanquam princeps & inventor copiae laudaretur. Itaque Bruto, qui siccus erat, & plus in dicendo habebat diligentiae, quam naturae, ubertas & copia Tullianae dictionis omnino probari non poterat. Verum & Calvi & Bruti, & omnem illam Atticorum Romanorum nationem jejunitatis & inopiae peramantem quis acriore judicio ac vi, praeter Cicero-nem ipsum, confutare possit? Ille profecto ad eloquentiam non tam factus, quam natus, in aureo libello de optimo oratorum genere satis luculenter ostendit, quantum intersit, utrum quis Attice, an optime dicat. Neque enim  
fatis

satis est, inquit, oratori perfecto vitare si quid in sententia vitiosum, si quid absurdum, aut alienum; in verbis si quid non aptum, si durum, si longe petatum. Hæc vitaverunt fere omnes, qui aut Attici numerantur, aut dicunt Attice. At magni oratores, cum careant omni vitio, non sunt contenti quasi bona valetudine; sed vires, lacertos, sanguinem quærunt; quandam etiam suavitatem coloris. Id vero desinant dicere, qui subtiliter dicunt, eos solos Attice dicere, id est quasi sicce & integre; at ample & ornate & copiose cum eadem integritate, Atticorum est. Ex his satis intelligitis, Auditores, quam temere & impudenter in M. Tullio reprehendebant maximam illam ingenii ubertatem dicendique copiam, qui se Atticos, aut Atticorum imitatores profitebantur. Dam-  
 nabant illi in eloquentissimo viro,

F

quod

quod multorum vitium esse solet, ea, quorum ipsi compotes esse non poterant. Non dicendi facultas, non ingenium, non industria illis tanta fuit, ut admirabilem M. Tullii eloquentiam exæquarent: & cum ipsi imbecilli, sicci, ac jejuni dicendo essent, præstantissimi oratoris amplitudinem & copiam vituperare maluerunt, quam tenuitatem, & inopiam suam confiteri. Quod autem Ciceroni de elocutione a Gallo Asinio, & Largio Licinio objectum est, id stomachum A. Gellio illud referenti sic movit, ut illos tanquam sacrilegos de Diis immortalibus male opinantes, & immania quasi monstra appellare non dubitaverit. At vero non tam stomachum, quam risum movere videntur homines isti amentes & stolidi, qui de integritate ac proprietate latini sermonis cum M. Tullio contendere ausi sint, quem latinæ linguæ aucto-

ctorem & quasi parentem fuisse, communi sapientum judicio constat. Sed præstat viri doctissimi verba in medium afferre. Ut quidam fuerunt, inquit, monstra hominum, qui de Diis immortalibus impias falsasque opiniones prodiderunt, ita nonnulli tam prodigiosi tamque vecordes extiterunt, in quibus sunt Gallus Asinius, & Largius Licinius (cujus liber etiam fertur infando titulo Ciceromastix), ut scribere ausi sint, M. Ciceronem parum integre atque improprie atque inconsiderate locutum. Hæc A. Gellius. Quæ vero imprudenter Ciceroni nugatores isti opponunt de verbo *pœnitet*, ab eo perperam usurpato, aliisque istiusmodi, cum perridicula ac prorsus falsa ab ipso A. Gellio judicentur acriterque reprehendantur, apud nos tanti non sunt, ut in iis confutandis morari debeamus. Potest is, cui vacat,

apud ipsum ea legere atque perpendere : non modo non ineptum esse id , quod M. Cicero dixit , intelliget , sed eleganter , facete , ac festivo dictum .

Jam vero iis , quæ Ciceronis splendorem maculis aspergere videbantur , satis superque deletis , ad cetera , quæ de illo duntaxat imitando objecta sunt , faciliorem fore video reliquum orationis meæ cursum . Nam quod primo reprehendebant , quod nos , uno Cicerone ad exemplum proposito , ceteros auctores , qui pulchre nitideque locuti sunt , injuriose repudiaremus , quis non videt , quam sit absurdum , & a veritate alienum ? Non equidem repudiandos , & per summam injuriam abjiciendos eos esse dicimus , quorum perfecta divino ingenio monumenta suspicimus , ac tantopere veneramur . Imo & plurimum illis nos debere fatemur & propter ingentem optimarum rerum  
cogni-

cognitionem & propter reconditas doctrinæ opes, quas summo labore & industria partas nobis ipsi reliquerunt. Sed in efformando stylo parandaque locutione magistrum omnium optimum M. Tullium illis præferendum esse putamus. Et sane primo quæram ab iis, qui omnes bonos auctores a nobis imitandos esse contendunt, an omnes illi inter se styli nobilitate, omnes elegantia & artificio pares existant, an vero alius alio melior, alius alio præstantior existimetur. Si primum affirmant, concedi illis profecto potest, quod petunt: non uni eorum operaretur, sed æque omnibus studium & imitatio impendatur. Quod si, ut res est, negent illos pares esse ingenio, scribendique ratione similes, cur non melioribus operam dederimus, iis, qui minus boni sunt, neglectis? Jam vero non omnes bonos imitandos esse fatean-

teantur, necesse est. At si inter illos, qui boni esse dicuntur, unus longe omnium optimus longeque præstantissimus existeret, in quo quæ singula ceteri habent bona, in eo uno universa ampliora ac splendidiora conspicerentur; nonne hunc unum omnium maximum atque perfectum imitari præstaret, quam ceteros omnes, qui mediocriter boni esse censentur? Atqui hunc omnium principem clarissimum, atque summum, me quoque tacente, M. Tullium esse intelligitis: qui a Cæsare, acerrimo ingeniorum censore, tanquam dux & inventor copiarum, ut antea diximus, laudabatur; a Vellejo Paterculo, vir ingenio maximus, a M. Seneca ingenium, quod solum par imperio suo Pop. Romanus habuit, ab Aquilio Gallo, Rhetoricæ omnium peritissimus, a Quinctiliano, in omnibus, quæ in quoque oratore laudantur, eminent-



nentissimus, a Lactantio perfectus orator & summus philosophus, a D. Hieronymo eloquii flumen appellatur. Hic profecto talis tantusque vir mira ingenii felicitate omnem dicendi laudem consecutus est, & quæ ceteris insunt pulcherrima, in se uno splendide amplissimeque complexus est. Quod quidem ipse in oratore de se modeste fatetur. Nulla est, inquit, ullo in genere laus oratoris, cujus nostris in orationibus non sit aliqua, si non perfectio, at conatus tamen atque adumbratio. Non assequimur, at quid deceat, videmus. Et revera, si de Græcis loquamur, non est, quod in eo desideretur Demosthenis summa vis, Platonis copia, & singularis Isocratis suavitas, ut Quintilianus affirmat. Quid vero de Latinis oratoribus, cum in se granditatem Sulpitii, vim Antonii, Crassi leporem, suavitatem Catuli,

pro-

proprietatem Cottæ, splendorem Cæsaris, Hortensii flores effinxisse dicitur? Cum igitur in uno Cicerone pulcherrimum & perfectissimum eloquentiæ genus habeamus, unde quicquid egregium, quicquid splendidum & magnificum tum in Græcis, tum in Latinis scriptoribus eminet, in nos derivare possimus, ad eorumne etiam, quæ non ita pulchra sunt, exprimendas imagines curam animumque traducemus? Atqui stultitiæ genus est, optimum imitari cum possis, ad id quod mediocre, aut deterius est, cogitationem adiacere. Neque quisquam erit tam amens pingendi artifex, qui si imaginem ab Apelle depictam ante oculos habeat, Polignoti, aut Thymantis curret inspicere tabulas. Cum itaque communi sapientum judicio, nulla omnino virtus, nullum scribendi lumen, nulla laus in ullo sit, quæ M. Tullio non

non inesse longe præstantior atque absolutior inveniatur, quotus quisque supervacuam rem esse non videt, multos quantumvis bonos imitandos suscipere, cum magis expediat, ad unum omnium optimum ac præstantissimum, quem imitemur, industriæ nervos intendere? Frustra per longas ambages quærimus, quod recta via maturissime consequi possumus.

At enim Quintilianus asseverat, M. Tullium non solum oratorem Græcorum omnium optimum Demosthenem esse imitatum, sed Platonem, sed Gorgiam, sed Isocratem, sed Hyperidem, sed Lysiam; inter Latinos item non unum, sed multos, quos paulo ante numeravimus, Sulpitios, Antonios, Crassos, Catulos, aliosque sibi ad exemplum proposuisse. Libuit illi quidem apes imitari, quæ huc & illuc volantes, flores delibant, & fingendis favis confi-

G

cien-

ciendoque melle succos ita permiscant, ut eos nemo inde discernat. Quod ergo Ciceroni licuit, erit ceteris interdictum? Minime gentium. Liceat per me tibi quoque omnes bonos imitari, quod Ciceroni licuit, si par ingenium, si par industria, si par scribendi labor & exercitatio tibi cum eo sit. At vero quis ignorat, Ciceronem ingenio plane divino fuisse, & a primis annis, ut Plutarchus refert, tantum in literis profecisse, ut ejus æqualium parentes ad eum videndum commoti fama convenirent? Quantus autem fuerit in eo fere semper negotiis gravissimis occupato scribendi labor atque exercitatio, cum neque in feriis, neque in ludis, neque in communi otio unquam esset otiosus, quis dicendo paucis complecti possit? Hinc ille primo de legibus, subciliiva, inquit, quædam tempora incurrunt, quæ ego perire non patior,  
ut

ut si qui dies ad rusticandum dati sint, ad eorum numerum accomodentur, quæ scribimus. Et in orat. pro Planco, orationes ego scripsi ludis & feriis, ne omnino unquam essem otiosus. In Philippicis autem, dico, inquit, me nec reipublicæ, nec amicis unquam defuisse; & tamen omni genere monumentorum meorum perfecisse operis subcivis, ut meæ vigiliæ meæque literæ & juventuti utilitatis; & nomini Romano laudis aliquid afferrent. Verum quid plura? Nonne innumera propemodum & immortalia ejus opera, quorum partim injuria temporum interuisse dolemus, partim in manibus omnium extant, id per se satis superque loquuntur? Cum hoc igitur tali tantoque viro ingenii vim & industriam suam homines isti conferant, qui ad ejus exemplum provocare audent, & omnes bonos scriptores

se imitari posse confidunt. Legant diu noctuque, quemadmodum ille se fecisse fatetur, oratores tum Græcos, tum Latinos, qui in laude aliqua fuerunt: exprimant in se omnem omnium eloquentissimorum hominum in dicendo vim: experiantur sese pro virili, æmulari conantes & ubertatem Livii & brevitatem Sallustii & proprietatem Cæsaris & candorem Celsi & Tullii denique ipsius ornatum & amplitudinem. Nam si id assequantur, tunc non inviti illis concedemus, ut non unum Ciceronem, sed omnes quotquot extant auctores, quam volunt libere imitentur. At vero quis animo non comprehendit, quam difficilis & ardua res sit, multos & varios, atque inter se omnino dissimiles scriptores legere, meditari atque concoquere, ut inde una & simplex, sibi perperuo constans digeratur, & coalescat oratio, non

non autem monstrum aliquod exoritur, cui cum cervice equina, ex Horatii sententia, junctum sit caput humanum? Non mihi, sed summo ingenio viro, & in literis & eloquentia maxime exercitato P. Bembo Cardinali credite: qui de hac ipsa controversia ad Picum Mirandulanum hominem literatissimum scribens, multorum recte imitandorum difficultate perpensa, fieri non potest, ait, ut qui multos assequi una scribendi ratione vult, ejus oratio non dissimilis, non impar, non sibi diversa, inconstansque sit, non inconcinna, non parum cohærens, dum hujus lenitatem, illius vero ardorem, alterius ornatum, alterius negligentiam, quæ quidem interdum, ut in muliere non fucata facies, sic in scribente gravior est, sexcenta præterea alia, multumque differentia scribendi genera qualitatesque complectitur. Et sane quemadmodum

dum stultitiæ genus esset, ad unius hominis os vultumque effingendum, dissimiles multorum hominum vultus assumere, quorum unus hilaritatem, alter tristitiam, hic benignitatem, ille severitatem præ se ferat, ita ex multis scriptoribus, quorum lineamenta & color varia ac dissimilia sunt, unam & eandem velle scriptionem conficere, absurdum est prorsus ac perridiculum. Quis enim facile possit Livium cum Sallustio, Cæsarem cum M. Tullio, Virgilium cum Plauto, aut Terentio una similique scribendi ratione conjungere, qui dicendi genere inter se differunt quammaxime? Præterea si viros singulari ingenio præditos nonnisi multorum annorum studio, multisque vigiliis assequi potuisse legimus, ut ad propriam unius scriptoris dictionem proxime accederent, quæ per Deum immortalem tanta ingenii vis, tantus la-



labor atque conatus , si omnes legendi , omnes imitandi sint ? Franguntur vires , contentio animi debilitatur , atque ardor elanguescit , dum in singulis unius scriptoris lineamentis exprimendis occupamur , & unius styli faciem pari verborum ornatu & elegantia repræsentare conamur : & tantum nobis ingenii acumen , tantum animi robur , tantam industriam inesse putabimus , ut non unum , sed omnes auctores recte imitari possimus ? O nimiam de se hominum opinionem . O vanam ingeniorum fiduciam . Utinam homines isti audaces sedulo ad unum Ciceronem imitandum curas animumque adhiberent . In hoc uno recte imitando atque exprimendo , omnes profecto alios imitarentur , cum unus Cicero raro naturæ miraculo & inaudita ingenii felicitate consecutus sit omne id , cujus ceteri omnes vix partem aliquam consecuti esse videntur . Sed

Sed ecce alia in M. Tullium ad-  
versariorum tela . Verbosior est , in-  
quiunt , Cicero , quam quod præsens  
scribendi ratio , consuetudo atque usus  
postulent . Amant magis hæc nostra  
tempora pressum , sententiosum & acu-  
tum dicendi genus , quam Ciceronia-  
næ eloquentiæ copiam & lacinias . Sa-  
tis quidem belle . Sed ab acutis ejusmo-  
di scriptoribus primum peto , an de la-  
tinitate & stylo forensi , quo nunc uti-  
mur , an de quocunque alio scribendi  
genere isthæc dicant . Nam si primum ,  
satis jam alias , cum de latinitate fo-  
rensi expurganda , tum etiam cum de  
necessitate eloquentiæ in judiciis hodie-  
nis orationem habuimus , ex hoc ipso  
loco graviter diximus , eorumque opi-  
nionem , qui nunc Ciceronis eloquen-  
tiam e foro esse omnino proscriptam  
putant , pro virili parte convellere co-  
nati sumus . Quod si de alia quavis  
scri-

scribendi ratione intelligi volunt, excusandi sunt quidem, si præter paucas illas Ciceronis orationes, quarum notitiam in scholis a pueris habuerunt, nullum aliud tanti viri opus unquam aut viderint, aut legerint. Nam, ut mitius cum iis, qui Ciceronem, tanquam verbum rephendunt, agamus, quam aliam quæso erroris excusationem afferre possunt, quam unam, in qua versantur, Ciceronis ignorationem? Etenim cui verbosior Cicero ipse videatur, si tres ejus de oratore libros, tum etiam alios de claris oratoribus, de oratore perfecto, ac de optimo oratorum genere perlegerit, quos omnes presse, subtiliter & acute scriptos esse constat? Evolvant libros tum de Academicis, tum de Tusculanis quæstionibus, de natura Deorum, de divinatione, de fato, de legibus, aliisque permultis, in quibus præter

H

infi-

infinitam rerum cognitionem eximiamque doctrinam, qua illi abundant, omnia tam sapienter, quam concinne ac sententiose conscripta invenient. Quid de officiorum libris ad Marcum filium loquar, in quibus cum tam pulchra de civili sapientia & virtutum omnium disciplina disputaret, æquabili & temperato orationis genere usus est? Huc accedunt tot epistolarum libri ad Atticum, ad Quintum fratrem, ad M. Brutum, ad Pansam, ad Hircium, aliosque familiares, qui omnes doctorum virorum judicio octoginta fere numerantur, in quibus sane nulla potest verborum copia reprehendi: sed sic omnia venuste, eleganter sciteque scripta sunt, ut mea quidem sententia, si nulla alia M. Tullii monumenta existerent, sola epistolarum volumina ingenium ejus admirabile & quasi divinum comprobarent. Hæc igitur legant,

gant, hæc serio evolvant, & acri judicio perferutantur scituli isti ac peracuti Ciceronianæ locutionis censores; & si quid verbum, si quid inane, aut redundans in iis tandem offenderint, tunc sane Ciceronem nimis loquacitatis reum faciant. At vero quæ summa impudentia est, cum tot præclara Ciceronis ipsius opera ne de nomine quidem audiverint, ei de verbosiore stylo diem dicere, eumque indictæ causæ damnare? Si in tanta jacent literarum ignorantia, ut quæ pressum & subtile dicendi genus, quæ autem amplum, copiosum & magnificum postulant, minime videant, cur ea damnant, quæ minus intelligunt? Cur virum, quem D. Augustinus modo maximum oratorem, modo Romani auctorem eloquii, modo magnum eloquentiæ principem vocat, ipsi tanquam loquacem, & plus nimio verbum accusant? Sa-

pienter quidem Cicero, quod obtrectatores isti minime capiunt, varia dicendi genera cogitabat: & cum domi epistolas, sermones familiares, aut dialogos scriberet, concisus, tenuis & quasi humi serpere visus est: cum autem siue in senatu, siue in foro, siue in concione diceret, tanta eloquentiæ copia tantaque ingenii ubertate dicere solitus est, ut dicenti maximæ Pop. Romani acclamationes maximique doctorum virorum plausus fierent, quasi aliquod eloquentiæ numen loqueretur. Atque hinc in foro & judiciis regnare dictus est, eoque amplitudinis & gloriæ pervenit, ut T. Livius Romanæ historiæ princeps, tam lepide quam vere dixerit, ad Ciceronis laudes opus esse Cicerone laudatore.

Habetis igitur, Adolescentes optimi, in uno Cicerone omnem scribendi rationem perfectam & absolutam.

Mul-

Multiplex & varium, quo ille ceteris longe præstitit, dicendi genus, omnem vobis suppeditat singularem styli varietatem uberrimamque exemplorum copiam. Si dictione simplici, aut temperata vobis opus est, habetis, præter quæstiones Tusculanas, epistolas familiares, dialogos de amicitia, de senectute, de somnio Scipionis, atque alia sexcenta, quorum lectione stylus ejusmodi formari, maximeque limari possit. Si grandi & sublimi dicendi genere, quod splendidis verbis gravibusque sententiis sese attollat, uti debeatis; unde uberiora & illustriora peti possunt, quam a Cicerone ipso hujusmodi exempla? Perlegite præstantissimas ejus orationes, præsertim ex Catilinariis secundam, ex Verinis septimam, tum pro M. Cælio, pro Corn. Balbo, tum etiam pulcherrimas duas pro Domo sua & pro Milone, Philip-

lippicas demum, quarum secunda supra ceteras eminet, senili maturitate ac sapientia canescentes: quis inter Græcorum, aut Latinorum eloquentissimos oratores sublimiore stylo unquam scripsit? Quis majore sententiarum gravitate, aut splendidiore majestate verborum usus est? Et erit quisquam tam amens, qui castitatem & elegantiam sermonis dicendique ornamenta in aliis auctoribus inquirere velit, quæ omnia in uno Cicerone tam ample, tam plene cumulateque splendescunt? Itaque vos, Auditores ornatissimi, mihi, homini in literarum studiis quantum satis exercitato, vestrique amantissimo credite: plus vobis ad latinitatem & germanam eloquentiam comparandam proderit assiduum ac diligens unius Ciceronis studium, quam lectio multiplex & diuturna ceterorum omnium scriptorum.

DE



## DE STUDIO POETARUM

AD LITERAS ET ELOQUENTIAM

NECESSARIO

## ORATIO III.

*Habita Idibus Novembr. MDCCXXXIII.*

I qua fuit unquam opinio optimis artibus perniciofa, quæ adolescentium nostrorum in suscepto literarum curriculo iter retardaret, aut impediret, ea certe est, quam hoc tempore multi habent de Poeticæ facultatis doctrina. Putant enim, se nullum, aut perexiguum ex ejusmodi studio fructum esse percepturos: proinde non modo præcipua carminum genera, leges ac metra discere dedi-

dedignantur, sed ne ipsam quidem poetarum lectionem, qua certe nihil suavius, nihil est jucundius, audire operæ pretium ducunt. Hinc fit, ut statim diebus, qui sive Horatio, sive Plauto, sive Terentio, aliisque poetis a nobis de more interpretandis dedicantur, complures eorum has scholas minime frequentent, qui alioquin oratoribus, aut historicis explicandis haud indiligerenter adesse consueverunt. Quasi vero ex illa poetarum lectione nihil solidi, aut bonæ frugis domum referre possint, aut nos homines otiosi alternis diebus poeticis nugis & anilibus fabellis delectemur. Itaque ut aliquando tandem quam stulte hac in re decipiantur, agnoscant, constitui in hac studiorum incuntium celebritate poeticæ artis utilitatem ante oculos istorum ponere, ut qui ad latinitatis elegantiam & eloquentiæ dignitatem aspirare volunt,

lunt, demum intelligant, neglecto poetarum studio, se oleum atque operam perdere; adeoque si quis in illis latinarum literarum est amor, si quod eloquentiæ comparandæ studium, certo sciant, interesse sua plurimum, iratis musis & Apollini tempestive reconciliari, ut ipsis faventibus ad nobilissima ejusmodi studia viam sibi muniant expeditam.

Nolo autem in hoc ipso dicendi aditu diu morari in poeticæ laudibus prædicandis, quod nimirum longum esset ac perdifficile. Hoc sane multi ante me oratores, præsertim vero Hermogenes & Aphthonius clarissimi rhetores & copiose & graviter & ornate fecerunt. Multa sunt volumina, quæ poeticæ artis dignitatem, tum etiam vetustissimam, imo divinam ejus originem, quam illa a Diis ipsis ducere creditur, satis superque commendant.

I

Ne-

Neque aliquis vestrum ignorat honores amplissimos, quibus tum Græcia, tum Romana respublica poetas, quasi homines cælesti spiritu afflatos, atque ad nos de cælo delapsos, coluit, quos proinde Deorum filios Plato nuncupavit. Et sane quis ab orbe condito fuit unquam Homëro fama illustrior, & omnium ore magis celebratus? Cujus ingenium sine exemplo maximum Vellejus affirmavit, eumque solum magnitudine operis & fulgore carminum appellari poetam meruisse. Cuinam Roma ampliores honores, quam latino-rum poetarum principi Publ. Virgilio detulit? Testes sunt Cæsaris Augusti literæ: testis ipse Pop. Rom. qui in theatrum advenienti assurrexit universus, atque illum præsentem spectantemque non minus ac Augustum ipsum venerari solitus est. Quid dicam plurimos clarissimos reges & imperatores, qui

qui poetica facultate pollere, pulcherrimum sibi duxerunt, neque ex illa minorem sibi gloriam, quam ex re militari, atque orbis imperio comparari posse putaverunt. Infinita sunt equidem nobilissimæ facultatis decora, & summa ac prope singularis apud omnes fere gentes poetarum gloria. Sed cum de iis dubitare non possint, nisi qui rudes prorsus ac barbari omni literarum notitia carent, ne actum agere videar, ad illa protinus me convertam, quæ ex poeticis studiis maxima consequuntur emolumenta.

Igitur adolescentes nostri in humanioribus literis & eloquentia proficere, quod felix faustumque sit, percipiunt; at musas & carmina & poetarum libros cane pejus & angue oderunt, atque averfantur. Verum usque adeone boni adolescentes poeticæ naturam, ne nomen dicam, ignorant, ut quanta

fit inter bonas literas & eloquentiæ studium cum poetica disciplina conjunctio, minime videant? Ignorantne eloquentiam a poetica tanquam a parente filiam ortam atque progenitam? Audiant gravissimæ auctoritatis viros Strabonem & Isidorum, qui tam apud Græcos, quam apud Latinos longe antiquiorem carminum, quam proliæ curam fuisse testantur. Audiant Plutarchum, qui in suis opusculis, tum in libro de musica, tum in eo, in quo docet, quomodo a juvenibus poetæ audiendi sint, inter cetera luculenter ostendit, poeticam omnis disciplinæ fuisse initium. Et sane si poetæ jam tum dispersos homines in unum locum congregasse & mira dulcedine carminum ex agresti illo ac ferino vivendi genere ad mitiorem & humaniorem vitam traduxisse perhibentur, quis dubitet, poeticæ inter reliquas disciplinas principem

cipem locum esse tribuendum ? Ipsa quidem multo prius, quam eloquentia potuit agrestes & immites hominum animos mulcere cantu, & ad pulchritudinem virtutis allicere. Ipsa prior apud illos de immortali Deorum natura differere, eorum laudes canere, & sacra facere instituit, unde poetæ primi & Theologi & Sacerdotes vocati sunt.

At dicet quispiam, non de dignitate, aut origine disciplinarum lis est : sed cui bono adolescentibus ad eloquentiam properantibus poetica sit, abs te quærimus. Ita sane. Ego equidem a poetis omnem latinarum literarum elegantiam & eloquentiæ laudem in nos derivari contendo. Quis enim hac nostra ætate latine scire, aut latine scribere cupiat, qui longe melius ex ipsa poetarum lectione, quam ex Grammaticorum schola voti compos non fiat ? Ætatem

tem quis terat in Grammaticorum, subfelliis: audiat complures annos Priscianum, audiat Servium & Donatum, percurrat Alvarum, perlegat Sciopium, aut quoscunque alios, qui de Grammatica diligenter accurateque scripserunt: quid illi diuturnus adeo, atque improbus labor tandem proderit ad latinæ locutionis castitatem & elegantiam comparandam? Nihil profecto. Nam, ut Quintilianus affirmat, quid aliud est Grammaticæ loqui, quam omnino latine non loqui? Erit quidem tibi sine barbarismis, aut soloecismis oratio, erit immunis a censoria Grammaticorum virgula sermo, sed macer & exanguis & veluti corpus, in quo nihil præter ossa, aridum ac sine spiritu. Contra vero si Plauto ac Terentio te dederis, si Virgilium atque Horatium, si Catullum ceterosque elegantiores poetas in manus persæpe sumpseris,



pferis, haud multum aberit, quin in Latium quasi translatus, latinam linguam arripas, & non minus latine loquendo, quam latine scribendo valeas. Et sane ex quonam fonte summus ille latinitatis magister ac parens Cicero proprietatem sermonis nitoremque verborum hausit, utrum ex Varronis Grammatica, an ex perpetua Plauti, Terentii aliorumque poetarum lectione, quos quandiu vixit, in oculis habuit atque deliciis? Si quis vel paululum ad singulos ejus libros animum adijciat, facile intelliget, quot passim occurrant, veluti in prato flores, scite & eleganter dicta, quæ ille a poetarum lectione collegit. Quot enim apophthegmata, quot adagia in ejus libris de officiis, de divinatione, in quæstionibus Tusculanis, tum etiam in admirandis ac prope divinis illius orationibus, in quibus omnis eloquentiæ amplitudo, veluti in thea-

theatro expatiari visa est? Unde breves illæ & illustres sententiæ, *homo sum, & nihil humani a me alienum puto: obsequium amicos, veritas odium parit: neque dedi, neque do fidem infideli cuiquam* atque alia sexcenta, nisi ex poetis, ut singula verba testantur? Neque vero id tantum M. Tullio, sed ceteris quoque oratoribus familiare fuisse Quintilianus affirmat. Credamus, inquit, summis oratoribus, qui veterum poemata, vel ad fidem caussarum, vel ad ornamenta eloquentiæ assumunt. Nam præcipue quidam apud Cicero-  
nem, frequentius tamen apud Asinium etiam & ceteros, qui sunt proximi, vidimus Ennii ac Pacuvii, Lucilii, Terentii, Cæcilii & aliorum inferi versus, summa non eruditionis modo gratia, sed etiam utilitatis, cum poeticis voluptatibus aures a forensi asperitate respirent. Ex iis jam plane constat, quam  
quam

quam turpiter hallucinentur, qui poetarum lectionem tanquam inutilem, damnant, & adolescentium e manibus poetas stultissime excutiunt. Sunt profecto poetæ genus hominum inter scriptores omnes eloquendi studiosissimorum. Hanc ipsis laudem tribuit acerrimus omnium unus latinitatis censor Laurentius Valla, qui in aspera illa contra Bartholomæum Facium de quibusdam latinis vocibus pugna, M. Tullii auctoritate minime contentus, ad poetas ipsos, quos omnium in dicendo castigatissimos vocat, provocare non dubitavit. Et sane quis Publ. Terentio purior & elegantior, cujus mira est amænitas, judicium ac venustas; ejus incredibiles lepores, ut Josephus Scaliger ait, vix centesimus eruditorum quisque videt? Quis Plauto magis excultus, magis venustus, unoque verbo magis latinus, quem latinæ lin-

K

guæ

guæ & elegantiae principem A. Gellius appellat, cujus ore musas locuturas fuisse, si latine loqui vellent, Aelius Stolo dixisse fertur? Quis denique Catullo, quis Publ. Virgilio, quis Horatio Flacco proprietate dicendi & nitore præstantior? Non immerito hos atque alios elegantissimos ejusmodi poetas, tanquam optimos latinæ linguæ auctores, una cum Cæsare, cum Corn. Nepote, cum M. Tullio aliisque præcipuis latinæ linguæ parentibus recensere non dubitarunt Hadrianus Cardinalis, Borrichius, Cellarius, Functius, Facciolatus aliique emunctæ naribus censores ac viri doctissimi. Et revera si poetarum fontes arescerent, non tam florentem, foecundam atque uberem latinam linguam haberemus.

At enim diligens & accuratum unius Ciceronis studium ad omnem latinitatis nitorem & copiam comparandam satis esse

esse videtur. Quid ? Nonne duos ab hinc annos tute ex hoc ipso loco M. Ciceronem unum omnium maxime castitate sermonis dicendique venustate ceteris auctoribus præferendum esse affirmabas ? Illum scilicet latinitatis parentem , illum elegantiae magistrum , illum denique eloquentiae ducem & imperatorem esse prædicabas , proinde illum ipsum nos unice debere complecti , & pro viribus imitari . Cur ergo nunc poetas tantis in cælum laudibus tollere , eosque nobis tanquam latinitatis elegantioris magistros obii- cere ? Video , Auditores , poetarum causam summum in periculum ac discrimen esse adductam . Aut enim M. Tullium poetis , aut poetas M. Tullio de suo jure cedere necesse erit . Itane vero ? Quid , si M. Tullio ipso auctore , vos ad poetarum studia incitari , urgeri ac propemodum compelli osten-

K 2                      dam?

dam? Nemo fere est in Ciceronis libris vel mediocriter versatus, qui non intelligat, quantam Ciceronianæ imitationi vim & dignitatem conferat diligens & assidua lectio poetarum. Nam unde tot sales, unde tot festivitates, unde tot lepores Cicero ipse in sua scripta derivavit, nisi a poetis? Proinde ille sæpius oratori, quem suscepit instituendum, & præclaro suimet exemplo, & gravissimis verbis inculcat, non minus quidem poetas, quam oratores esse legendos. Itaque in lib. 3. de oratore, omnis, inquit, loquendi elegantia quanquam expolitur scientia literarum, tamen augetur legendis oratoribus & poetis. Nec multo post eandem incudem tundens, de subtiliore literarum ratione loquens, hanc, inquit, alit consuetudo sermonis quotidiani ac domestici, confirmant libri & lectio veterum oratorum & poetarum. Audistis?  
ad

ad elegantiam latine loquendi, ad interiorum literarum cognitionem non sola oratorum lectione, sed poetarum quoque intelligentia atque usu vobis opus est. Hac autem de re vos non Homerus, non Euripides, non Horatius monet, aut alius quispiam e genere poetarum, sed oratorum dux & antesignanus M. Tullius: cujus auctoritas apud vos si tanta est, quanta profecto esse debet, jam plane videtis, quo loco & estimatione poetas habere debeatis.

Sed jam tempus est, ut quantum ad eloquentiæ dignitatem poësis ipsa conferat, clariore argumento percipiat. Nemo vestrum ignorat, eloquentiæ splendorem & decus ab elocutione potissimum proficisci. Hæc nimirum orationem veluti lux illuminat & colorat: hæc res variis tropis & figuris exornat, hæc demum facit, ut sermo eloquens ab omni alio dignita-

te

te & naturali pulchritudine distingua-  
tur . Omnes autem intelligunt , elocu-  
tionem ad oratores a poetis , ut Ari-  
stoteles ait , esse profectam . Quanquam  
enim non sit apud oratores & poetas  
eadem loquendi ratio , imo poetæ alia  
quadam lingua , ut Cicero affirmat ,  
loqui soleant , splendidam tamen uber-  
rimamque & verborum & sententia-  
rum supellectilem oratori poeta sup-  
peditat , unde oratio fiat ditior , & fi-  
guris veluti luminibus illustretur . At-  
que hinc est , quod Cicero in libris de  
oratore eloquentiæ candidatos tam sæ-  
pe serioque monet , ut meminerint se  
non oratorum tantum , sed & poeta-  
rum studio deditos esse debere . Et sa-  
ne quis non videt , omnem grandita-  
tem orationis , omnem peregrinam &  
a vulgari abhorrentem conformationem  
verborum , omnes figuras insigniores  
non ab alio scriptorum genere peti ,  
quam



quam a poetis ? Non est , quod longius , confirmandæ rei causâ , argumenta conquiramus . Satis est , ut unam , vel alteram M. Tullii orationem ad memoriam vobis revocetis , in qua non adumbrata , sed expressa poetarum vestigia conspicietis . Recordamini , si placet , gravissimam illam non minus ac festivam pro M. Cælio , quam anno superiore explanavimus . Agebatur causâ summis involuta difficultatibus , ac multis tricis implicata . Quæstio erat de veneno primariæ foeminæ a M. Cælio comparato . Tres urgebant Cælium accusatores acerrimi Herennius , Balbus , & Publ. Clodius homo furiosus , & Clodiæ sororis ultor infestissimus . Haud deerant graves de juvene M. Cælio suspiciones : aurum a Clodia commodatum , quod illi reddere tenebatur , immodici sumptus , æs alienum , ac præterea Catilinæ familia-

miliaritas, quæ ejus pudorem & famam attriverat. Oppugnabat denique Cælium foemina nobilis ac furens, quæ quantum adolescentis ipsius amore antea deperierat, tantum postea odio ac furore inflammata in illum ferebatur. At Cicero, Cælii defensione suscepta, convulsisque firmioribus objecti criminis fundamentis, ut hinc mulieris audaciam procaciamque comprimeret, illinc juvenis levitatem excusaret, & innocentiam tegeret, quot & quanta a poetis eloquentiæ subsidia collegit? Quid enim Appius ille cæcus ab inferis excitatus, quem ad Clodiam, tanquam Clodiæ gentis dedecus ac probrum, lepide simul & acriter insectandam coram judicibus loquentem sistit? Quid subtristis illa ac severa Cæciliani senis persona inducta, ut M. Cælium objurget, quod in nimiam Clodiæ familiaritatem se dederit, quod se in ejus  
vici-

viciniam contulerit, quod cognitis illius illecebris, ab ea domo pedem non continuo retraxerit? Quid postremo verba illa partim a Comicis, partim a Tragicis scriptoribus accepta, quibus ad ejusmodi personas vivis eloquentiæ coloribus exprimendas utitur? *Nunc enim demum mihi animus ardet: nunc meum cor cumulatur ira. O infelix, o scelestè. Egone quid dicam? Egone quid velim? Quæ tu omnia tuis fœdis fœtis facis, ut nequicquam velim: atque alia multa ex Cæcilio poeta usurpata, quæ quantum ornamenti & leporis orationi Cælianæ conferant, paucis explicari non potest. Et quod magis est, poeticis hujusmodi figuris & salibus respersa oratio tantum apud judices valuit, ut impudentissimæ foeminae moribus ad unguem expressis, omnem veneni suspicionem a M. Cælio amoliretur, atque illum judicio pericu-*

L

loque

loque liberaret. Neque mirum, si ea facilius persuadere solent, quæ magis delectant ac movent: qua in re nemo magis quam poeta valet. Quis enim melius tot tamque dissimiles animorum nostrorum motus effingit? Ubi profecto clarius, quam in scena videas alios iracundia furentes, alios amore insanos, alios contabescientes avaritia, aut luxu perditos, hos lætitia exultantes, illos metu pallentes atque suspensos; adeo ut nulla sit in communi vita perturbatio, cujus exemplum ab ipsa scena peti minime possit. Cum itaque opes & copias suas eloquentia in hoc maxime ostendet, ut mentes hominum, quo velit, facile impellat, quis non videt, quantum oratori ad causam obtinendam prosit, poetarum ipsorum virtutes persequi, eandemque concitandorum animorum rationem sibi comparare? Finitimus est, inquit Cicero,  
ora-

### ORATIO III. 83

oratori poeta , cujus virtutes omnes  
persequitur , cum numeris sit adstri-  
ctior , ornandique generibus socius ac  
pene par .

Atque hinc est , quod prisci rheto-  
res & eloquentiæ magistri Menandrum  
præcipue pueris lectitandum & ediscen-  
dum dabant , quo facilius poeticæ vir-  
tutis præstantiam & dotes eisdem in-  
stillarent , & expeditam ad eloquen-  
tiam viam sternerent . Quamobrem Dio  
Chrysostomus in oratione , quæ de  
exercitatione dicendi inscribitur , inter  
cetera suadet in primis , ut Euripidem  
Tragicum & Menandrum Comicum  
assidue in manibus habeamus , atque  
eos non legamus tantum , aut recite-  
mus ipsi , sed ut coram nobis suaviter  
& canora voce eorum versus pronuntia-  
ri jubeamus , cum certum sit altius a  
nobis penetrari solere sensus verborum ,  
cum a legendi molestia liberi sumus .

L 2

Quo

Quo facto quis non intelligit veteres dicendi magistros & styli magnificentiam & eloquentiæ splendorem & actionis ipsius dignitatem ipsa poetarum recitatione nobis sedulo insinuaré voluisse? Tanta nimirum est eloquentiæ cum poeticæ studio conjunctio, tanta oratorum cum poetis affinitas, ut sine his illi nullo modo consistere posse videantur. A poetis enim orator habet plene ac numerosè dicendi rationem, quod quidem non obtinet, nisi qui aures habeat in poeticis numeris diu tritas multumque exercitatas: a poetis sententiarum gravitatem ac splendorem verborum, quibus ita rem exornat atque illustrat, ut non tam illam audire, quam oculis intueri videamur: a poetis denique sublimioris styli majestatem, quæ audientium animos extra se quodammodo rapiat, & admirationem quoque ab invitis extor-

torqueat ; ut proinde qui de arctissimo cum eloquentia poeticæ vinculo dubitant , quasi de clarissima solis luce dubitare videantur . Quamobrem singulari Dēi Opt. Max. providentia resuscitantibus post diuturnum & luctuosum naufragium in Italia bonis literis , quid aliud operæ primum sibi sumpserunt , Valla , Philolphus , Bembus , alique plures immortalis memoriæ viri ad eloquentiam veteri splendori restituendam , nisi obsitas squalore ac rubigine musas abstergere , atque Apollini irato litare ? Ex quo factum est , ut sub idem fere tempus tot repente prodierint veluti ex equo Trojano viri , non minus in poetica , quam in arte dicendi præstantissimi ; ut quis utra magis excelleret , haud facile dijudicari possit . Vix enim fuit quisquam per ea tempora alicujus nominis doctrina & eloquentia clarus , qui simul poeta egregius

non

non esset, cujus non exirent in lucem una cum soluta oratione varii generis carmina, hymni, elegiæ, poemata, quorum bona pars ad nostram usque ætatem pervenit, adeo ut Lilius Gyraldus, inito ætatis suæ poetarum calculo, duos libros impleverit. Intelligebant quippe viri sapientes, neglecto poetarum studio, nullum neque ad eloquentiam, neque ad omnem sive Græcam, sive Romanam eruditionem aditum sibi patere, cum infinita fere sint antiquitatis mysteria, quæ tum Græcorum, tum Romanorum in carminibus latent poetarum. Sed paulatim eo me dicendo abreptum video, unde nec facile, nec brevi emergere possit oratio; si nimirum dicere aggrediar, quanta sit non modo cum omni antiquitatis eruditione, sed cum ceteris quoque clarissimis disciplinis poeticae facultatis societas atque conjunctio. At  
nolo



nolo extra ostium limenque pedem efferre. Satis mihi erit, si humaniorum literarum & eloquentiæ studiis poesim maxime necessariam comprobavero.

Vos itaque, Adolescentes optimi, jam intelligitis, quanti æstimare debeatis poeticæ disciplinæ studium, poetarumque lectionem. Continet illa purioris latinitatis succum & sanguinem: continet elegantiores dicendi venteres, continet masculæ eloquentiæ robur & dignitatem. Non desunt in poetis verborum splendor & sententiarum gravitas, quibus oratio sublimior incedat: non desunt jocandi lepos, sales ac facetiæ, quibus sermo quandoque condiatur. Inest illis antiqui incorruptique sermonis venustas & gratia, quibus dotibus dialogi, epistolæ, aliaque scribendi genera magnopere commendantur. Postremo ad omnem antiquitatis intelligentiam facem vobis poetæ præse-

præferunt . Sublatis enim de medio poetis , quam pauca nobis essent explorata atque comperta de moribus , de ritibus , de religione veterum Romanorum ? Quanta nos lateret rerum innumerabilium scientia , quam posteritatis memoriz poetarum carmina tradiderunt ? Proinde si vobis cum in his , tum in aliis optimis studiis excellere cordi est , si præ ceteris eloquentiæ dignitas vobis arridet , nolite de sinu poetas unquam abiicere , nolite poetarum studia diu noctuque intermittere : brevi multos ingentesque fructus inde vos percepisse cognoscetis .



DE

## DE PRÆMATURA

INGENII SUI OPINIONE

## ORATIO IV.

*Habita Idibus Novembr. MDCCXXXIV.*

NIMADVERTI saepe,  
 P P. amplissimi, optimis  
 disciplinis magis condu-  
 cere hodierno die præfa-  
 ri quidpiam, quod ad ea-  
 rum progressum & incrementum refe-  
 ratur, quam ad ipsarum laudes novo  
 aliquo & singulari argumenti genere  
 celebrandas orationem adornare. Quis  
 enim hoc tempore adeo rudis & impe-  
 ritus existit, qui non intelligat, quan-  
 tus sit literarum splendor, quanta di-  
 gnitas & amplitudo? Quis animo non  
 comprehendit & maximas utilitates ex

M

lite-

literis in hominem derivari, & voluptatem incredibilem ex earum studio percipi, & immortalem nominis gloriam ex illarum usu comparari? Hæc profecto omnes intelligunt, sciunt omnes. Ignorant tamen non pauci homines, adolescentes præsertim, impedimenta plurima literarum studiis adversari, quæ cupientibus progredi iter retardant, ac remorantur, vel etiam, omnino intercludunt. Proinde fyrtes hujusmodi & scopulos juventuti studiis deditæ præmonstrare valde expedit, ne illis incauta adhærescat, ac naufragium miserrimum faciat. Neque vero hodie mihi mens est, omnia dicendo persequi, quæ literarum cupidis magno studio declinanda esse intelligo: infinita enim susciperetur oratio, quæ & usitatæ brevitatis modum excederet, & nimis patientia vestra abuti videretur. Sed unum ex multis seligam, quod tanquam

quam studiorum omnium pestis & labes velis remisque fugiendum esse puto: opinionem dico illam, quam quis habet de suo ingenio, literis & doctrina præmaturam. Hanc sane studiosæ juventuti inimicam, hanc ingeniis infestam esse maxime judico. Proinde vos, Adolescentes optimi, quorum causa potissimum agitur, adeste animis, dum ego pro virili parte adnitar vobis ostendere, nihil esse discantibus immatura hac doctrinæ opinione perniciosius, nihil idcirco vobis majore cura studioque cavendum.

Et quidem cogitate mecum, Auditores, quanta sit cujuscunque disciplinæ amplitudo: in quem late patentem campum excurrere debeat is, qui vel in una scientia sibi primos ordines ducere proposuerit. Multa revera sunt, quæ in tanta librorum ubertate exquirenda occurrunt: multa, quæ ad cri-

M 2                      ticæ

ticæ normam expendere, multa, quæ recto judicio accuratoque examine dijudicare necesse est. Tot vero tantisque tenebris veritas involuta delitescit, tam abdita, tam recondita, & ab oculis nostris tam longe recedit, ut qui illam in profundum demersam puteum finxerunt, nil verisimilius fingere potuisse videantur. Verum quo clarius id, quod dicimus, in una aliqua facultate, quasi coloribus expressum videatis; ponite vobis ante oculos præstantissimam medicinæ scientiam, cujus sive dignitatem, sive usum, sive necessitatem spectemus, ea certe est apud omnes gentes disciplinarum omnium maxime exculta. At vero quæ & quanta, Deus immortalis, bonarum artium, rerumque varietas præcognita esse debet homini medicam artem profitenti? Si quis secum reputet, quam diversa sit constitutio corporum, quanta hominum

num ex ætate, sexu, loco, coelo, educatione, consuetudine, studiis. dissimilitudo, quot & quam contraria ex contrariis & pugnantibus causis morborum genera, quot febrium classes, quot denique mortis casus; facile intelliget, medendi artem opus esse difficillimum, ingenio hominum majus, & quasi divinum. Proinde nisi ad illam quis Græcarum literarum scientia instructus accedat, nisi physica bene didicerit, nisi humani corporis fabricationem, singularum partium texturam usumque noverit, nisi sanguinis humorumque naturam, vim motumque perceperit, nisi demum morborum causas, & medicamentorum vires satis exploraverit, is maturandæ potius necis, quam salutis reparandæ auctor existet. Quo factum est, ut homines ingenio ac doctrina præclari tot ætates in corpore humano ejusque partibus perscrutandis delu-

desudaverint , ac de mirabili earum  
structura , de morbis eorumque cura-  
tione infinita prope volumina postero-  
rum memoriæ reliquerint . Etenim ne-  
gari non potest , præter Hippocratis &  
Galenī labores prope immensos , præ-  
ter Avicennæ aliorumque Arabum vi-  
gilias , ad artem medicam plurimum  
lucis ex assiduo recentiorum medico-  
rum studio atque industria accessisse .  
Nam & lacteas venas Asellius , & ori-  
ginem nervorum Varolius , & Eusta-  
chius renum , & Vesalius œsophagi  
glandulas invenerunt . Investigavit Ver-  
fingius ductum pancreaticum , thoraci-  
cum vero Pequetius . Præterea Harvejo ,  
seu potius Andreæ Cifalpino debemus  
sanguinis periodum , Borellio motum  
musculorum , Malpighio pulmonis , Bel-  
lino renum structuram & usum , atque  
aliis alia sexcenta . Verum quid postea ?  
Si verum fateri volumus , hæc omnia  
cer-



certe paucissimis morbis curandis sufficiunt ; & in tanta adhuc medicæ artis obscuritate versamur , ut per hos dies ille unus medicorum præstantissimus habeatur , qui medica facultate minus utitur , quique minima , aut fere nulla ægris medicamenta præscribit .

Hæc autem quæ aliquanto fufius de Medicina dixi , non modo de Philosophia universa , de Juris scientia , de Theologia , aliisque clarissimis facultatibus pari ratione dicta esse volo ; sed de iis quoque inferioris subsellii artibus , quæ si non dignitate , at certe amplitudine rerum , & discendi difficultate possunt cum ceteris disciplinis optime comparari . Nam si liceat quoque nobis in hoc quodammodo gloriarì , quot vigilias , quot labores , quot annos demum postulat latinæ linguæ subtilior intelligentia ac stylus ? Quam multa ac sedula historicorum , oratorum

rum ac poetarum præsertim lectione nobis opus est, ut omnem verborum latinorum vim, proprietatem & elegantiam comprehendamus? Quantum eniti, & toto, ut ajunt, pectore incumbere debemus, ut ad illam veram germanamque veterum latinam, unde longissime recessimus, propius accedamus? Dicam libere, Auditores, id, quod sentio, quanquam fortasse multis hoc, quod dicam, paradoxum genus videri possit: ad intimam plenamque notitiam atque usum latinæ linguæ integra unius hominis ætas vix satis est. Anne dubitatis? Legite, si vultis, ea, quæ de latino sermone diligentius annotarunt Laurentius Valla, Hadrianus Cardinalis, Ant. Schorus, Obertus Gifaninus, Franciscus Sylvius, Aufonius Popma, Godescalcus Stewchius, Franciscus Vavassor, Gaspar Scioppius, Jo: Vorstius, aliique viri literis & doctrinis  
ele.

elegantioribus clari: tum vero me, si potestis, de mendacio, aut de inani jactatione arguitote. Et tamen tam multi sunt hoc tempore, qui tantum sibi de perfecta latinitate tribuunt, ut a M. Cicerone sese haud longe abesse sibi ipsi persuadeant: quos nihilominus, nisi ego desipio, vix inter imi subsellii discipulos grammaticus ille Priscianus admitteret. Ego equidem de me illud ingenue fateor, etsi viginti fere annos in hoc Romano Gymnasio in poetis, historicis & oratoribus interpretandis operam meam, qualiscunque illa sit, collocaverim, & quotidiano prope usu latinam linguam recoluerim, adhuc tamen affirmare non ausim, me satis latine scire: cum singulis fere annis aliquid mihi novum de proprietate & elegancia latini sermonis, aut de germano sensu & intelligentia latinorum scriptorum occurrat, quod præterito-  
N
rum

rum quidem annorum studium & industriam fugerat . Hoc autem non tantum mihi ingenii mediocris homini usu venit, sed Camerario quoque, sed Lambino, sed Lipsio, sed Manutio, aliisque summis viris contigisse videmus, qui ad locupletissimos, quos jam pridem de Cicerone, de Horatio, de Cor. Tacito aliisque latinis scriptoribus ediderant commentarios, curas deinde secundas & tertias addere minime dubitaverint . Multa enim in illis evolvendis occurrunt rara, recondita, & paucitate scriptorum ejus ævi obscura: multa quoque ex non vulgatis ritibus, & vetustissimo jure repetenda, quæ diligentissimi cujusque viri acumen effugiunt . Quod si minora hæc studia sunt ejusmodi, ut plurimis annis, ac repetitis laboribus omnia vix intelligi atque explorari possint, quid demum erit de sublimioribus disciplinis

nis cogitandum? Cui tanta vis ingenii, cui tam acre iudicium, ut unico quasi haustu eas vorare, seque illis ingurgitare queat, cum præter immensam latitudinem, tantam quoque pleræque inter se habeant societatem, ut una ab altera divelli nullo modo possit? Quis enim bonus jureconsultus, qui in Græca & Romana antiquitate sit hospes? Quis in Ecclesiastica, vel in profana historia satis eruditus, qui Chronologiam & Geographiam bene cognitas & perspectas non habuerit? Quis demum in sacra Theologia satis versatus est, cui & divinarum literarum volumina & sacrorum Canonum leges & Ecclesiasticæ memoriæ annales familiares non sint? Profecto nemo negaverit id, quod & Plato & M. Tullius uno ore affirmant, disciplinas nimirum omnes miro consensu concentuque convenire, & quodam societatis vinculo colligari.

N 2                      Unde

Unde illud etiam consequitur, ut nemo unam perfectam & omnibus suis numeris expletam obtinere possit, qui ad alias quoque haud minore studio industriae non aspiraverit.

At dicet aliquis, complures sunt adolescentes peracuto ingenio, multaque intelligendi vi praediti, tum etiam divina quadam memoria instructi, qui res tam mira facilitate percipiunt, ut quicquid legerint, vel audierint, memoriter referant. Hi paucis quidem annis, nec multo labore ad summa pervenient. Ita sit sane. At poteruntne ingeniosi isti Minervæ filii ac salaputia diserta cum priscis illis sapientiæ parentibus Platone, Aristotele, M. Tullio aliisque hujus notæ præstantissimis viris solertia mentis & ingenii præstantia conferri? Fac ita esse. Videte quantum ipsis tribuo, ac plus nimio liberaliter concedo. Sint itaque cum antiquis

quis illis memoria, ingenio, tum etiam  
 iudicio pares. Verum minorene, quam  
 illi studio, minore industria, minore  
 labore doctrinam sese consequi posse  
 confidunt? O arrogantiam singularem.  
 Quod illi sibi pertinaci tot annorum  
 cura ac diligentia compararunt, tu a-  
 dolescens mollis & delicatus, tu ludis  
 & voluptatibus, vel etiam, si superis  
 placet, ventri somnoque deditus, uno  
 vel altero biennio obtinebis? Alio sa-  
 ne calculo majores nostri doctrinarum  
 studia cum propter earum præstantiam,  
 tum propter acquirendi difficultatem  
 æstimarunt. Septemdecim quidem an-  
 nos Platoni magistro Aristoteles operam  
 dedit. Unum & octoginta, quotquot  
 vixit, annos Plato ipse in studiis el-  
 boravit. Hippocrates vero hominum vi-  
 tam breviorē esse pronunciavit, quam  
 ut omnibus iis, quæ ad artem meden-  
 di pertinent, comparandis sufficeret.

Ni-

Nihil dico de M. Varrone, nihil de M. Tullio, nihil de utroque Plinio, nihil de Plutarcho aliisque innumeris, quos ad extremum usque vitæ spiritum in literis vixisse memoriæ proditum est. Et juvenes nostri tantum sibi ipsi tribuunt, ut perexiguo studio parvoque tempore in aliqua facultate excellere, & in ea familiam ducere sibi stultissime persuadeant? In magno sane errore versantur. Ego quidem sic existimo, homines istiusmodi opinione sui plenos nunquam veram solidamque doctrinam esse assecuturos. Cum enim opinio illa, quam de ingenio suo habent, ingentem sui fiduciam pariat, fiducia vero ista negligentiam studiorum, negligentia autem studiorum inscitiam, & ignorantiam, quid tandem bonæ frugis erit ex illis expectandum? Actum est profecto de studiis hominum istorum. Actum est de egregia eorum indole



dole ac fama. Perniciosa quidem atque exitialis ingenii sui opinio omnes industriæ nervos infringit, & præclaros ad laudem cursus intercipit. Proinde Bias ille unus ex Græciæ sapientibus ventosam istam sui opinionem vocabat maximum literarii profectus impedimentum. Cui recte illud Senecæ consonat: multi, inquit, ad doctrinam venissent, nisi ad eam se pervenisse putassent.

Quod si homines isti judicant, omnem hodie doctrinæ laudem librorum titulis & indicibus contineri; si virum apprime doctum putant eum, qui in eruditorum Lipsiensibus actis perlegendis curiosus, in amicorum coetu permulta recitat auctorum nomina, quæ quotidie ex diariis exterarum gentium ad nos deferuntur; quis non videt, quam in hoc turpiter hallucinentur? Librorum titulos & indices texere,  
non

non viri docti, sed eruditi bibliopolæ laus est. Profecto est aliquid altius supra scriptorum indices, quo contendere debeat is, qui inter doctos jure & merito sit recensendus. Nam aut ego fallor, aut is vere doctus dici potest, qui & perfecte loqui, & si quando opus sit, graviter & ornate sententiam suam dicere possit: qui veri & falsi cognitionem habeat, qui mente coelum, maria, terras permeare, qui naturæ vim & rerum causas cognoscere, qui abs se propulsare vitia, ac mores emendare, qui privatam domum regere, & rem publicam administrare optime noverit. Hunc ego literis bene instructum, hunc bonis artibus eruditum, unoque verbo, hunc hominem doctum esse judico. Quis autem non intelligit, ejusmodi doctrinæ laudem non ex librorum indicibus, neque ex Gallicis Batavisque diariis esse

esse petendam, sed improbo labore diuturnoque studio, quemadmodum maiores nostri fecerunt, comparandam? Sunt illa quidem, si vultis, relaxandis animis delectamenta studiorum, vel ad æstivorum dierum tædia minuenda, vel etiam ad somnum conciliandum soporifera, ut poeta inquit, papavera; non autem firma doctrinæ præsidia, neque nervi artusque sapientiæ, qui philosophum, aut theologum, aut juris scientem hominem faciant. Et quidem aliud fuit consilium, alia mens Romanorum Pontificum, hominum sapientissimorum, in hoc Romano Gymnasio ædificando, & in tot bonarum artium magistris in eo liberaliter constituendis. Voluerunt scilicet in his amplissimis sapientiæ sedibus gradatim, solideque juventutem erudiri, ut eloquentiæ & Philosophiæ studiis satis instructa, vel ad medicinam, vel ad juris

O

scien-

scientiam , vel ad sacras literas iter  
sibi præmuniret : quas deinde gravif-  
simas disciplinas sapienter docta , ci-  
vium saluti consuleret , fori dignitatem  
sustineret , aut Ecclesiæ magistratus  
cum laude susciperet . Et nos patiemur ,  
memoria nostra juvenes literis leviter  
tinctos , non medicos , sed humani ge-  
neris carnifices , non juris peritos , sed  
fori rabulas , non Ecclesiæ lumina , sed  
ignorantiæ maculas in publicum exi-  
re , & inanem Urbi omnium sapien-  
tissimæ doctrinæ speciem obtrudere ?  
O impudentiam minime ferendam . O  
vanissimam ingenii jactantiam . Vide-  
re jam mihi videor audaciæ ejusmodi  
exitum perridiculum . Componant se  
perquam eleganter , seque transforment ,  
quantum volunt : illud agent nimirum ,  
quod Æsopus fecisse Cumanum asinum  
narrat , qui , cum leoninam pellem  
induisset , quod se leonem videri cu-  
pie-

piebat, rudere tamen aspere incoepit, unde & adstantium risus, & domini baculum haud potuit effugere. Non aliter hujusmodi juvenes, qui propter immaturam scientiæ opinionem hoc sibi arrogant, ut pares doctis incedant, dum literati viri personam gerere volunt, se publico risui ac ludibrio hominum exponunt, cum non veram solidamque doctrinam, sed larvas & simulacra sibi inesse, asinina voce satis ostendant. Sunt enim Therſitis illius Homerici similes, qui cum mortalium omnium stultissimus quidem esset, multa tamen eloqui propter vanam sapientiæ opinionem solitus erat, unde magis ejus stultitia stolidumque ingenium appareret. Pudeat itaque, pudeat barbatus istos adeo se proferre, & ignorantiam suam tam insigniter prodere. Pudeat inter philosophos, inter jurisperitos, inter medicos intempestive

enumerari velle, cum earum artium, primordia vix summis labris gustaverint. Pudeat denique cum sapientissimis viris de doctrina & ingenio decertare, quorum diligentiam singularem, & omnem prope ætatem in studiis exactam non æmulantur. Multis annis multisque vigiliis nobis opus est vel ad unam optimarum artium ex omni parte assequendam & propter immensam earum amplitudinem & propter summam earum necessitudinem mutamque conjunctionem. Ex quibus omnibus id colligo: qui paucis annis paucisque laboribus sese ad doctrinæ laudem pervenisse putant, hi, aut quæ sit doctrinæ ratio, prorsus ignorant, aut nos amentes & nullius judicii homines esse judicant.

IN

IN SCIOLOS I.

## ORATIO V.

*Habita xv. Kal. Novemb. MDCCXXXV.*

ULLUM bellum fuit unquam tam atrox, tam diuturnum, aut periculosum, in quo duo hostes majore vi, aut acriore contentione decertaverint, quam illud, ubi cum optimis disciplinis ignorantia pugnavit. Etenim vix literæ exortæ sunt, cum statim invidia, livor, maledicentia, improbitas, aliæque nefariæ pestes, foedere cum ignorantia firmato, in illas castra movere, aciem dirigere, cum illis in certamen præliumque descendere non dubitarunt. Neque ex eo tempore foederis  
ul.

ullius feriundi, nec pacis constituendæ spes ulla affulsit. Nam qua ratione fieri possit, ut consilium cum temeritate, fortitudo cum furore, virtus cum audacia conveniat, pacatoque animo concilietur? Profecto quædum erunt literæ, tandiu erit literis indictum paratumque ab ignorantia bellum. Ex quo tamen tantum abest, ut quicquam mali sit ipsis literis metuedum, ut potius gloriæ cumulus illis quotidie major accedat. Quot enim cum ignorantia dimicationes, tot victorias, quot prælia, tot triumphos optimæ disciplinæ consequuntur. At vero aliud belli genus bonarum artium studiis pertimescendum esse video: quod quidem etsi primo aspectu minus periculofum esse videtur, revera tamen gravissimum est, maximeque perniciosum: illud scilicet, quod scoli quidam, homines doctrina leviter aspersi, lite-



literis inferunt , dum literas colere ,  
literas amare , literas in deliciis sese  
habere profitentur . Ex istorum enim  
imperitia fit , ut de dignitate literarum  
plurimum detrahatur , & ab eorum  
amentia magis , quam ab ignorantia  
telis liberales disciplinae metuere de-  
beant . Hæc autem calamitas cum  
major in dies fiat , literarum reipublicæ  
maxime interesse video , ut hominum  
istiusmodi temeritas reprimatur , quo  
minus in posterum literas ipsas oppu-  
gnent . Quare veniam dabitis , PP. am-  
plissimi , si prætermittis hodierno die  
bonarum artium laudibus , quæ quot-  
annis ex hoc ipso loco decantari con-  
sueverunt , illud agam potius , ut hu-  
iusmodi homines semidoctos coram  
vobis sistam , acriter de eorum insci-  
tia & singulari amentia coarguendos .  
Intelligetis profecto id , quod res est ,  
ex sciorum istorum vitio plus detri-  
men-

menti literas capere, quam ex summa imperitissimorum hominum ignavia. Atque una mecum statuetis, sedulo Romanam juventutem esse admonendam, ut ab ejusmodi pernicie sibi caveat, hominum istorum mores & disciplinam fugiat, eorumque scientiam inanem & umbratilem, ignorantia ipsa longe deteriorem, quantum potest, aversetur. Quo consilio nihil optimis studiis conducibilius, nihil sapientissimis viris, qui me audiunt, jucundius accidere posse confido.

At in ipso dicendi limine quid ignorantiae tela ad optimas artes evertendas valuerint, animadvertere operæ pretium est. Non privatos, non exiguae auctoritatis homines in medium afferam: sed viros principes, summa imperii potestate, auctoritate maxima, furore atque armis metuendos, qui honestissimas disciplinas radicitus extirpa-

tirpare, earumque memoriam sempiterna oblivione delere summa vi contenderunt. Ecce vobis C. Cæsar Caligula, homo vecors & stolidus, qui divina Homeri & Virgilii carmina comburere, aurea T. Livii scripta funditus perdere, eorumque imagines ex bibliothecis omnibus, ubi asservabantur, evellere conatus est. En Domitianus Cæsar, celeberrimus ille muscarum auceps, qui sapientiæ odio, philosophos omnes ex Urbe eiecit, totaque jussit Italia exulare. En Licinius imperator, literarum sic rudis & imperitus, ut ne decretis quidem manu sua subscribere posset: literis omnibus adeo infestus, ut eas reipublicæ pestem & venenum appellaret. Quid tandem isti literarum osiores atque hostes infensissimi profecerunt? An de veteri illarum existimatione & gloria putatis quicquam eos unquam detrudere potuisse?

P

Pro-

Profecto illud unum sunt assequuti ,  
ut acerbissimum sibi mortalium odium  
conflaverint , ac sese omnium ætatum  
exprobratione , omnium annalium vi-  
tuperatione dignissimos effecerint . At  
enim negari non potest , adversante  
fortuna , eruditos plurimos inimicorum  
telis misere occubuisse , diraque fati a-  
cerbitate fuisse sublato . Quot enim exi-  
lio & inopia oppressi ? Quot ferro miser-  
ime trucidati ? Quot denique ad illud  
calamitatis extremum adacti , ut ultro  
sibi mortem consciscerent ? Extant qui-  
dem , extant Pierii Valeriani , Corne-  
lii Tollii & Josephi Barberii de litera-  
torum infelicitate volumina , quæ sex-  
centa testantur clarissimorum virorum  
funera , luctuosa quidem & acerbissima .  
Quid tum ? Anne ex tot tantisque li-  
teratorum ærumnis imminuta est ali-  
qua ex parte dignitas literarum ? An  
exilium , carcer , secures , aut aliud cru-  
deli-

delitatis genus extinguere potuit divina eorum ingenii lumina, atque æterna doctrinæ monumenta? Vivit, semperque vivet immortalis ipsorum gloria, singularis sapientia & incredibilis virtus. Quare jam intelligitis, Auditores, quam parum sit optimis disciplinis ab ignorantia, ab invidia, ceterisque adversæ fortunæ calamitatibus metuendum.

Contra vero quanta labes, quanta pestis literis ex sciolis & semidoctis hominibus enascatur, quis dicendo paucis explicare possit? Ego quidem illud persuasissimum habeo, quicquid invidiæ, quicquid turpitudinis, aut maculæ in literis ab earum hostibus confingitur, aut etiam in illis (dicam enim libere quod sentio) jure reprehenditur, id totum ab sciolis istis proficisci. Sed placet ante definire, quid sint homines istiusmodi. Sunt profecto scioli genus

hominum impudentissimorum, qui contracta fronte & ore duro se scire prædicant, quæ revera ignorant; aut in iis, quæ sciunt, paucis longe omnium scientissimi videri volunt: qui scilicet in bonis artibus & doctrinis se triarios, duces & imperatores venditant, cum nihilominus vix inter gregarios milites numerari queant: homines quidem audaces, garruli & gloriosi, qui scientiæ, qua carent, ostentatione conantur inanem doctrinæ famam aucupari; & quod deterrimum est, viros sapientia & doctrina claros aut contemnunt, aut maledictis & obrectationibus insectantur. Fingamus ergo ex istis aliquem in gravissimorum hominum cœtum, vel academiam sese intulisse. Quanta; Deus immortalis, ingenii ostentandi cupiditas? Quantum omnigenæ eruditionis affectandæ studium? Quanta demum ceteris contradicendi arro-

arrogantia? Nullus est in Græcis, vel in Latinis scriptoribus, de quo iste iudicium ferre, ac veluti prætor de tribunali pronunciare non audeat. Ex quibus illum nullo fuisse ingenio, alium nulla eruditione, hunc Criticæ artis expertem esse audacissime affirmat. Quid enim Aristoteles? Stulta ejus methodus, insulsa illius doctrina, homo denique rerum omnium imperitus prædicatur, quo recentes philosophi plura inter dormiendum intellexerunt. Quid Horatius, aut Virgilius? Nihil in his sublime, nihil excelsum, sed humi reptant puerorum similes, qui primo in scholis versus facere discunt. Putatisne, Auditores, me quicquam fingere, aut rem verbis exaggerare? Nequaquam. Exemplo vobis sit Joannes ille Ciampolus, ætatis suæ sciolorum facile princeps, qui, ut in Pina-cotheca virorum illustrium Janus Ni-cius

cius Erythræus memoriæ prodidit, cum die quodam per urbem rheda veheretur cum Gaudentio Paganino, viro docto & gravi, qui tum in hoc ipso Romano Gymnasio literas Græcas docebat, una cum aliis eruditis hominibus; cumque forte, ut fieri solet, sermo de Virgilio & Horatio incidisset, Ciampolus ita acriter coepit in præstantissimos illos auctores invehi, ut eos nullo ingenio homines, nulla doctrina, nullis literis fuisse diceret; imo quod ad carminis attinet inventionem, esse puerorum similes, qui primo in scholis versus componere incipiant. Quod Paganinus cum ferre non posset, stomachatus scioli audaciam immanem atque intolerandam, de rheda statim desiluit, auresque suas diris illis, ut ipse agebat, maledictis eripuit. Nec minore sane impudentia fuit sciolus alter, Belmontes Cagnolus, homo ventosissimus, qui



qui cum Etrusco carmine cecinisset Aquilejæ urbis excidium, clarissimis illis duobus Etruscæ poësis luminibus, Francisco Petrarca & Torquato Tasso se longe superiorem prædicabat, nomenque suum inde per totum terrarum orbem sic celebratum esse sibi persuaferat, ut si literatus quispiam adveniendi sibi continuo non assurrexisset, iracundia elatus exclamare so-  
leret: itane? Abbas Cagnolus eversæ Aquilejæ & tantorum carminum auctor tuam potuit notitiam effugere? Non est verisimile. Arrogantiam, aut stultitiam potius singularem sciolorum ejusmodi si non superavit, at certe æquavit. Bassus Juris consultus, qui, ut Saldenus auctor est, tantum sibi tribuebat, ut Alciatos, Cujacios, Hottomanos, aliosque hujusmodi præ se omnes contemneret, atque jactaret a se uno esse animadversum, quod multis  
 Jam

jam seculis universos latuerat. Studiosus lector (en gloriosi militis oratio) hanc nostram doctrinam diligenter animo infigat, quia etsi trecentos in doctorum scriptis evolvendis palleret annos, nihil simile, ac tam solidum in hac materia est deprehensurus. Audistis sapientiam hominis divinam & incredibilem? Cum Minerva ipsa, puto, de justitia & jure sermonem habuit; unde omnem ceterorum anteaetæ ætatis scientiam tam longo potuit intervallo superare. Accipite nunc medicinæ Deum, sive Æsculapium alterum de cælo delapsum, Theophrastum scilicet Paracelsum, qui se doctrina medicos omnes maximis spatiis anteire putabat, imo sapientem medicum, præter se unum, in terris existere neminem: proinde palam affirmare non dubitavit, stultissimum capitis sui pilum plus scire, quam omnes Galeni sectatores; imo

imo barbam suam plus experimentorum habere, quam omnes quotquot essent academix. O intolerandam hominis arrogantiam. O stultitiam incredibilem. Adeone circulatores isti putant omnes homines usquequaque desipere, ut nugas suas illis se tanti vendere posse arbitrentur?

Age vero jam aliquem ingenii sui fatum in lucem proferant. Missos faciam librorum titulos jactantiæ plenos & gloriosos, plerumque e Græcis fontibus exquisitos, qui magna & ampla pollicentur, quos olim A. Gellius in quibusdam ætatis suæ sciolis risit. Nihil loquar de præclaris virorum illustrium testimoniis undique conquisitis, quæ operi præfiguntur, quo major illi dignitas & auctoritas concilietur: perinde ac si ejusmodi elogiis fidem ullam viri sapientes & docti habeant. Verum ex tam magnifi-

Q co

co angustoque vestibulo quid tandem intus latere conjicietis? Scilicet stulti ad cribrum. Simia profecto, simia est, etiamsi phaleras, atque aurea insignia gerat, quemadmodum veteri proverbio dicitur. Etenim quid literis ex cultum, quid doctrina perfectum ab iis expectes, quorum immatura studia satius nonnisi informes atque monstrosos parere possint? Recordamini, quaeso, Auditores, delubra illa apud Aegyptios celeberrima, de quibus in dialogis Lucianus meminit. Erant illa quidem e marmore pario strata cum amplissima porticu, plurimis columnarum ordinibus distincta, aureo laqueari ornata, omnia denique auro gemmisque affabre contexta collucebant, & cum majestatem, tum religionem habebant. Quid vero tandem in interiore ejus templi adyto reconditum fuisset censetis? An Jovis, an Mercurii,  
an

an Veneris, aut numinis cuiuspiam alius  
fignum? Minime vero. Sed erat ca-  
nis, aut simiæ calvaria, aut muris ali-  
cujus ex ossibus compago. Nolo istos  
sciorum libros granditate titulorum,  
atque elogiorum apparatu splendidos  
cum inanissimis ejusmodi templis com-  
parare. Vos ipsi, an recte conveniant,  
judicatote. Ceterum nemo vestrum  
ignorat, quam lepide, & ad rem no-  
stram apposite Horatius in sermone ad  
Pisones illos irrideat. Parturient, in-  
quit, montes, nascetur ridiculus mus.  
Et quidem sollertissimas nugas, ut Se-  
neca loquitur, quæ vix somnianti in-  
mentem venerint, comminiscuntur, ut  
aliquid novum, & antea non auditum  
invenisse videantur. Supervacaneum  
puto rem sole ipso clariorem argumen-  
tis longe petitis illustrare. Volumina  
sane plurima, quorum copia in dies  
obruimur, hanc ipsam rem satis aper-

te testari possunt. Quot enim in illis insulsa, quot negligentiae & erroris plena, quot etiam omnino ridicula, quæ viris doctis stomachum movent, continentur? At vero unum ex hoc genere tacere nullo modo possum: Gaspar Knittelius, literator in Germania festivissimus, librum edidit, cui titulus, regia via ad omnes artes & scientias, in quo ex primo Æneidos Virgilianæ versu, ille ego qui quondam gracili modulatus avena, qui ut videtis, septem dictionibus, seu vocibus constat, septem sibi argumenta suppeditari affirmat ad virtutem humilitatis celebrandam. Miramini divinum hominis ingenium? Quid, si Thraso iste, literarius in eodem libro gloriatur, nullum sibi argumentum posse proponi, de quo ipse aptam dicendi materiam capere non possit ex quocunque verbo, ex quacunque voce, aut etiam  
e qua-

e qualibet re sibi casu oblata? En quo pervenit sciolorum audacia. Literis tanquam præstigiis abutuntur ad incautos adolescentes decipiendos, quibus nugas & gerras hujusmodi venditant. Et quisquam dubitabit, quin ex circumforanea librorum istorum vanitate infamia literis confletur, & nugatorum ejus generis vitio optimæ disciplinæ corrumpi atque contemni soleant?

Sed utinam præter libros stultitiæ plenos, faxis quoque ipsis & lapidibus ne hæreret literarum macula. Pudet me, pudet nostrorum temporum, quoties ambulanti mihi per Urbem inscriptiones aliquæ marmoribus nostræ civitatis insculptæ in oculos incurrunt: quæ si cum iis comparentur, quas olim Panvinus, Marlianus, Gruterus, Fabrettus, aliique plurimi Romanarum antiquitatum studiosi viri ex rudерibus antiquæ Urbis in volumen congegserunt,

levi-

levitatem plane sapiunt puerilem atque infantiam . Ea quippe est sciorum natura atque consuetudo , ut ad eas res conficiendas se ipsi inferant atque intrudant , suamque operam ultro venditent , in quibus ipsi minus valent , magisque cæcutiunt . Quorum impudentia fit , ut posthabita doctissimi cujusque opera , homines lapicidina digni ea lapidibus inscribant , quæ nemo antiquarius intelligat . Ex quo illud sequitur , ut in summa , quæ nostræ ætatis est , literarum dignitate & elegantia , in urbe Roma barbaries Gothica adhuc dominari videatur .

Quod si de scientia aliqua , si de naturali Philosophia , de Medicina , de Geometria , aut de Jurisprudencia ad scribendum aggrediantur ; quot , Deus immortalis , absurda , quot deliria , quot canoras nugas , ut ait Horatius , confingunt , ut doctrinæ novitate , & fin-



singulari intelligendi acumine veteres sapientiæ magistros satis longo intervallo superasse videantur? Pervulgatæ quidem sunt nimis quæstiones illæ de quarta parte nihili, & de plusquam nihilo, in quibus Demonstius & Bouvellius tantopere desudarunt, & ampla volumina conscripserunt. Extant libri de quadratura circuli, quam quidam ætate quoque nostra somniant. Extant de philosophorum conflando lapide innumera pene volumina, quæ nobis Croesi divitias & montes aureos pollicentur: quanquam tot seculorum experimento constat, artem illam esse sciolorum inventum, meras fabulas, & inanem mentis delirationem. Extant denique commenta divinationum, quibus circulatorum isti ex ascitis syderum & planetarum influxibus, eventus rerum futurarum se prælagire posse affirmant, & Arithmetice quibusdam figuris

guris arte constructis, in errorem pertrahunt homines imperitos & credulos. Quid plura? Typis excusa fuit jampridem Strozii Ciconiæ Vicentini philosophi & theologi disceptatio de similitudine & sympathia, quam habent cæli Potestates cum Sole, Principatus cum Venere, Archangeli cum Mercurio, Angeli cum Luna. Potestne stultius dici, aut excogitari quicquam? Quid, per vestram fidem, beatissimi illi spiritus, quales Archangeli sunt, cum Mercurii sydere, quid Angeli cum Lunari corpore commune habent? Possem profecto per singulas ire disciplinas, quibus isti ineptiarum venditores abutuntur; & jamdudum stultitiam suam mirum in modum celebrarunt. At præstitit id amplissime paucis ante annis in Germania Jo: Burchardus Menkenius, homo eruditorum nemini ignotus, qui duabus declamationibus in Lipsiensi academia

mia habitis, infinitam fere semidocto-  
 rum istorum multitudinem veluti in  
 scenam quamdam produxit, eorumque  
 de singulis deliramenta disciplinis, di-  
 gna sane, quæ in scena spectentur, lu-  
 culenter exhibuit. Utinam aliquan-  
 do aulæo sublato, novi ne prodirent  
 in scenam literarum circulatores eodem  
 theatro dignissimi. Utinam hanc tan-  
 tam maculam, & sempiternæ turpitu-  
 dinis notam in Germania tantum, id-  
 que semel, præstantissimæ artes susce-  
 pissent. Sed quantum jam Italiæ de-  
 decus, quanta clarissimæ huic Urbi ex  
 sciorum frequentia labes infertur,  
 quorum vitio præstantissimæ disciplinæ  
 veluti in theatrum & per ora vulgī  
 turpissime traducuntur? Nolo rem in-  
 vidia plenam ulterius persequi: nolo  
 quemquam nominare. Quare nemo mi-  
 hi, ut de se olim M. Tullius affirmabat,  
 irasci poterit, nisi qui ante de se vo-  
 luerit confiteri.

R

Jam

Jam igitur plane perspiciatis, Auditores, ab sciolis istis & semidoctis plus detrimenti literis importari, quam ab iis, qui in summa literarum ignorantia versantur. Plus certe periculi metuendum ex hominibus semiebriis, quam si vino somnoque sepulti omnino sensibus destituti jaceant. Detrahat imperitus quispiam literis, quantum volet, easque conviciis & maledictis petulanter proscindat: quotus quisque erit, qui stolidi hominis clamores non aspernetur, contemnat, negligat? Quis enim cæcum audiat de coloribus judicantem? Enimvero fucata illa semidoctorum literatura, audax & prompta garriendi licentia, honestis etiam viris bene multis imponit; atque id sæpe efficit, ut optimæ artes invidiæ malevolorum, & obrectationibus pessime subjiciantur. Maxime vero si literarum præmia, si dignitates  
atque

atque honores ab insulis ejusmodi nebulonibus, quod aliquando accidit, occupari videantur. Quæ cum ita sint, cavete, Adolescentes optimi, ( vos enim potissimum spectat hæc omnis oratio mea ) cavete, inquam, nefarios istos sapientiæ proditores, cavete improbos literariæ reipublicæ hostes, doctrinæ eversores, portenta bonarum artium, busta omnium disciplinarum. Si vobis sapientia cordi est, si literas vere amatis, si literarum gloria studioque ducimini, perniciosam istam sciorum sectam, quantum valetis, pro viribus fugite, eorumque miserrimam & inanissimam literaturam contemnite: habetis in hoc Romano Gymnasio viros sapientissimos, omni disciplinarum genere exultos: hos magistros, hos sapientiæ parentes sequiminor. His ducibus expeditum vobis patebit iter ad veram solidamque doctrinam.

R 2 IN

## ORATIO VI.

*Habita VII. Idus Novemb. MDCCXXXVI.*

UERUNTUR multi, & nos quoque ex hoc amplissimo loco anno superiore conquesti sumus vehementerque doluimus, cum in Italia, tum in hac civitate, ingenti literarum probro, sciolorum sectam in diem magis magisque propagari. Exposuimus enim vobis quam planissime potuimus, plus detrimenti per huiusmodi sciolos, quam per summam imperitorum hominum ignorantiam bonis literis importari: neque ullam esse labem graviolem, aut pestem rei literariæ magis metuendam, quam

quam fucatam illam & inanem semidoctorum literaturam, unde optimæ artes invidiam subeunt incredibilem, & ad ignominiam turpiter traducuntur. Quæ omnia vos ore, vultu & admurmuratione ita comprobastis, ut nemo non intelligeret, sciolos ejusmodi nulla ratione comperendinari debere, sed statim a literaria republica procul esse amandandos. At vero cum temporis, quod dicendo præfinitum fuerat, angustia non permiserint, ut ea in medium afferrem, quæ ad infectum illud bonis artibus genus hominum prorsus exterminandum maxime faciunt; sapientes quidam viri auctores mihi fuerunt, ut hodierno die alteram orationis partem, vel aliam potius ex integro de sciolis orationem contexerem, quo nimirum omnes intelligant, ex quonam fonte pestis illa manaverit, & quibus tandem uberibus nutria-

nutriatur. Etenim ego sic existimo, nostro potissimum vitio in scholis sciolos ejusmodi pullulare, nostris manibus, nostroque sinu eosdem foveri. Quocirca si quid acrius, aut quid liberius dixerò de prava studiorum ratione, quæ cum sciolis istis maxime conjuncta est, peto a vobis, PP. amplissimi, ut tantum orationi meæ hodie concedatis, quantum & veritatis amor, & literarum dignitas postulare videbuntur.

Duo sunt hominum genera, quorum vitio præfertim, quantum ego intelligo, perniciofa ista sciorum natiō alitur, & magis in dies corroboratur. Unum eorum, qui teneris adolescentium animis immodica laude, plausuque blandiuntur: alterum eorum, qui ceteras, præter eam, quam ipsi profitentur, disciplinas nihili faciunt, ac veteres doctrinæ magistros tan-



tanquam mediocris, aut nullius ingenii homines parvi pendunt ac vituperant. Quocirca quantum illi inepte, & imprudenter, tantum hi malitiose & improbe agere videntur, cum illi ætati magnam laudem sapientiæ non sustinenti plus æquo tribuant; isti majorum gloriæ detrahere, & quæ ipsi ceterarum artium ornamenta non sunt affecuti, aliis invidere non erubescant. At vero ut de iis primum loquar, qui plus laudis, quam par est, adolescentibus tribuunt; si id faciunt, ut plausu illo juvenes excitati, tanquam generosi equi, studiorum cursum alacrius prosequantur; excusandi sunt quidem, imo & eorum industria valde commendanda: præsertim si cum imbecillis & exsiccis ingeniis agere debeant, ad quorum tarditatem incitandam maxime valet præceptoris humanitas & industria. Quod si acri mente & peracuta intelli-

telligendi vi præditi illi sint, adeo ut nullo negotio omnia penetrarent, minimoque ad discendum labore utantur: errant profecto, errant, qui eosdem nimium laudando palpant, eorumque omnia sine ullo discrimine & inepte probant. Non opus est laudibus, sed novis ad laborem calcaribus, & aliquando severitate vultus & vocis gravitate sunt castigandi, ne molliore industria otioque depravati torpescant. Sæpe enim fit, ut juvenes partim naturali levitate ducti, partim præceptorum plausu inflati, se plurimum scire putent, & doctrinæ mediocritate contenti, ultra progredi minime curent. Quamobrem Carneades, vir sapientissimus, affirmare solebat, divitum regumque liberos nihil magis, aut tam cito, quam equitandi artem addiscere, propterea quod literarum magistri illis adulari, & quicquid fecerint, incæ-

cælum laudibus extollere soleant. Contra vero equus, qui nihil divitem a paupere, nihil principem virum a privato discernit, quemcunque ex illis aut oscitantem, aut equitandi imperitum sentiat, respectu nullo præcipitem agit, redditque in posterum follertiolem. Et plane, si vera fieri volumus, ita natura comparati sumus, ut unusquisque fere philautia, ut Græci loquuntur, laborare videatur. Ex quo fit, ut plerique sibi multo majora de suo ingenio tribuant, & gloriolæ suavitate titillentur. Imo plures invenias cum ætate, tum sapientia viros gravissimos, quos neque auri argentique cupiditas, neque aliqua dulcedo voluptatis, neque doloris vis, aut mortis ipsius terror de statu dejicere, aut commovere possit, quam quos laudis amor & vana ingenii sui fiducia non seducat atque per-

S

ver-

vertat : adeo ut quantum roboris & virtutis, ceteris animi motibus resistendo, sibi inesse palam fecerunt, tantum imbecillitatis parvique animi, inanis gloriæ præstigiis cedendo, demonstra-  
verint. Atque hinc sæpe inter literatos magni nominis de syllaba, aut de dictione una ortæ sunt contentiones acerbissimæ ac tragædiæ, quod alter alteri ingenio cedere rem turpissimam, judicaret. Quæ cum ita sint, cui mirum videatur, quod laudis plaususque amor adolescentes improvidos decipiat, quibus tum ætatis, tum consilii inest maxima imbecillitas, quique in ceteris quoque rebus facile hallucinantur? Profecto laudum suarum dulcedine, veluti hamo decepti, se ingenio valere plurimum putant, sibi que deesse parum ad doctrinæ verticem assequendum : cum præsertim neque in literaria historia versati sint, neque animo  
com-

complectantur, quam longe lateque  
 disciplinarum amplitudo pateat, quæ  
 singulæ integram postulant & bene  
 longam hominis ætatem. Proinde illi  
 quasi portum jam teneant, pristinum  
 laborem remittunt, ac de re nulla  
 minus, quam de studiis se sollicitos  
 esse ostendunt. En præclaram gloriæ  
 messem, quam inanes acclamationes &  
 plausus afferunt juventuti. Auctor est  
 Plinius, in Africa familias hominum  
 extitisse, qui voce & dictis fascinum  
 circumferebant: qui nimirum si forte  
 pulchras arbores, si segetes lætiores,  
 aut egregios equos, vel etiam infantes  
 pulcherrimos impensius laudassent, ea  
 statim exitiali fascinatione correpta mi-  
 sere interibant. Et vero hanc ipsam fa-  
 scini vim laudibus quoque inesse Roma-  
 ni olim suspicabantur. Quod nemo sa-  
 ne ignoraverit, nisi qui nec Virgilium,  
 nec Catullum, nec Ovidium, aliosque

poetas unquam viderit. Hinc enim mos ille inveteravit, ut quidpiam laudaturi, vocem *præfiscine*, vel *præfiscini* adderent: qua solenni formula se quidem non fascinandi, sed laudandi animo ea loqui testarentur. Verum de huiusmodi veterum superstitione iudicet, per me licet, unusquisque quod volet. Ego vero illud consuetudine usuque rerum compertum habeo, nobiliora adolescentium ingenia ab immodicis præceptorum suorum laudibus incredibilem calamitatem tabemque contrahere, neque ullum deinde inveniri ad eam pestem amoliendam in omni eorum vita amuletum. Etenim quid tandem est in omni disciplinarum genere subtilius, aut sublimius, quod illi vana sui opinione pleni, aut non statim, aut paucissimis horis sese addiscere posse arbitrantur? Ego quidem Romæ ex sciolis istis unum, multis præsentibus ætate ac doctrina

doctrina gravissimis viris gloriantem auctivi: nihil esse magis planum ac pedestre, quam Geometriæ studium: se paucis diebus, si vellet, magnum Geometram evasurum. Plaudebant adolescentis incauti dicto nonnulli, quibus Geometriæ ne prima quidem elementa cognita; viri autem docti qui aderant, puerilem ejus stultitiam vultus gravitate ac silentio castigarunt. Ex quibus nemo fuit, qui juvenis impudentiam nimiam ejus præceptoris assentationi plausibusque non tribueret. Quamobrem mirandum non est, quod veteres peritissimi instituendæ juventutis magistri, nihil diligentius curarent, quam ut insitam illi ætati garrulitatem comprimerent. Nemo vestrum ignorat, Pythagoram inter suos recepisse neminem, nisi diuturni silentii tirocinio probatum. Existimabat enim vir sapientissimus, nihil esse prius, quod discipu-

scipuli docendi forent , quam tacere .  
Hoc autem non uno , vel altero mense  
fieri , sed plerunque ad quinque annos  
illud prorogari consuevisse A. Gellius  
affirmat . Ea vero severitatis lege , ut  
qui tacerent , audirent quidem interim  
quæ ab aliis dicebantur , sed nec illis  
fas esset percunctari , si quid minus in-  
tellexissent , neque scribendo excipe-  
re , aut differere quæ audierant . Ubi  
vero jam duas res omnium difficilli-  
mas didicissent , audire ac tacere , tum  
demum illis verba facere , quæque au-  
dissent conscribere , aut quæ ipsi opina-  
rentur in medium afferre licebat . In  
hac ipsa quoque taciturnitate Lycurgus  
juventutem erudiri mandavit : proinde  
inter saluberrimas , quibus Lacedæmo-  
niorum rempublicam communivit , le-  
ges , haud postrema fuit , ut cives sta-  
tim a pueris silentio coercerentur . Po-  
steaquam vero adolescentes silentio sa-  
tis



tis instructi forent, tunc Arithmeticam, Geometriam, Musicam edocebantur, ut nobilissimis hisce disciplinis præmuniti, ad naturæ pulchritudinem contemplandam paratiores accederent. Neque deinde minore studio scientiam morum, justî & injusti rationem, differendi artem & eloquentiam addiscebant. Agite nunc, conferte, si vultis, nostram cum vetere disciplina institutionem. Illi quidem silentio, longaque meditatione juventutis animos in uberrimam doctrinæ spem enutriebant: nos garrulitate argutandique exercitatione. Illi numerorum scientia ac Geometricis rationibus puerorum mentes acuere atque excitare solebant: nos & fabellis & versiculis ad graviores disciplinas præparamus. Illi demum, longo maturoque studio ingenia exercebant: nos præcipiti festinatione eorum studia intercipimus, & immaturis

ris laudibus plausuque corrumpimus :  
Et mirabimur ex hujusmodi scholis  
tot quotidie sciolos exire, & a sciolis  
forum, curiam, rostra, subsellia per  
summum literarum dedecus occupari ?  
Ex illa tam delicata palæstra, ex im-  
portunis illis plausibus & acclamationi-  
bus quid aliud erat expectandum, nisi  
juventutis arrogantia, intolerabilis ani-  
mi tumor, miserumque naufragium ?

Venio nunc ad illos, quod erat al-  
terum, qui & veterum doctrinæ pa-  
rentum, & disciplinarum fere omnium,  
præter eam, quam ipsi profitentur, con-  
temptu, in sciolos augendos non minus  
operæ conferunt, quam qui eos festi-  
natis plausibus foveant. Cum superiore  
ætate sapientes quidam viri summa  
cum laude absterferint ea, quæ in Ari-  
stotelis philosophiam, aut barbarorum  
vitio irreperant, aut cum recentibus  
naturæ experimentis minime conveni-  
re

re videbantur, factum est, ut quasi perfractis philosophiæ repagulis, maxima sese effuderit philosophandi libertas; paucisque annis tot nova prodierint philosophorum cogitata, ut novitio cuique professori turpe videatur vestigia antiquorum premere, explosisque aliorum sententiis, nova non meditari. Hoc autem tanto veterum philosophorum contemptu fit, ut ipsi Philosophiæ parentes & quasi numina, Plato & Aristoteles, quos omnis antiquitas tantopere suspexit, & in cælum laudibus immortalibus extulit, jam tanquam homines natura stupidi, bardique per ora juvenculorum impudentissime traducantur. Qua quidem contumelia quid gravius, aut quid iniquius dici, aut excogitari possit, non video. Nam quis æquo animo ferat, Philosophiam in Platonis schola natam atque educatam, quæ tot ætates in universis fere

T

to.

totius orbis academiis una regnavit ,  
quam sapientissimi viri summo studio  
coluerunt , modo a barbatulis istis re-  
prehendi , quasi nihil solidi , nihil bo-  
næ frugis continentem ? Cui stoma-  
chum id non moveat , imperitos ado-  
lescentes audere homini tam petulan-  
ter obstrepere , quo M. Tullius nemi-  
nem doctiorem , & in rebus vel inve-  
niendis , vel judicandis neminem acrio-  
rem fuisse affirmavit ? Nullus autem non  
videt , hunc sciolorum fastum & superci-  
lium a præceptoribus istis originem du-  
cere , qui venerabiles illos sapientiæ pro-  
ceres parvi faciunt , ac sæpe etiam eof-  
dem voce scriptoque vituperant . At  
dicet aliquis , tu ergo nobis id vitio ver-  
tis , quod & Galilæum & Cartesium &  
Newtonum aliosque summos philoso-  
phos , germanos naturæ interpretes ,  
Aristoteli præferamus , cujus philoso-  
phia propter nimiam profecto obscuri-  
tatem ,

tatem & quæstiones quasdam leves ab omnibus jam fere deserta scholis exulavit? Ego equidem in ea sententia nunquam fui, ut in optimis quibusque disciplinis assequendis aliquo partium studio teneamur. Placuit mihi semper illud Aristotelis ipsius dictum, amicus Plato, amicus Socrates, sed magis ipsa veritas. Etenim si in physicis, aut metaphysicis rebus illustrandis, si in cælestium motuum doctrina explicanda, Aristoteli ipsi aliisque ejus ætatis philosophis, Cartesius, Newtonus ceterique hujus temporis sapientes viri perspicuitate & inventis præstiterunt, auctor ego sum, ut hos sequamur, hos complectamur, hosque in sinu oculisque feramus. Quod autem reprehendendum & nullo modo ferendum esse putò, illud profecto est, quod antiquorum doctrina, qualiscunque demum ea sit, cujus quidem fundamen-

tis exædificatum est quicquid boni ac præclari recentiores philosophi nobis tradiderunt, levitatis & infantia temere condemnetur. Hoc mihi semper cum iniquum, tum indignum visum est de majoribus nostris judicium: cum præsertim de illis persæpe ita judicent, qui eorum volumina neque legerint unquam, neque viderint. Ex hujusmodi autem de veterum sapientia contemptu oritur sane juvenum nostrorum is tumor & arrogantia, ut præ illis se magis sapere arbitrentur, & ipsi quoque magistrorum more jam Cartesium, jam Newtonum, quorum doctrinam vix primoribus labris gustarunt, in centumvirale judicium vocare non dubitent. O impudentiam singularem. Itane? Vix auditis Dialecticæ elementis, vix Physicorum limine salutato, summis philosophis diem dicere, ac de rebus difficillimis, nec satis sibi cogni-

gnitis iniquissimum iudicium pronunciare? Judicent potius barbatuli iuvenes de cincinnis, de choreis, de ludis, de conviviis, aliisque egregiis hujus generis studiis: in his profecto cati isti & peracuti ingenium suum, & bonum, ut ipsi vocant, gustum satis probare poterunt.

At vero quid de illis dicam, qui præter eam, quam ipsi profitentur disciplinam, nullam aliam non inutilem & otiosam prædicant? Neminem isti virum doctum existimant, si ea doctrina careat, quam ipsi colunt, quamque veluti unum corpus ex ceteris disciplinis tanquam membris compositum sic putant, ut ab iis, qui unam illam affecuti fuerint, nihil amplius sit ex omni doctrinæ genere exoptandum. Non loquar de iis, qui omnes artes omnesque disciplinas ex uno sacrarum literarum codice proficisci voluerunt.

Nemi-

Nemini vestrum latere arbitror, quot pugnas inter eruditos haud multos ab hinc annos excitaverit liber, cui titulus *Pansophia Mosaica*, cujus auctor in ipso divino codice omnem scientiam, omnemque doctrinam amplissime contineri contendebat. Ego quidem haecenus vidi neminem, qui ex uno divinorum librorum studio Arithmeticus, aut Geometra, aut Astronomus vel mediocriter evaserit. Nullus autem dubito, quin ad sacrarum literarum studium homines accedere debeant præclaris hujus generis disciplinis bene instructi, si quæ de Arca Noe, de Babelica turri, de Salomonis templo, de annis solaribus & lunaribus Hebræorum in sacro codice narrantur, ea penitus intelligere velint. Hinc præter Origenem, qui ut Eusebius memoriæ prodidit, in Arithmeticis & Geometricis eos mature exercebat, quos sacris



cris literis initiare cupiebat, sapientissimi quoque ac sanctissimi viri Hieronymus & Augustinus numerorum ac syderum scientiam ad sacra volumina intelligenda quam maxime necessariam esse judicarunt. Atque hinc nuper summo labore & singulari doctrina doctissimorum virorum du Hamel, Huetii, Lamy, du Pin aliorumque in lucem prodire prælusiones ac Biblici apparatus, unde in ipso sacrorum librorum studio duces haberemus ac præcursores. Quare non video, quo pacto ceteræ disciplinæ ab ipso divino codice peti possint, si ad absolutam ejus intelligentiam accuratior disciplinarum earundem scientia antea requiratur. Docent nos profecto sacræ literæ ea omnia, quæ ad religionem, ad pietatem moresque Christiano homine dignos pertinent: non philosophum, non mathematicum, non oratorem instituunt; quan-

quanquam in illis omnem scientiam & doctrinam inesse, nemo sapiens negaverit. Sed nimis multa de controversia, quæ ad nos minime pertinet. Illud jam quæro, an in toto illo humanarum disciplinarum orbe, quem Græci Encyclopædiam vocant, ulla sit, quæ aliarum omnium quasi domina ceteras imperio suo ita subiciat, ut qui tandem eam possident, cunctarum doctrinarum opibus aucti esse videantur. Meminit quidem Cicero de L. Crasso, qui omne artium & disciplinarum genus unius cognitione juris contineri, & quidem uno duodecim Tabularum libello, existimabat. Neque id sane mirari possum, cum quidam ludi magister, ætatis nostræ sciolus, contenderet, scientiam omnem una Alvari Grammatica comprehendere. At vero hac tempestate homines quidam forenses illud habent sibi persuasissimum, ex una juris

ris scientia hominem in omni disciplina-  
rum genere fieri posse perquam doctum  
& sapientem. Hos ego profecto vete-  
rum Sinensium quam simillimos esse  
dixerim, qui orbem terræ universum  
imperii sui limitibus esse conclusum,  
neque extra Sinas gentem ullam us-  
piam consistere arbitrabantur. Ex quo  
illud sequitur, ut ejusmodi homines  
quicquid operæ & laboris in aliis, præ-  
ter ipsam juris scientiam, disciplinis  
comparandis impenditur, inanem tem-  
poris jacturam ætatisque dispendium  
putent. Quod si forte aut aliquod M.  
Tullii volumen, aut Cæsaris commen-  
tarios, aut latinum poetam in studio-  
si alicujus juvenis manibus videant, de  
illo pessime judicant, & in foro nihil  
illum profecturum esse male ominan-  
tur. Putant nimirum scientiam juris  
esse opibus suis satis instructam, nec  
alienis literarum egere ornamentis: id-

circo adolescentes Grammaticæ & Dialecticæ studiis, quantulumcunque id sit, eruditos, magnos posse facere in jurisprudentia progressus. Stulti igitur Alciati, stulti Duareni, stulti Govea-pi, stulti Augustini, totque alii in jure clarissimi viri, quibus tamen illi, recte quidem & merito, magistris gloriantur: qui cum id minus intelligerent, præter doctrinam juris, alia quoque disciplinarum studia impensissime coluerunt. At vero M. Tullius, cui summam universi juris scientiam nemo unquam sanæ mentis negavit, luculenter affirmat: non ex edicto Prætoris, nec ex duodecim Tabulis, sed penitus ex intima Philosophia juris artem esse hauriendam. Igitur tantum abest, ut Philosophiam ceterasque disciplinas doctrina juris in se una complectatur, ut ipsa potius Philosophia, tanquam sæcunda bonarum artium parens, in suo

suo sinu ipsum jus civile alere atque educare videatur. Verum asciscant ad juris studia, quotquot volunt, adolescentes rudes, indoctos, imperitos & bonis literis minime excultos. Nonne vident homines insulsi, hac ratione se rabulis amplum iter ad forum recludere, legumque dignitatem, quam ipsi extollere maxime cupiunt, miserum in modum minuere atque deprimere? Nam nisi ad forum accedant, qui non modo ingenio præditi, sed literis quoque & disciplinis perpoliti, doctrinam juris elegantia sermonis & eloquentia scienter pertractare queant, quid aliud erit ab hujusmodi hominibus expectandum, præter gerras & male consutos centones? Neque enim, ut opportune M. Tullius ait, castitatem orationis & optimas disciplinas homines in foro discere, sed docti in forum venire debent. Quid vero ( te ipsum testem,

M. Tulli, appello) quid inquam, si adolescentes hoc tempore, præter aliquam juris notitiam, in forum non afferant, nisi contemptum & ignorantiam literarum? Quo tandem evadet vetus illa Romani fori gloria, quæ te totque aliis tui similibus gravissimas causas perorantibus, usque ad ultimas terras pervagata est? Enimvero apud hos minimum valeant & Romani fori dignitas & doctrinæ splendor: sed jam quæro ab ipsis quonam pacto perdifficiles quosdam juris nodos expedire, & vim legum illarum percipere poterunt, quæ ab intima latinæ linguæ cognitione, quæ a ritibus & institutis Pop. Rom. maxime pendent, si literarum rudes, si jejuni & imperiti ad ipsam juris scientiam accedant? Et revera plurimas quidem magnique momenti leges ob eruditionis ejusmodi inopiam a multis magni nominis jurecon-

consultis perperam intellectas fuisse, ostendunt Pancirollus, Gentilis, Heineccius, Noodt aliique clarissimi viri de Romano jure optime meriti. Atque hinc satis apposite Justinianus Cæsar jus Romanum cum pelago procellis scopulisque infesto comparavit, quod scilicet nautæ peritiam industriamque singularem exquirat. Continet illud plane multa verbis ac sententiis obscura, continet res varias & alicubi etiam sibi adversantes, quæ ingenium promptum, literis exercitatum, tum etiam eorum temporum rerumque peritissimum postulant. Proinde jaceret adhuc in tenebris, neque in illud gloriæ fastigium, in quo nunc est, evasisset juris scientia, nisi literarum lumen & disciplinarum notitia accessisset, qua illam primo illustrarunt ex Italis Alciatus, Decianus, Menochius, Pancirollus, deinde ex Hispanis Ant. Augustinus,

Co-

Covarruvias, Goveanus, Pinellus, ex Gallis Budæus, Cujacius, Duarenus, Tiraquellus, Contius, Hotomanus, Balduinus, Briffonius; ex Germanis Zazius, Sicardus, Vigilus, aliique plurimi, qui non tantum ingenii acumen & par ingenio iudicium, sed elegantiam quoque latinitatis literarumque Græcarum scientiam ad illud ex omni parte exornandum attulerunt. Quorum volumina summo ingenio exquisitaque doctrina elucubrata, cum omnium oculis pateant, nonne satis nobis argumento sunt, pleniori perfectæque juris scientiæ elegantiores literas & disciplinas fundos fieri oportere? Et erit quisquam tam audax, atque ore tam duro, qui hoc tempore studiosæ juris juventuti bonas literas inutiles esse, imo etiam, si superis placet, perniciosas affirmet? O præposteram nostrorum temporum ignaviam. O singularem



rem sciolorum impudentiam. Quam bene in ipsos quadrat illud Græcorum, eos nempe aulædos esse, cum fieri non potuerint citharædi. Cum enim in foro gloriam assequi, & inter jurisconsultos clarere non potuerint, inter rabulas consistere coacti sunt; quæque ipsi non sunt assecuti literarum ornamenta, a foro curiaque rejciunt. Sed finem dicendi faciam. Satis jam intellexistis, unde hæc tanta sciolorum propago prorumpat in dies ad omnium labem disciplinarum. Nimirum magnam eorum partem alunt immaturæ laudes magistrorum, qui plus nimio adolescentium ingeniis assentantur ac plaudunt. Partem vero nutriunt contemptus veterum sapientiæ parentum, ac perniciosæ de optimis artibus instudiosam juventutem disseminatæ opiniones. Quod quidem multiplex literarum malum nisi aliquando tandem  
exter-

160 ORATIO VI.

exterminetur , actum est de honestissimis disciplinis , actum de sapientia univërfa .

DE LAUDIBUS LEONIS X.

IN ANNIVERSARIIS EJUS

PARENTALIBUS

ORATIO VII.

*Habita pridie Idus Febr. MDCCXXXVIII.*



EMINEM vestrum , PP. amplissimi , aut eorum , qui adsunt , ignorare arbitror , quæ fuerint Leonis X. in omni vitæ genere egregiæ admirandæque virtutes . Profecto satis superque omnium gentium literis ac prædicatione commendanda-

datur singularis illius sapientia, incredibilis animi fortitudo atque constantia, summa denique pietas & religio: quibus virtutibus tanquam gradibus in ipso ætatis flore ad summum Pontificatus apicem non tam ascendit, quam advolavit. In ea vero celsissima & cælo proxima sede dignitatis, qua major in terris dari non potest, quot labores impigre suscepit, quot quantasque res præclarissime gesserit, sive ad tuendam, sive ad amplificandam Ecclesiæ dignitatem, ille unus fortasse ignoraverit, qui ejus memoriæ celeberrimæ annales neque viderit unquam, nec fando audierit. Quamobrem ne putetis, me hodierno die temeritate quadam velle in immensum hoc mare ingredi, ut inde nonnisi difficillime evadere atque enatare possit oratio. Deest profecto mihi tanta dicendi vis & eloquentiæ copia: deest amplitudini re-

X

rum

rum ejusmodi pro dignitate dicendarum opportuni temporis ratio. Prætermisissis itaque iis, quæ vos sæpe alias tum a me, tum ab aliis eloquentissimis viris de Leone X. ex hoc ipso loco audivistis, id unum spectabit oratio mea, quod annuam hujus diei celebritatem unice spectare videtur, per rarum scilicet & singulare ipsius Leonis erga literas & literatos studium & voluntatem. Etenim hac una virtute, ceteris omnibus missis, sapientissimus Pontifex de hac nostra studiorum Universitate, de Pop. Romano ac de omni posterorum memoria sic est optime meritus, ut licet grata quotannis ejus beneficentiæ recordatio apud nos renovetur, nunquam tamen satis, nunquam paricum ejus meritis laude possit prædicari.

Multi sane extiterunt in omni memoria principes viri, maximique reges, qui erga homines doctos ac literatos

ratos se admodum propensos, tum etiam magnopere liberales præstiterunt, qui tamen imperiti literarum erant, atque omnis doctrinæ expertes. Habuit nuper magnum Gallia regem Ludovicum XIV. literatorum quidem omnium amantissimum, & supra quam dici potest, beneficentissimum, qui nihilominus nullis literis ac doctrinis excultus fuisse dicitur. Neque id mirum vobis, PP. amplissimi, videri potest, qui optime nostis, quot labores, quot vigilias, quot denique gravissimas animi curas sibi doctrinarum studia deposcant. Omittendæ sunt, dicere solebat M. Tullius, voluptates, relinquenda studia delectationis, ludus, jocus, convivium ac sermo pene familiarium omnium deferendus. Cum autem cuncti fere principes in auro & purpura molliter educati sint, mirandum plane non est, si vitæ genus asperrimum,

quod a studio perpetuo literarum di-  
siungi non potest, aversentur; litera-  
tos tamen, tanquam singulare ac pro-  
pe divinum genus hominum, amore  
prosequantur ac foveant: quod nimi-  
rum intelligunt, eorum doctrina rei-  
publicæ salutem, leges ac jura civita-  
tum, bona denique ac fortunas popu-  
lorum conservari; imo & nominis sui  
immortalitatem & decus ad posterita-  
tem & memoriam temporum propa-  
gandum, eorum ingenio ac literarum  
monumentis magna ex parte plerunque  
niti, optime norunt. Non ita vero  
Joannes Medices. Non ille literatos  
tantum viros, sed literas quoque ama-  
vit plurimum matureque coluit. Quan-  
quam enim in ea fuisset amplissima ac  
prope regia domo natus, quæ summo  
splendore atque opibus inter ceteras  
emineret, nunquam tamen otio ac deli-  
ciis molliri potuit: nunquam inanibus  
pue-

puerorum oblectamentis, nunquam equorum, quadrigarum aliisque, quas nostri vocant equestres, exercitationibus se dedit: imo nec ferventioris ætatis cupiditatibus, quæ juventutem cum a literarum studiis, tum ab omni honestate abducere solent, unquam se abripi passus est: sed recto illo, tametsi difficili ac salebroso, ad virtutem itinere sibi proposito, se totum ab ineunte ætate literis tradere, nullis nisi literatis hominibus uti, cum iis sua communicare studia, eorumque iudicium exquirere solemne habuit. Recitetur hic Angeli Politiani viri doctissimi gravissimum testimonium: qui ad Innocentium VIII. Pont. Max. de Joanne scribens, hæc de illo conceptis verbis testatus est: ita natus & factus hic est, ita altus & educatus, ita denique eruditus atque institutus, ut nemini secundus ingenio, nec æqualibus indu-

industria, nec præceptoribus literatura, nec senibus gravitate concefferit. Hæc Politianus. Quid autem per vestram fidem non dico de impubere, aut de homine adolescente, sed de viro jam annorum maturitate consilioque confirmato gravius dici, aut laude magis dignum excogitari unquam potest?

Neque vero Joannes Medices literis & doctrinis mediocriter informari, ac dicis caussa de illis instrui, quod nobiles ac primarii adolescentes plerique faciunt, contentus fuit. Sed postquam, satis in poeticis, ac rhetoricis studiis profecit, postquam tum Græcorum, tum Romanorum diligenter historias evolvit, postquam denique multiplices philosophorum sectas, origines, ætates ac dogmata accurate comperta habuit, tum ad Civilis & Pontificii juris scientiam addiscendam Pisas profectus est. Verum quonam tempore Joannem  
id



id fecisse putatis? Non ille sane privatus erat cum id consilii cepit, sed cum jam in maxima hominum celebritate positus, ab Innoc. VIII. Pont. Max. amplissimus R. E. Cardinalis fuerat renunciatus. O singularem sciendi cupiditatem. O rem portenti similem, videre Cardinalem præclarissimum, nobilitate, opibus atque ætate florentem, patria charissima, civibus, ac magnificentissima domo relictis, in Pisanam Academiam commigrare, ut in ea juris interpretes audiret, sequæ eorum disciplinæ erudiendum quasi rudem discipulum daret. Quis hac nostra tempestate, non dico Romanæ purpuræ splendore auctus ornatusque, sed magistratu aliquo vel inferiore in Urbe cohonestatus, exire domo & ad hanc studiorum Universitatem doctrinæ causâ accedere a dignitate sua non abhorrens & alienum esse putaret?

Expe-

Expectant hodie ad multam diem in vestibulo ædium civilis juris magistri nobiles adolescentes, dum illi hesternam crapulam edormiant, ac tandem somniculosi & oscitantes ad juris lectiones audiendas descendant. Pudeat delicatulos istos, pudeat, cum audiant Joannem Medicen, Florentinæ principem juventutis clarissimumque Cardinalem, in Pisana Academia jurisprudentiæ operam dantem, nemini studio, labore ac diligentia concedere. Quid itaque miramur, quod ille postea Pontifex maximus, ætate etiam tunc florens, renunciatus, totus ad optimas disciplinas augendas & amplificandas incumberet, qui adhuc adolescens cives suos, parentes, vitæ commoda ac ipsam ferre dicam Romanam Purpuram doctrinæ studiis devovere non dubitaverit?

At vero, dicet quispiam, alii plurimi fuerunt principes regesque clarissimi,

fimi, qui ab incunte ætate sese literis dare, easque ad extremum usque spiritum in deliciis habere consueverunt. Alphonsum quidem Hispaniæ regem; ut innumeri alii prætermittantur, proditum est memoriæ, solitum fuisse dicere, se malle privatim vivere, quam eruditione carere. Quam vocem superiore seculo æmulari sane visus est Franciscus Maria postremus Urbini dux, cum diceret, se Urbino potius ejusque ditione, quam literarum studiis abdicaturum. Ego equidem non repugno, neque nescius sum, in omni fere ætate extitisse viros non minus doctrinæ, quam dignitate præstantes. Illud tamen contendo, ex iis plurimos fuisse, qui multum quidem erga literas, nullum vero erga literatos homines studium, nullamque propensionem declaraverint. Sive enim non ea essent a natura liberalitate donati, ut bonas literas & qui

easdem profitebantur, pluris æstimarent,  
 quam pecuniam; sive illi philautia tan-  
 topere laborarent, ut ceteros omnes  
 præ se nihili facerent; sive alienæ do-  
 ctrinæ gloria nomen suum obrui, sibi-  
 que de fama ac dignitate ex aliorum  
 ingenio detrahi putarent: illud certum  
 est, limis oculis homines literatos as-  
 pexisse, atque illos nullis præmiis, nul-  
 lis honoribus nulloque beneficio exor-  
 nasse. Imo, quod incredibile plane  
 videtur, animo a literatis ipsis prorsus  
 alieno atque infesto eos palam fuisse,  
 loquuntur historiæ. Profecto narrat  
 Dio, Hadrianum Cæsarem studiorum  
 suorum & bonarum artium æmulos,  
 quos æquare non poterat, interfecisse,  
 quippe qui literis, optimis artibus, &  
 disciplinis unus omnes anteire vellet.  
 Sed vetustioribus illis & immanitate  
 barbaris exemplis prætermisissis, possem  
 hic multa minimeque obscura recen-  
 tioris

tioris ætatis in medium afferre , quæ id satis ostendant . Sed cum de principibus viris sermo sit , de quibus , aut bene tanquam de Diis , aut nihil omnino esse loquendum sapientes affirmant , idcirco plura non addam : cum præsertim apud vos dicam , quos tum in vetere , tum in recentiore temporum historia maxime versatos esse non dubito . Huc accedit , quod Leonis X. virtus alienæ vituperationis non indiget , quo ceteris altius assurgat , utque ipse unus inter omnes emineat . Et sane dubitari non potest , quin ille tantum literatos amaverit , quantum & literas , amore videlicet singulari , summo ac prope incredibili . Pleni sunt eorum , temporum annales , plenæ sunt historiæ , quæ effusissimam & quasi immensam erga illos beneficentiam Leonis testantur . Nolo equidem tempore ac patientia vestra abuti , recensendo

numerum fere infinitum eorum, quos ille doctrinæ causa beneficiis affecit, præmiis auxit, fortunis opibusque cumulavit. Unum hoc verissime dicam: quotquot Romæ, quotquot in universa Italia, in Germania, in Græcia aliisque provinciis remotioribus extitere, alicujus ingenii poetæ, oratores, philosophi, mathematici, aut alius doctrinæ cultores, omnes in Leone X. parentem amantissimum ac mecoenatem beneficentissimum reperiiebant. Tanta proinde factus est ad Urbem virorum doctissimorum concursus, ut florentissima olim Athenarum urbs rediviva Romam commigrasse, aut certe aureum Augusti Cæsaris seculum Leonis tempore revocatum videretur.

At vero qualis quantaque fuerit munificentissimi Pontificis tum in literas, tum in literatos beneficentia & charitas, non ex iis tantum conjici debet, quæ

quæ ille brevi annorum, quibus vixit, curriculo, liberalissime fecit. Enimvero ad omnem ætatem omnemque posterorum memoriam longe lateque productam voluit hanc animi sui erga literas earumque amatores beneficentissimam voluntatem. Dubitatisne aliud illi tunc fuisse consilium ac providentissimam deliberationem, cum hoc Romanum Gymnasium a fundamentis excitare, in eoque clarissimos disciplinarum omnium præceptores perpetuum stabilire constituit? Non alia profecto illi fuit mens, non alia voluntas, nisi ut Romæ bonarum artium arcem munitissimam collocaret, in qua sempiternam atque tranquillam haberent honestissimæ disciplinæ stationem. In hoc nimirum Sapientiæ domicilio viros primi ordinis Theologos, eruditissimos Juris utriusque doctores, Philosophiæ, Geometriæ, ac linguarum omnium peritiss-

ritissimos magistros, publico civitatis sumptu ali perpetuo voluit, ut ipse nullo unquam tempore de ingenuis disciplinis doctisque viris optime mereri desineret. Prospexit utique vir acutissimus, misera quidem & luctuosa aliquando ventura tempora, in quibus literarum barbarorum incursione, aut domestica inimicorum conspiratione ad supremum quasi interitum vergerent. Proinde firmam illis perpetuoque duraturam in Urbe omnium principe stabilivit sedem: quam duplici Apostolica sanctione ita firmavit, ut eam nulla temporum calamitas, nulla improborum hominum vis, aut scelerata conjuratio convelleret. O Pontificem sapientissimum. O parentem literarum & literatorum omnium amantissimum, sempiterna memoria dignum. Quas tibi ego gratias hodierno die, Leo Pontifex Maxime, Academiae hujus universae



sæ nomine agere potero, quæ quidem  
 meritis ac virtutibus tuis impares om-  
 nino non sint? Utinam mihi esset tan-  
 ta vis ingenii ac tanta dicendi facul-  
 tas, ut rarum, maximum & incredi-  
 bile tuum erga literas & literatos amo-  
 rem vivis eloquentiæ coloribus si non  
 exprimere, at saltem adumbrare potuis-  
 sem. Utinam magnitudinem beneficio-  
 rum tuorum, quibus non modo de tuis  
 temporibus, sed de omni quoque poste-  
 rorum memoria bene mereri voluisti,  
 data mihi fuisset satis explicandi copia.  
 Quod vero neque unius hominis vox,  
 neque exiguum semihoræ tempus ad  
 dicendum mihi constitutum, semel sa-  
 tis præstare possunt, id tibi Academia  
 hæc nostra ad gratam & immortalem  
 nominis tui commendationem quotan-  
 nis præstat, perpetuoque præstabit.

DE  
OPTIMIS ARTIBUS  
NOBILI JUVENTUTI  
NECESSARIIS  
ORATIO VIII.

*Habita VII. Kal. Decembres*

M DCC XL.

*SSmo Domino Nostro*  
**BENEDICTO XIV.**  
 PONT. OPT. MAX.

Paulinus a S. Josepho .



**A**RDUUM hoc & morosum  
 orationis genus nunquam  
 fortasse suscepissem, BENE-  
 DICTE Pont. Max., nisi  
 sapientia tua singularis mi-  
 hi animum stimulosque addidisset. Cum  
 enim omnis fere nobilitas hoc tempore  
 bonarum literarum parum cupida esse vi-  
 deatur, quæ nihilominus ad illam potif-  
 sime pertinent, quæque olim fuere sum-  
 mis regibus in amore atque deliciis; rem  
 invidiæ plenam esse videbam, in nobi-  
 lissi-

lissima civitate de iis studiis verba facere, quæ iam parvam a nobilitate ipsa gratiam inirent. Postquam vero ad te divinitus delata fuit rerum cum humanarum, tum divinarum potestas, tam iniqua optimis disciplinis fortuna, si non omnino immutari, at saltem longe melior fieri visa est. Quis enim antea vitæ tuæ cursum paulo attentius inspexerit, qui non videat, te ab ineunte ætate & in omni vitæ genere, cum summa nobilitate doctrinam & eximia cum doctrina virtutem mirum in modum conjunxisse? Atque hinc optimæ artes in spem venerunt pristinae dignitatis suæ recipiendæ; ut posthac scilicet non humiles tantum lares incolere, aut in religiosorum hominum septis sese abdere sibi tribuatur, sed in patriciis quoque tectis sedem ac domicilium habere. Nemo quippe ignorat, ad exemplum principis, totum, ut ille ait, orbem componi. Hinc ego  
quo-

quoque tam magno provocatus exemplo,  
 eam dicendi provinciam sum aggressus,  
 quæ non omnibus fortasse temporibus pro-  
 baretur. Dixi enim de literis & doctri-  
 nis nobili juventuti maxime necessariis:  
 quæ quidem necessitas tum longe major  
 esse solet, cum princeps literis sapientia-  
 que præditus, eos supra ceteros ornat at-  
 que auget, qui non minus doctrina, quam  
 nobilitate generis commendantur. Dicen-  
 ti autem mihi, non modo ii, qui multa  
 frequentia & ex omni ordine aderant sa-  
 pientissimi viri, summa voluntate as-  
 senserunt, sed ipsi quoque magnæ Gy-  
 mnasii aulæ parietes plaudere & exulta-  
 re quodammodo videbantur, dum audirent  
 laudibus te nomenque tuum celebrari.  
 Quid enim tecta ipsa ad ejus Pontificis  
 Maximi nomen non exultarent, quem tot  
 annos in eodem amplissimo loco vel juris  
 candidatis lauream impertientem, vel re-  
 floris munere sapientissime fungentem vi-  
 de-

derant ; Et a quo uno , id quod omnium  
 diu maxime erat in votis , se in veterem  
 splendorem restitutum iri confidunt ? Haud  
 miraberis itaque , BEATISSIME PATER ,  
 si , qua a sapientia tua oratio vim pro-  
 pe omnem ac decus accepit , immortalis  
 quoque nomini tuo inscribatur . Quamquam  
 enim revera tanta dignitati sit impar ,  
 amplitudo tamen loci , in quo habita est ,  
 Et ipsa argumenti conditio , in se aliquid  
 habere videntur , quod sufficiat quicquid  
 in ea ornatus , aut eloquentiæ desideratur .  
 Huc accedit humanitas tua incredibilis ,  
 qua oratorem sæpe alias in eodem Gy-  
 mnasio coram te , ac jussu tuo , dicentem  
 complexus es , cui sane nihil antiquius ,  
 quam acceptorum beneficiorum memoriam  
 testari sempiternam .



IN maximis bonarum artium commodis, quibus respublica cumulatur, illud mihi singulare videbatur, quod hominibus tenui fortuna & ignobili genere natis, luculentum illæ patrimonium fierent, eosque ab obscuro, in quo versabantur, loco in publicam lucem ac dignitatem producerent. Cogitanti enim mihi tum vetera, tum recentiora historiarum monumenta, occurrebat Pythagoras ille inter philosophos celebratissimus, sculptoris tamen filius: occurrebat alterum sapientiæ lumen Socrates, matre obstetrice, patre marmorario in lucem editus. Quid vero Græcorum princeps oratorum Demosthenes, ut innumeros alios præteream, quem in humili fordidaque fabri officina natum accepimus? Ex superiore autem memoria recordabar &

& Dominicum Tuscum & Silvium, Antonianum & Arnaldum Ossatum, amplissimos Cardinales, qui nulla licet sanguinis claritate, nullis majorum imaginibus præfulgerent, doctrinæ tamen præsidio & ingenii commendatione ad maximæ dignitatis fastigium, regali proximum evasissent. Quamobrem singularem Dei Opt. Max. providentiam satis admirari non poteram, quod de bonis suis ita bene ac sapienter constituisset, ut alii quidem generis splendorem, illustrium majorum gloriam, opes fortunasque obtinerent, alii vero ingenium & literas, quibus fortunam sibi pariter dignitatemque compararent. Itaque existimabam, nobiliores adolescentes literarum studiis, quo beate vivant, nullo pacto indigere: sed literas, quasi hæreditatem suo sibi jure adeundam, esse pauperibus derelictas, qui ad laborem industriamque nati



nati sunt. At vero contra quam putaveram, rem se habere, tandem animadverti. Intellexi enim, optimas disciplinas multo magis iis, qui amplitudine generis ac nobilitate ceteris antecellunt, necessarias esse, quam illis qui obscuro loco, aut mediocri fortuna nascuntur. Hoc autem si tam perspicuum omnibus foret, quam certum revera est, nequaquam hodie complures invenirentur nobili genere juvenes, qui literarum studia, aut omnino negligerent, aut ea remisse & oscitanter excolerent. Quare nihil me facturum putavi auspicandis nobilissimis studiis opportunius, nihil ad amplitudinem hujus loci accomodatius, quam si hodierno die in hac tanta sapientissimorum hominum frequentia statuerem, utrum tandem nobilitati præ ceteris ad honestissimas disciplinas incumbere necesse sit. Cui sententiæ si auctoritas

tas

tas vestra iudiciumque, quemadmodum spero, accesserit, non vereor, ne quotquot hic adsunt clarissimi adolescentes, rationem habeant dignitatis suæ, atque ipsi præter ceteros bonarum artium studia diligentissime complectantur.

Verum nemo sit, qui suspicetur, me cuiquam vel infimi generis interclusum velle doctrinæ aditum, qui optimo cuique ingenio semper patuit: Injuriosum quidem in naturam, rerum parentem, foret, sapientiæ laudem iis præripere, quos ipsa celeri ingenio, memoria firma ac summa discendi facilitate sic donavit, ut eos ad optima studia penitus effinxisse videatur. Illud tamen affirmo, ejusmodi homines nullam generi suo injuriam, nullam reipublicæ contumeliam esse facturos, si rejectis studiis literarum, alio mentem animumque convertant. Quis enim  
nim

nim eos jure reprehendat, si ad picturam, vel ad statuariam, vel ad sculpturam, vel ad aliam ex iis, quas mechanicas vocant, artibus sese dederint, & in ipsis scite excolendis ingenium suum, industriamque probaverint? Laudandi profecto sunt, si ingenuas disciplinas amplectantur, atque in illis progressus faciant maximos & admirandos. At minime vituperandi sunt, quod repudiatis hujusmodi studiis, ad quæstuosas potius artes omnem conatum suum ingeniumque adhibeant. Verum non eadem ratio, non eadem plane nobilitatis conditio est. Repugnat omnino, & a nobili viro prorsus abhorret, sese mechanicis & sellulariis artibus immiscere, quibus tenues homines se tuentur atque sustentant. Quod quidem adeo a veteri memoria communi gentium consuetudine institutoque majorum receptum fuit, ut Herodotus hi-

A a sto-

storiæ parens affirmet, apud omnes ferre nationes eos ignobiles haberi, qui artificia discunt. Porro autem nobiles juvenes, præter optimas disciplinas, non habent quicquam præstantius, in quo honestius & cum laude vitam traducere queant. Hæc nimirum studia ingenuo ac liberali viro digna sunt. Hæc revera principes viros, ut Plutarchus ait, maximosque reges exornant.

Sed literas, dicet quispiam, esse vera ac pulcherrima nobilitatis ornamenta, nemo unquam sanæ mentis negavit. At vero quæ tanta earum necessitas cum nobilitate ipsa intercedit? Magna profecto, si tum privata, tum publica nobilitatis ejusdem ratio paulo diligentius attenditur. Quis enim adeo rudis, adeo rerum omnium imperitus, ut ignoret, nobilium animos magis quam ceterorum in præcipientes motus abripi solere & in effrænatiores cupidita-

ditates? Sive enim sit opulentia & luxus paternæ domus, sive multa clientum assiduitas & frequentia, multa amicorum procerumque officia, seu denique superbia, quam commune nobilitatis malum Sallustius appellavit; illud certum est, eos sæpius ac gravioribus animi perturbationibus commoveri. Et sane nullum est fretum, nullus euripus, qui tot motus ac tam varias habeat tempestates, quot quantasque habere solent miserrimi ejusmodi juvenes animorum jactationes atque procellas. Nunc illos videas incredibili lætitia gestientes, nunc moerore, plenos & ægritudine pene confectos: jam ira inflammatos & furentes iracundia, jam metu pavidos, vultu animoque suspensos; tum sæpissime voluptatibus & insanis amoribus prope perditos. Huc accedit otium, quo nobilitas abundare solet plurimum; & quo

A a 2 uno

uno comite, omne vitiorum genus ar-  
cessi, ac virtutem omnem profligari  
necesse est. Ab otio enim, ut Cato  
ille Censorius dicere erat solitus, ho-  
mines nihil agendo, male agere dis-  
cunt. Quo quidem eo procliviores fe-  
runtur, quo amplior in illis esse so-  
let impunitatis spes, quæ, ut Cicero  
inquit, est magna peccandi illecebra  
maximumque flagitiorum incitamen-  
tum. Quid autem tam ægram & la-  
bentem nobilitatis conditionem sanare  
potest, præter literas? Literæ enim  
sunt virtutis parentes vitiorumque ex-  
pultrices. Hæ nimirum corruptos mo-  
res emendant, & ad virtutem atque  
honestatem excitant vehementissime.  
Hæ cæcas animi cupiditates, quæ fu-  
riarum instar hominem agitant, longe  
fugant atque dispellunt. Assiduus quip-  
pe ille studiorum labor mirum quan-  
tum ad impetus juveniles compescen-  
dos

dos valeat. Atque animus suavitatem doctrinæ paulatim delinitus, in placida quasi statione quiescens, tunc plane intelligit, quid æquum, quid iniustum sit, quid utile, quid honestum, quæ pulchritudo virtutis, quæ sapientiæ dignitas ac præstantia: hinc autem sensim ad virtutem ipsam se totus sapientiamque conformat. Quamobrem fieri videmus, ut quantum homines literis & doctrina præstant, tantum consilio, gravitate, modestia ceterisque virtutibus præstare soleant.

Quod si ex philosophorum sententia nobilitatis naturam exquiramus, magis aperte videbimus, quanta eidem nobilitati intercedat cum optimis disciplinis necessitudo atque conjunctio. Quanquam non sit unum omnium philosophorum de nobilitate iudicium; cum illam alii positam velint in longa majorum serie ad posteros usque cum laude

de traducta , alii in splendore familiæ fortunis opibusque florentis , alii vero in præclara avorum , aut parentum gloria , rebus domi forisque gestis illustrium : attamen Plato , qui unus philosophorum omnium veluti numen habitus est , tanquam ex ara & tripode pronunciavit , nobilitatem omnium longe clarissimam atque germanam tunc haberi , cum quispiam propria animi virtute ac magnitudine excellit ; ut proinde is vere nobilis censendus sit , cui non aliena , sed sua ad nobilitatem virtus opitulatur . Atque hinc illud Juvenalis celebratissimum : nobilitas sola est atque unica virtus . Quæ si vera sunt , illud quidem de nobilibus bene multis dici posse videtur , quod M. Varro Diis quibusdam patribus & Deabus matribus accidisse affirmabat : eos nimirum conversione temporum rerumque vicissitudine a veteri nobilitate

tate



tate descivisse, & quasi ignobiles vulgo haberi. Quis enim non intelligit, quam longe a vera nobilitate absunt ii, qui otio inertięque dediti, abdomini suo tantum nati esse videntur? Ubi enim in summa rerum ignorantie honestas & decus? Ubi splendor virtutis? Ubi vera animi magnitudo? Ubi demum reliquę virtutes, quibus sublati, nobilitas ipsa consistere nullo modo potest? Turpe fuit olim in Romana republica patriciis & illustrioribus viris, literarum rudes esse atque imperitos. Pervulgatum satis est Q. Mutii testimonium a Pomponio sempiternę posteritatis memorię traditum: qui Sulpicio cuidam negligenter ineptęque de jure disputanti, turpe est, inquit, viro patricio ac nobili jus ignorare. Neminem pręterea fugit, quot vocibus & clamoribus M. Tullius tum C. Verri, tum L. Pisoni, clarissimo  
ge-

genere viris, exprobraret imperitiam  
 literarum, quasi avitam nobilitatem la-  
 be summaque turpitudine affecissent.  
 Hanc vero infamiae maculam nemini  
 de plebe objectam fuisse legimus, ut  
 plane constet, optimarum artium stu-  
 dia, non tam ad privatos, quam ad  
 patricos & nobiles viros jure quodam  
 suo pertinere.

Sed abeant vetustatis exempla, ab-  
 eant opiniones philosophorum. Alia  
 sunt modo tempora, alii mores. Age  
 vero, non intercedo. Itaque missam  
 facio nobilitatem illam, quam ex isto-  
 rum sententia Philosophia magis, quam  
 natura formavit. Atque ad eos tota  
 convertitur oratio mea, qui hac nostra  
 tempestate propter amplitudinem ge-  
 neris atque opes, vulgo nobiles esse  
 censentur. Enimvero nobiles ex isto  
 genere homines, nisi forte velint se  
 ab omni republica penitus abdicare,  
 &

& in solitudine belluarum more ver-  
fari, literis & doctrina præter ceteros  
indigere contendo. Nam cui, per ve-  
stram fidem, magistratus, cui prætu-  
ræ, cui publici honores, nostris quo-  
que temporibus deferuntur? nonne vi-  
ris nobilibus atque patriciis? Profecto  
si civilem, aut Ecclesiasticam rempu-  
blicam spectemus, eos fere consequi  
videbimus imperia, fasces, purpuram,  
qui claritate generis & splendore fa-  
miliæ nobilitantur, ut aliquando plus  
illis nobilitas, quam aliis virtus pro-  
desse videatur. Præterea maximo for-  
tunæ beneficio tribuitur, si homo no-  
vus ac tenui loco natus, virtutis ta-  
men & ingenii fama præclarus, ad  
amplitudinem honoris iter sibi tandem  
patefecerit. Inveteravit enim opinio,  
communi gentium consensione firmata,  
nobiles viros ad magistratus & hono-  
res, non tam promoveri, quam nasci.

B b Pro-

Proinde Cicero, ut consulatum suum  
singulari Pop. Rom. beneficio acceptum  
profiteretur, se, non in cunabulis, ut  
plerique omnes, sed in campo consu-  
lem factum esse affirmavit. Cum igi-  
tur ceteris eminere ceterisque impera-  
re, nobilitatis tam proprium sit, quam  
prope dicam generari ac nasci; quis  
non videt, ad ipsam quoque ea omnia  
jure quidem suo pertinere, quæ rectam  
reipublicæ institutionem, rectamque  
tum se, tum alios regendi rationem  
continent? Quis autem negaverit, ho-  
nestissimas disciplinas domi militiæque  
& consilii duces esse & imperandi ma-  
gistras? Possem quidem hoc loco ora-  
torum more in immensum campum  
excurrere: possem multa ex Græcis,  
multa ex Romanis in medium afferre,  
ex quibus planum fieret, quantum in  
nobilissimis ejusmodi studiis momenti  
sit, tum ad civitatem recte instituen-  
dam,

dam, tum etiam ad bellicam virtutem & imperatoris laudis gloriam, comparandam. Neque enim gentes illæ omnium sapientissimæ tam impenso studio, tantisque honoribus ingenuas artes extulissent, si easdem nihil ad imperii felicitatem, nihil ad reipublicæ tranquillitatem & otium, quibus illæ rebus unice studebant, conducere putavissent. Sed nimis multa dicenda essent, si eo descenderem, unde oratio exitum facile invenire non posset.

Tria sunt præsertim, quæ Aristoteles in administranda republica maxime necessaria esse putavit: consultatio de rebus agendis, magistratuum creandorum cura atque judicia. Hæc autem singula quantam, Deus immortalis, postulant sapientiæ vim ac robur? quantam tum publici, tum etiam privati juris scientiam? quantam postremo & Politicæ & Oeconomicæ rei in-

B b 2 telli-

telligentiam atque doctrinam ? Ponite jam vobis ante oculos unum ex istis aliquem , nobili genere natum , qui non libros , sed calamiſtrum & cincinnos , non literarum ſtudia , ſed ludos & jocos , non academias , ſed nocturnos mulierum coetus ab ineunte ætate frequentaverit : qui tamen fortuna rerum domina , aut errore hominum , ut inquit ille , ad magiſtratus & honores irreperit : quod tandem ſapiens conſilium , aut quæ in rebus gerendis prudentia ex tam vacuo & inani capite expectari unquam poſſit ? Fac gravis interim ( ut ſolet ) de re civili , aut politica controverſia aliqua exiſtat : illamne componet homo rudis , qui nulla veteris hiſtoriæ cognitione , nulla gentium , nulla optimarum legum ſcientia munitur ? Hærebit proſecto lapidi , aut trunco ſimilis , ridiculum caput : neque enim mutire audebit ,  
cum

cum nesciat ( ut in veteri proverbio est ) alba & atra discernere . At enim dat sapere regi , inquit Hesiodus , turba sapientum comes . Non defunt in omni civitate docti legum interpretes , non defunt homines juris universi scientissimi , qui causis & judiciis præesse queant : tum etiam probe calleant , si qua res in consultationem venerit , docte & graviter de consilii sententia pronunciare . Bene est . Equidem non ignoro , quanti facienda sit hominum forensium doctrina ac virtus : neque de eorum probitate ac fide puto esse aliquid suspicandum . Illud vero affirmo , miseram omnino eorum conditionem videri , qui aliena mente ad imperandum indigeant . Et sane multum interest inter proprium & alienum de publicis rebus iudicium atque sententiam . Aliud quippe est posse secum provide deliberare , suumque animum

sa-

sapienter de communi bono consultare, ut Scipioni Africano morem fuisse accepimus; aliud privatorum hominum egere consiliis, qui sæpe in alterutram partem amore, sæpe odio ducuntur. Mente qui prudente pollet, is magistratum gerit, inquit Euripides. Quamobrem si cui alterius scientia, alterius judicium, unoque verbo, alterius mens ad gubernationem opus sit, is profecto non rempublicam regere, sed ipse ab aliis regi dicendus est. Præterquamquod raro fit, ut homines imperiti alieno consilio utantur, cum ipsi sibi sufficere, ipsi soli sibi sapere videantur.

Verum quæ hætenus dicta sunt de nobilitate universa, nemo non videt, ea maxime in nobilissimos juvenes convenire, qui rempublicam Ecclesiasticam cogitant. Perspicuum quidem est, tanto majora ab istis requirenda esse.

do-



doctrinæ præsidia, quanto splendidiora sunt Ecclesiæ munera, dignitatesque ampliores. Neque ad eas consequendas valent opes, aut illustrium majorum virtus & amplitudo familiæ, nisi iis quoque scientia, quasi cumulus nobilitatis, accedat. Quæ si forte desit, eam Pontificii juris interpretes negant quandoque posse nobilitate suppleri. Nolo autem hic, ne longior in dicendo sim, singula studiorum genera recensere, quæ Ecclesiastico viro vel digna sunt maxime, vel omnino ipsi necessaria: quorum alia cum ceteris communia sunt, alia vero Ecclesiasticorum hominum sic propria esse censentur, ut qui illis careant, quasi luce ipsa ac spiritu carere videantur. Prætereo itaque latinitatis & eloquentiæ studia, quæ vix dici potest, quantum illis asferre queant dignitatis & ornamenti. Prætereo doctrinam temporum & omnem

nem tum sacræ, tum profanæ antiquitatis eruditionem: qua neglecta, multa de antiquis Ecclesiæ ritibus & cæremoniis, multa de ipsis Christianæ rei primordiis ignorari necesse est. Præterea denique Pontificii juris scientiam, quam homini ad Ecclesiæ gubernacula admoto, non tam præclarum est scire, quam turpe ac periculosum nescire. Unum tamen pace vestra libere dicam, neminem mihi satis eo vitæ genere dignum videri, qui Theologiæ studia ne extremis quidem digitis attigerit. Turpe igitur erit medico, Hippocratis, aut Galeni volumina, unde ad nos primum medicina manavit, nunquam vidisse: turpe erit jurisperito neque Pandectas nosse, neque Codicem; Ecclesiastico autem homini turpe non erit ignorare fontes purissimos religionis, & nunquam divinarum literarum volumina, nunquam sanctorum Patrum  
mo-

monumenta, aut veterum conciliorum sanctiones oculis suis vidisse, quibus tanquam firmissimis præsiidiis & quasi subsidiariis copiis, germana ac solida Theologia instructa est? Dolet mihi plurimum, per temporis angustias me haud posse divinæ istius scientiæ necessitatem longiori oratione prosequi; in ea præsertim clarissima Urbe, quæ Christianæ religionis propugnaculum est & caput, unde sanctiora Catholicæ Fidei mysteria & Pontificiæ sedis oracula gentes accipiunt. Quid vero de Ecclesiastica historia dicam, quæ non Theologiæ modo, sed ipsi quoque Pontificio juri facem præfert? Persuadere mihi nequeo, sanæ mentis aliquem existere, qui inficias ire audeat, eam esse Ecclesiastico cuiquam maxime necessariam. Homines puerorum simillimos M. Tullius eos vocabat, qui, quæ olim ante se essent facta, ne-

scirent. Quid vos de homine Ecclesiæ addicto existimandum putatis, cui Ecclesiæ ipsius annales & omnis Ecclesiastica historia incognita magis sit, quam Indorum mores, aut res gestæ Sinarum?

Sed quid ultra abutor patientia vestra? Jam summa Dei providentia tempus illud advenit, in quo sane dubitare nemo potest, quin tandem Ecclesiastico viro necessaria sint nobilissimarum studia disciplinarum. Divino enim consilio factum est, ut is nobis daretur Pontifex Maximus BENEDICTUS XIV., cujus quidem spectata virtus & singularis sapientia, tum etiam immensi prope ab ineunte ætate suscepti studiorum labores, non obscure indicant, quæ tandem via, & qualis cursus tenendus sit. Ille enim, quod nemini vestrum latet, majorum suorum gloriam & avitæ nobilitatis splendorem,  
non

# ORATIO VIII. 203

non ad otium desidiamque traduxit, sed optimas disciplinas, quibus adolescentiam aluit, perpetuo sibi comites esse voluit, custodes ac vitæ magistras. His ducibus, non gratia aliqua, aut favore hominum, ad splendida quæque munera, ad amplissimas dignitates, ad purpuram iter sibi munivit. Una cum his tandem ad supremum Ecclesiæ fastigium evectus, quanquam in rebus gravissimis occupatus, eas tamen abs se divelli non patitur; sed si quid otii sibi concedatur, illud omne in libris studiisque præstantioribus ponit. Hoc autem tanto & tam præclaro tum ad dignitatem, tum etiam ad necessitatem literarum exemplo proposito, eritne quisquam, qui adhuc dubitet, studiorum rationem ad nobilitatem potissimum pertinere? Quod si, ut fama est, sapientissimus Pontifex, ab ipso sui Pontificatus initio pro optimis studiis

voluntatem suam satis aperte significavit, se nimirum in magistratibus atque honoribus impertiendis, illos ceteris antelaturum, qui ceteris doctrina sapientiaque præstabunt; cui perspicuum non est, quanti demum intersit, nobilitatis decus bonis literis ac doctrinæ laude cumulare? Gratulor itaque vobis, & quanta possum voce, maxime gratulor, nobilissimi Adolescentes, quod tam felici faustoque tempore studiorum vestrorum curriculum ingenti animo ac magna spe suscepistis. Non irriti profecto cadent labores vestri, non inanes cogitationes. Quæ olim virtutis & doctrinæ præmia, sola generis commendatione, otium occupaverat, ea jam ingenio, virtuti industriæque vestræ patere intelligitis. Si nobilitate ornati, si fortunis opibusque estis abunde instructi, bene est; siquidem his accedat scientiæ splendor & do-

doctrinæ ornamentum. Quid autem vobis deesse tum poterit? an prima reipublicæ munera? an opes? an dignitates amplissimæ? Profecto vobis hoc tempore, BENEDICTO XIV. Pontifice, non deerunt: qui cum sit literis & omni virtute ornatissimus, atque ejus voluntas in literatos homines sit mire propensa, non committet, ut optimus quisque ingenii & laboris præmia desideret. Itaque academiis, quæ injuria temporum diu siluerant, in Urbe restitutis, tum etiam aliis novis excogitatis, jam signum aliquod, ad bene de optimis studiis sperandum, sustulisse videtur. Agite ergo, & qua virtute, qua liberalissimis disciplinis illud efficite, ut optimi principis voluntati pari diligentia ac studio respondeatis.

*SSmum*

*SSmum Dñum Nostrum*

# BENEDICTUM XIV.

PONT. OPT. MAX.

ROMANÆ SAPIENTIÆ GYMNASIUM

*Primo adeuntem XIV. Kal. Junias*

MDCCXLI.

Paulinus a S. Josepho nomine Professorum  
alloquitur.



ILLUXIT nobis dies lætitiæ & felicitatis plenus, in quo Sanctitas tua ad hanc Sapientiæ sedem se contulit : quod tibi & bonis artibus bonum, faustum, felix fortunatumque sit. Ex optatissima quidem tui præsentia nos summo gaudio ac voluptate perfundimur ; nobisque  
ma-



magnopere gratulamur, quod Universi Catholici Orbis te moderatorem conspiciamus, quem olim habuimus clarissimi hujus Gymnasii providum ac sapientem rectorem. Complura hic extant & magna (quod nemo non videt) singularis summorum Pontificum erga Romanam Sapientiam liberalitatis & beneficentiæ monumenta, quibus Leo X. præ ceteris, Sixtus V., Urbanus VIII., Alexander VII. alique de optimis disciplinis bene mereri præclarum sibi duxerunt. Haud minore sane abs te paterni amoris & benevolentiae argumenta expectamus, quem de sapientia, de doctrina literarumque studio, nemini concedere certo scimus. Summis quidem Pontificibus de Pop. Rom. optime meritis a Senatu Populoque Romano ex ære, aut marmore statuas in arce Capitolina ad posterorum memoriam collocatas fuisse videmus. Sed

Sed in hac ipsa Sapientiæ arce statuas  
tibi positas posteritas admirabitur, &  
longe quidem clariore titulo nomini  
tuo monumenta inscripta leget, nempe

BENEDICTO . XIV. PONT. MAX.

ROMANÆ . SAPIENTIÆ . PARENTI . OPT. MER.  
RESTITUTIS . AUCTISQUE . BONIS . ARTIBUS

Ad publica hæc vota unum superest,  
Beatissime Pater, ut sæpe & per an-  
nos plurimos ad nos feliciter redeas:  
quo omnes intelligant, te non olim  
tantum, sed nunc etiam esse perpe-  
tuoque futurum studiorum nostrorum  
præsidem & custodem.



DE

DE  
PROBITATE  
VIRO LITERATO  
NECESSARIA  
ORATIO IX.

*Habita VII. Kal. Decembres*  
MDCCXLI.

D d



*Emo Principi*  
**SILVIO VALENTI**  
**GONZAGA**  
**S. R. E. CARDINALI**  
 Primo SS<sup>mi</sup> Dñi Nostri Ministro.

Paulinus a S. Iosepho.



**T**ANTUS est virtutis splendor, tanta sapientie dignitas, ut in quibus ejus lumen conspiciamus, eos & amemus plurimum, & observemus quamaxime. Itaque haud miraberis, Eminentissime Princeps, quod te in isto amplitudinis gradu positum, &

D d 2 in

*in tot tantisque negotiis occupatum ego homo tenuis ac vulgaris interpellare ausim. Cum enim mihi contigerit, ut te bis adirem, teque bis alloquerer, statim præclara quædam in te sapientiæ lumina, quædam singularis ac reconditæ doctrinæ lineamenta animadverti, quæ quidem omnes, nisi quis stupidus homo sit, admirari debent magnopere atque suspicere. Tum equidem intellexi, quo pacto tibi magnorum Principum benevolentiam, cum Pontificium Nuncium apud eos ageres, adeo conciliaveris, ut illi te plurimi facerent, & liberalissime atque honorificentissime tractarent. Hinc pariter nemini permirum esse debet, quamobrem tantam a Clemente XII. Pont. Max. gratiam inieris, ut ille valde te amaret, paucisque annis, quod quidem perraro fit, ad maximam, quam potuit, dignitatem extolleret. Quid vero dicam de BENEDICTO XIV., acri judicio ac sapientia singulari principe, qui Pontifex*

*sisex Maximus vix renunciatus, protinus  
 te unum, atate ista florentem, ex omni  
 gravissimorum Cardinalium senatu admi-  
 nistrum sibi selegit, ut una tecum infinitas  
 prope Pontificii imperii curas partiretur?  
 Quo sane in munere qua dexteritate, quo  
 consilio ac judicii maturitate, bis præcipue  
 temporibus turbulentissimis, te geras, ne-  
 mo non videt. Enimvero virtutes tuas  
 præclaras & admirandas recensere, non est  
 hujus loci, aut temporis. Illud tamen si-  
 lentio non præmittam, quod huc maxi-  
 me spectat, te scilicet bonas literas impen-  
 se amare: neque in gravioribus tantum  
 disciplinis, quod plerique faciunt, acquie-  
 visse; sed complurium præterea linguarum,  
 Latine præsertim, elegantiam & castita-  
 tem probe nosse: tum etiam Geometrica  
 studia & Analyticas subtilitates, quicquid  
 demum solidam eruditionem sapit, in sinu  
 atque oculis ferre. Proinde nec mihi ve-  
 nit in mentem subvereri, ne orationem  
 hanc*

*hanc peramanter benigneque exciperes, quæ maximum tam literarum, quam literatorum ornamentum promovet, probitatem, nimirum & decus. Quid enim literæ in homine nequam & improbo, nisi gladius in vesani ac furiosi manu districtus? Tristissima quidem hac de re sexcenta habent Ecclesiæ annales exempla, quæ nulla unquam ætas satis lugebit, nulla delebit oblivio. Quare Christianæ reipublicæ interest plurimum, ut una cum integris purisque moribus optimarum artium studia conspirent. Quod profecto eveniet, si viri principes, eos præ ceteris ament, eos foveant viros literatos, qui ceteris antecellunt, non sola ostentatione doctrinæ, sed fama quoque probitatis. Itaque prodit in publicum oratio hæc mea amplissimo nomini tuo inscripta; quo & perpetuum extet meæ erga te observantiæ testimonium, & non obscurum tuæ erga probos literatosque homines benevolentiae argumentum.*

NON





NON immerito majores instituerunt, ut qui oratoris personam pro dignitate sustinere vellet, is non ingenio tantum & dicendi copia valeret, sed vitæ quoque integritate ac viri boni fama præstaret. Intelligebant enim viri sapientes, nihil fore privatis publicisque rebus eloquentia perniciosius, si illa homini nequam, tanquam latroni fida, concedatur. Et vero quod malum, aut quæ calamitas hominum generi metuenda non esset, si dicendi facultas, maleficiorum terror & innocentiae præsidium, improbitatis fieret comes & scelerum ministra? Proinde M. Cato, vir prudentissimus, oratorem eum esse censuit, qui vir bonus esset & dicendi peritus; adeo ut prius ille haberet in oratore virum bonum esse, quam eloquentem. At Quinctilianus, quo

quo nemo melius rectam oratoris institutionem expressit, eo usque in huiusmodi re progressus est, ut oratorem non modo virum bonum esse oportere contendat, sed ne futurum quidem oratorem, nisi virum bonum. Cum enim omnis dicendi vis in hoc potissimum posita sit, ut audientium animos flectat, impellat, planeque persuadeat ea, quæ bona & honesta sunt, quo pacto id faciat vir malus, qui in virtute atque honestate sibi minime constat? Aliud dicat profecto necesse est, quam sentiat. Prodit autem sese, quamvis sedulo custodiatur, diuturna vitæ simulatio: nec erit ulla tanta eloquendi facultas, aut industria, cui non titubet atque hæreat vox, si forte ab animo verba dissentiant; adeoque aut vir probus, aut plane nullus existet orator. Ego vero quanquam semper in hac ipsa summorum virorum sen-

sententia fuerim : quanquam eloquentiæ, quam rerum humanarum reginam Euripides appellabat, non invitus hanc tantam laudem tribuam, ut unus idemque animus, eadem mens eloquentiæ sit ac virtutis ; illud tamen mihi satis persuadere nequeo, eam vitæ integritatem ac boni viri famam ita unius eloquentiæ esse propriam, ut ad ceteras quoque honestissimas disciplinas non traducatur, eodemque jure ad singulas pertinere non debeat. Quasi vero minus oporteat, virum probum existere, qui philosophus, aut qui medicus, aut qui theologi personam sustinet. Profecto aut ego nihil intelligo, aut omnes, quotquot sunt optimæ artes, non minus quam eloquentia, arctissimam habent cum virtute necessitudinem : nec potest quispiam eas satis honeste colere, aut in illis quicquam proficere, nisi ad ingenii elegantiam & doctrinæ

E e co-

copiam accedat quoque præclara vitæ commendatio. Quare omnino sic statuo, integritatem morum, non ad unam eloquentiam, sed ad omnes singulasque disciplinas cum utilitate ac dignitate profitendas, esse maxime necessariam. Quo quidem argumento vix aliud quicquam ad bonarum artium laudem magnificentius fingi, aut excogitari posse existimo. Quid enim præstantius de liberalibus studiis dici possit, quam ea esse per se arctissimis vinculis cum virtute conjuncta? Atque hinc etiam optimi adolescentes, quorum potissimum causa hodierno die hæc oratio instituitur, facile intelligent, frustra se in literarum studiis dies noctesque consumere, nisi pari voluntate eodemque studio & ingeniis excolendis, & moribus ad virtutem conformandis operam dederint.

Sed erit fortasse statim, qui complures

plures in omni disciplinarum genere viros celebratissimos nobis objiciat, qui tamen nulla probitatis laude commendantur. Quot enim sive poetas, sive oratores primo Græcia, deinde Roma admirata est atque suspexit, quos tamen propter ebrietatem, aut libidinem, aut avaritiam pessime audivisse, memoriæ proditum est? Profecto neque Demosthenem, neque M. Tullium, homines integerrimos fuisse, jure quis affirmaverit: cum ille auri cupiditate, hic nimio gloriæ studio & infano quodam maledicendi furore conflagraverit. Nemo tamen oratorem summum, maximumque ingenii quasi portentum, utrumque extitisse negaverit. Quemadmodum enim Demosthenes cum esset dicturus, e tota Græcia ad eum audiendum concursus fieri solebat, ut Plutarchus testatus est; ita Cicero tantum dicendo valuit, ut

E e 2 plu-

plures eum eloquentia victorias, quam Romanos armis, consequutum fuisse, Cæsar assereret. Hæret hic animus, non est quod dissimulem. At vero non desunt viri clarissimi, qui in ejusmodi vitiis tum Demosthenem, tum M. Tullium excusent; ut plura in eos ab inimicis conficta crimina, quam illi revera admiserint, arbitrentur. Ego tamen libere dicam, quod sentio. Fuisse in illis, negari non potest, vitia nonnulla, at virtutes quoque plurimæ ac maximæ: quæ magno sui splendore fecerunt, ut vitia illa ex oculis hominum quasi evanescerent. Quanta enim fuit animi fortitudo atque constantia, qua alter sæpe Philippi potentissimi regis conatus elusit, alter tum Catilinæ conjurationi, tum Clodiano furori sese opposuit? Quantus in utroque patriæ libertatis amor? Quantum in liberis, focis, aris, fortunisque civium

vium suorum defendendis studium, quo illi ad supremum usque spiritum inflammati fuerunt atque incensi? Itaque mirandum non est, quod aliquot vitiorum nubeculas tam eximiæ splendideque virtutes luce sua obruerint ac pene deleverint. Enimvero si quis nihilominus celeberrimum utrumque oratorem virum probum fuisse pernegaverit, non repugnabo. Fuerit quidem uterque vir malus: quid tum? Nonne miserrimus eorum finis, quo uterque vivere desit, satis superque ostendit, eloquentiam in homine malo diu valere, diuque non posse consistere? Misere uterque periit: uterque dedit contaminatæ eloquentiæ gravissimas poenas. Illud sane est memoria dignum, quod C. Plinius junior ad Corelliam Hispulam, foeminam primariam viro suo orbatam, scribit de eloquentiæ magistro adolescentulo ejus filio perquir-

ren-

rendo. Etenim cum illi Julium quemdam Genitorem, hominem non minus integritate vitæ & morum gravitate, quam dicendi facultate præclarum prætulisset: huic, inquit, eum trade, Diis juvantibus, præceptori, a quo mores primum, mox eloquentiam discat, quæ male sine moribus discitur. O dictum sapientiæ plenum. O vocem vel Christiano homine dignam. Audierat nempe Plinius a Quinctiliano magistro id, quod antea diximus, non posse oratorem existere, nisi virum bonum: audierat maxime referre in puero, ut is a præceptore probitatem mature doceatur: sine qua vel nulla datur eloquentia, vel si qua forte datur, sit ipsi homini eloquenti, tum aliis quoque perniciēs summa atque calamitas. Quid vero dicam de tot non modo vetustiorum temporum, sed recentioris quoque ætatis clarissimis poetis, qui quod  
inge-



ingenii elegantiam vivendi turpitudine, aut loquendi licentia dehonestarent, partim exilio, partim diuturno carcere, partim etiam capite debitas sceleris sui poenas persolverunt? Testes sunt Euripides, Nafones, Marini, Murtulæ, Boccalini, aliique sexcenti, de quorum calamitate ac tristissimo vitæ exitu annales loquuntur.

Quod si poetis & oratoribus prætermiſſis, ad philosophos convertamur, quænam, Deus immortalis, existit in tota rerum universitate hominum natio, cui magis quam philosophis, a vitiis abesse procul, & virtutem in sinu atque oculis ferre, consentaneum sit? Una semper fuit sapientum vox, Philosophiam esse honestatis, continentiae, fidei, justitiæ ceterarumque virtutum parentem & magistram. Illam proinde M. Tullius humanæ vitæ ducem, virtutis indagatricem & expultri-

pultricem vitiorum appellat : illam Plato donum & inventum Deorum immortalium , quo homini majus , aut melius datum non fuerit . Quamquam enim a primis usque temporibus indagandæ veritatis studium philosophos ipsos in sectas pene infinitas propagaverit , adeo ut M. Varro ætate sua ad ducentas supra octoginta numeraret ; omnes tamen sive Stoici , sive Academici , sive Peripatetici , aut alio quovis nomine philosophi , mirifice consenserunt in iis , quæ in honestate vitæ morumque disciplina versantur . Una omnium fuit mens stabilisque sententia , pravas animi cupiditates coercendas esse , ac virtutem rebus omnibus anteferendam . Itaque Plato pulcherrimæ illius reipublicæ , quam ipse optimis legibus & institutis ad formam ceterarum sic effinxit , ut omnia in illa ad bene beateque vivendum conspira-

spira-

spirarent, non aliis magistratus & imperia destinavit, quam philosophis: quod hi nimirum, ut ipse ait, homines sint temperati, fortes, iusti, magnanimi omnique virtutum genere instructi. Atque hinc illud sapientissimum ejusdem philosophi apud omnes pervagatissimum, tum demum beatas fore civitates, cum aut philosophi regnarent, aut reges philosopharentur.

At dicet quispiam, cur ergo philosophi e civitatibus fuere sæpius ejecti? Unde tot absurdæ distortæque opiniones, ut teste Varrone, nemo ægrotus quicquam tam infandum somniet, quod non dixerit aliquis philosophorum? Ita sane sit. Enimvero si qui sunt, aut olim fuerunt philosophi, qui indignas homine voluptates, ut de Epicureis fama est, commendaverint: vel qui utile ab honesto sejunxerint, vel qui, Deorum immortalium sublato metu, in omne

F f                    sce-

scelus iter patefecerint; hos ego vere philosophos fuisse pernego, sed Philosophiæ probrum & sapientiæ hostes improbiſſimos magna voce pronuncio. Spuriſ quidem & adulterinos philosophos vocabat Socrates homines ejusmodi, qui non sapientiam, cujus se falso amatores prædicant, sed temeritatem, non doctrinam, sed errorem, pessime conſectantur. In hunc profecto gregem conjiciendi sunt Pomponatius, Abailardus, Cesalpinus, Cremoninus aliiſque complures, qui vita moribusque corrupti, absurda quædam & improba de immortalitate animorum ac de sanctissima nostra religione somniarunt; quique, præter inanissimum Philosophiæ nomen, nihil solidum, nihil Philosophia dignum posteritati reliquerunt.

Jam vero alio me vocant præstantissimæ disciplinæ Jurisprudentia & Medici-

dicina, duo scilicet Romani hujus Gymnasii clarissima lumina. Quis autem statim non videt, quam innocentem integreque vivere debeant ii, qui alterutrus nobilissimæ facultatis studium operamque suscipiunt? At nemo certe, nisi amens sit & omni ratione destitutus, fortunas, aut incolumitatem suam commissam velit homini, non dico nequam, sed de cujus probitate ac fide vel minimum suspicari quis possit. Actum esset de republica, si hujus generis disciplinæ, quibus & opes & communis salus continentur, perditorum hominum licentiæ ac libidini traderentur. Et revera quo pacto sanctissimarum legum majestatem, quæ virtuti præmia, flagitiis supplicia decernunt, tueri queat vir malus, scelerum suorum conscientia plane convictus? Qua fronte in aliis peccata reprehendet, in quibus ipse conscius & socius habetur? An.

F f 2

pro-

promissa , pacta , conventa nobis servanda esse suadebit is , cui humana & divina jura pervertere jocus sit ? Sed esto : perfrixtæ frontis homini id concedatur . Jurisprudentiam cum multis in rebus , tum in consultatione consiliisque dandis , plurimum valere certum est . Nemo enim temere nulloque advocato consilio , testæ , penates , liberos ac dignitatem suam foro judiciorumque tempestati committit . Quis autem ignorat , quantam in consiliis vim habeat spectata virtus , fidei & religionis opinio ? Omnes scilicet virtute , aut virtutis specie & opinione ducimur . Nulla vero in consilio inest vis atque auctoritas , ubi de consiliarii integritate ac virtute dubitari ullo modo possit . Quare Solon , vir sapientissimus , admonebat , ut non tam jurijurando , quam probitati fides haberetur . In foro autem quis non videt , quantum  
va-

valeant , præter ingenium & doctrinam , splendor nominis , existimatio hominum & vitæ præclare actæ dignitas ? Contra vero sæpe fit , ut nulla fides , etiam vera dicenti , habeatur ; & talis advocatus videatur esse malæ causæ argumentum . Hinc Asinius Pollio , qui pro Urbinæ hæredibus in forum venerat , statim ac Labienum adversariorum patronum aspexit , eam causam malam esse exclamavit , quod a Labieno defenderetur . Itaque non immerito Quinctilianus oratori , quem ad forum & judicia exercenda instituebat , Philosophiam moralem apprime necessariam esse asseverat ; neque posse aliquem sine accurata morum disciplina fieri bonum utilemque causarum defensorem .

De Medicina vero quid loquar ? Satis est Hippocratis libros vel leviter percurrisse , ut quis intelligat , quam  
sæ-

sæpe & graviter vir sapientissimus Medicinam professuris inculcaverit religionem Deorum immortalium, honestatem vitæ morumque integritatem. Nam præter memorabilem illam de purgatione morali lucubrationem, in qua ipse non tam medici, quam philosophi morales, & viri sapientis munus sustinens, a medico prava mores, avaritiæ labem, & effrænatas animi cupiditates exulare jubet: quocirca neque Socrati, neque Platoni de sapientia quicquam concedere videtur; cui maximam admirationem non moveant ea, quæ in lib. de jurejurando memoriæ tradidit? Mirum, quantum in eo pietatem & reverentiam erga Deos commendet Medicinæ cultoribus, quibus mandat, ut, nisi divino numine invocato, in ægros curandos non ingrediantur. Quod quidem institutum utinam ætate quoque nostra teneretur: fortasse ipsi Medici-



dicinæ magistri in tantis difficillimæ artis tenebris nunc minus offenderent. Quoties autem vir magnus conditionem eorum, qui sese ad studium tam arduæ scientiæ daturi sunt, diligenter expendit, toties monet, una cum scientia præclaros mores esse conjungendos. Habeant, inquit, doctrinam, bonos & generosos mores. Intelligebat enim vir prudentissimus, medicæ facultatis, per quam homines publicæ salutis præsides constituti ad Deos prope ipsos accedere videntur, dignitatem omnem esse interituram, nisi ad illam utendam homines probi ac bene morati admoverentur. Intelligebat medici improbitatem nemini non fore periculofam, & magis quam morbus, infestam ac metuendam. Verum quid vos diutius in re minime obscura detineo? Quasi vero, ut antea dixi, homines tam amentes, aut oscitantes dari

ri possint , ut cum eorum agitur salus, ad alium, quam ad probum & præclari nominis virum reipsa confugiant.

Quid autem statuendum esse putatis de iis, qui non humanæ alicui facultati, sed omnium integerrimæ ac divinæ, Theologiæ nomen dederunt? Eritne quisquam, qui dubitet, singularem animi probitatem ad virum theologum pertinere? Ego equidem sic existimo, neminem dici posse theologum, cujus vitæ ratio theologo plane digna non sit. Profecto ipsum Theologiæ nomen adeo per se sacrum & divinum est, ut quicquid, non dicam improbum & flagitiosum, sed humanæ imbecillitati affine est, ab hujus scientiæ cultoribus abhorrere prorsus videatur. Irridebat Cicero Epicurum, quod is temperantiam quidem laudaret, interim vero in voluptate, quæ temperantiæ inimica est, summum bo-

bonum collocaret. Quid si forte fieret, ut qui serio perpetuoque agunt de Deo immortali, de virtutibus Christiano homine dignis, de felicitate sempiterna beatorum, & si vis etiam, de poenis impiorum apud inferos præparatis, de quibus omnibus persuasissimum nobis esse volunt, ipsi autem longe alias vivendi rationes sequerentur? Anne minus hujusmodi homines essent irridendi? Mores integri & incorrupti, Aristoteles inquit, fidem præcipuam faciunt. Qui aliter vivunt ac docent, hi profecto eorum similes esse videntur, qui agunt in scena, quique statim ac a scena ipsa recesserunt, nihil eorum curant, quæ paulo ante summa voluntate curare videbantur. Ex istorum fortasse licentia permanavit in vulgus: eum religionem amittere, qui amicitias colit theologorum. O vox improba ac nefaria, quæ crimen paucorum

G g rum

rum in universum theologorum sanctissimum coetum detorquet. Quot enim sunt ante oculos nostros in hac civitate clarissimi viri, qui non minus pietate & religione, quam theologicis studiis excellunt, quique integerrimæ vitæ ratione calumniam hujusmodi diluunt prorsus atque refutant? Enimvero ex hac ipsa vulgi opinione, qualiscunque demum ea sit, illud manifestum consequitur, rem absurdam & incredibilem videri, aliquem posse sine splendore virtutis theologum existere, quod nimirum theologia & religio, religio & virtus, uno eodemque spiritu vivere videantur.

At vero quanti demum intersit ad omnes generatim disciplinas innocentia morum & virtus, ex iis, quæ brevissime dicam, facile dignoscetis. Nemo in literis tam hospes, aut tam parum exercitatus est, qui illud ignoret, ad præ-

præclarum aliquem in bonis literis progressum faciendum, præter ingenii acumen & intelligendi solertiam, maxime requiri sedati placidique animi tranquillitatem. Experientia quippe docemur, si qua alia in re, tum præcipue in literarum studiis, id quod Cicero longo rerum usu præditus dicere solebat: turbatum animum non esse aptum ad exequendum munus suum. Quæ autem major, aut quæ optimis studiis magis inimica animi perturbatio, quam quæ a vitiis pravisque cupiditatibus ortum habet? Obruunt prorsus omnem ingenii vim ejusmodi motus: & alacritas illa mentis, quam literarum studia deponunt, in ea animi jactatione languet ac deficit. Atque hinc quemadmodum qui infirma sunt oculorum acie, lucem solis intueri sine molestia haud possunt, ita qui ægro animo sunt ab studiis prope abhorrent, & lite-

rarum genus omne fastidiunt atque averſantur. Huc accedit, quod iſtiusmodi homines a literatorum virorum ſocietate atque ab omni cum illis amicitia uſu prohibeantur. Amant quidem homines eruditi familiaritatem & jucundiffimos amicorum congreſſus. Illa enim ſive ingeniorum, ſive ſtudio- rum ſimilitudo facit, ut ſeſe mutuo videre & alloqui gaudeant; ibi multa de optimis diſciplinis, multa de rebus domi foriſque præclare geſtis inter ſe loqui ſolent; atque ita moleſtiſſimas diei horas ſuavitate ſermonis placidoque otio traducunt. Quis autem in hoc tali virorum coetu diu ferat hominem, liberalibus quidem ſtudiis ex- cultum, ſed moroſum, ſed iracundum, aut maledicum, qui ad omnia prope irafcatur, qui de republica, de princi- pe, ac de religione quoque ipſa libe- rius imprudenterque eloquatur? Ami-  
citia

citia profecto a natura data est, non-  
 vitiorum illecebra & incitamentum (ut  
 apud Ciceronem Lælius contendebat)  
 sed comes & adjutrix virtutum; eique  
 maximum ornamentum tollit, qui ex  
 ea tollit id quod rectum & honestum.  
 Idcirco sapientes, nisi in bonis & ho-  
 nestis viris, amicitiam dari posse per-  
 negarunt. Ego olim memini quos-  
 dam in hac Urbe literatos, homines  
 revera non mediocriter doctos, quo-  
 rum tamen consuetudinem familiarita-  
 temque plerique fugere & averfari so-  
 lebant; non aliam sane ob causam,  
 quam quod omnis literarum respublica  
 eorum supercilio niti videretur. Ama-  
 bant omnes, quantum ego intellige-  
 bam, multiplicem eorum doctrinam,  
 rerumque maximarum, quibus illi in-  
 structi erant, scientiam: sed nemo  
 æquo animo ferre poterat ipsorum va-  
 nitatem & arrogantiam; quod nimi-  
 rum

rum se solos doctrinæ principes facerent, quod parem sibi neminem vel-  
lent, quod omnia denique ad libidinem suam vituperarent. Itaque viri prudentes satius esse putabant, milites illos Plautinos fugere, quam pati projectam eorum audaciam atque superbiam: quæ plerunque causa est, cur tot clari literatura viri omnibus defectui sint, & nullum eorum ingenia præmium, nullam dignitatem consequantur. Conqueruntur sæpe multi de infelicitate literatorum, & quotidiano fere sermone percubuit; jam prope conclamatum esse de literis: neminem hoc tempore, in Italia præsertim, existere, qui, ut olim, gratia, auctoritate, tum etiam opibus, literarum studia foveat atque amplificet: principes quidem alias bonarum artium cupidos studiorumque fautores, jam longe aliud moliri, & minime omnium  
nium



nium de optimis disciplinis cogitare ; adeoque cum Mæcenates desint , mirum non esse , cur non dentur , ut poeta ait , Marones . Ego equidem nolo publicæ hujusmodi querelæ me opponere : nolo tam pervagatæ opinioni repugnare ; illud tamen dico , sæpe literatorum vitio fieri , ut nullum habeant literæ patrocinium . Quis enim domi alere , aut fortunis opibusque augere velit homines , certe quidem ingenio & eruditione præstantes , sed turbidos & ingratos ( in quo sane vitio nihil mali non inest ) tum etiam ad diffidia & rixas prope factos , qui dicacitate , aut scribendi licentia nemini parcant ? In domum recepit splendide satis ac liberaliter superiore memoria Carolus Emanuel Sabaudia dux Jo: Baptistam Marinum , poetam ejus temporis celeberrimum , quem præter alia beneficia , quibus illum large cumulavit ,

vit, sanctorum quoque Mauritiî & Lazari militari ornatu decoravit. Quid postea? Homo æque imprudens ac beneficiorum omnium immemor, libellis quibusdam editis, tum aliis causis, ita optimi ac beneficentissimi principis animum offendit, ut nisi mite illius ingenium & a cæde hominum abhorrens obstitisset, Marinus temeritatis suæ poenas capite persolvisset. Quid vero de Joanne Ciampolo loquar? qui propter elegantiam ingenii & singularem eruditionem cum apud Urbanum VIII. Pont. Max. summo loco & gratia floreret, homo superbus & inflatus, nimia loquendi libertate carpendique vitio id effecit, ut a liberalissimo Pontifice tum ab aula, tum etiam ab Urbe, specie quadam honoris, dimoveretur: quem deinde, ut se revocaret, neque suis, neque amicorum precibus exorare unquam potuit.

tuit. Dies me citius, quam oratio deficiat, si plura id genus enumerare velim, quæ apud Joannem Pierium Valerianum, Cornelium Tolleum atque alios extant de infelicitate literatorum argumenta sane luculentissima, quibus liquido apparet, ingenium & doctrinam sine probitate pestem hominibus calamitatemque importare. Non ergo errori hominum, aut fortunæ temeritati tribuendum, quod persæpe videamus, viris perexiguo ingenio & mediocri doctrina ornatis, dignitates & honores amplissimos deferri: contra vero alios in oblivione jacere, qui, quod acriori essent judicio, & scientia ampliori abundarent, jam esse in vado, & in portu navigare videbantur. Plus illorum profecto valuit doctrinæ mediocritas, ab integris purisque moribus commendata, quam stulta & inanis istorum sapientia, qui

H h                      sibi

sibi minus quam aliis sapere didicerunt. Neque enim viri principes putant, reipublicæ multum interesse eloquentiam, scientiam juris aliasque liberales disciplinas, nisi his quoque gravitas & honestas morum vitæque magistra prudentia accedant. Itaque M. Tullius, vir singulari consilio sapientiaque instructus, Marcum filium graviter admonuit, ut viri boni nomen præ ceteris rebus tueretur, atque illud commodis & fortunis omnibus anteferret. Non est, inquit, ulla res tanti, aut commodum ullum tam expetendum, ut viri boni & splendorem & nomen amittas. O præclaram & admirandam hominis sapientissimi vocem. O divinum & salutare optimi parentis monitum. Non opes & fortunas, non fasces & imperia comparanda filio proponit, sed viri boni & honesti nomen. Utinam nostra quoque ætate parentes in liberos suos,

suos egregia indole & ingenio ornatos, tam sapientes animi sensus infunderent. Utinam illos patria charitate mone-  
rent, ut honestatem & famam in ocu-  
lis perpetuo ferant, nulla cum re com-  
mutandam: qua semel amissa, tum  
de ingenio, tum de omni doctrinæ  
spe, actum esse intelligant. Quod si  
forte parentes cæco amore ducti libe-  
ros suos, non tam ad virtutem & ho-  
nestatem, quam ad opes & magistra-  
tus assequendos cohortantur; ad vos  
illud spectat, clarissimi bonarum ar-  
tium magistri, qui parentum ipsorum  
vices auctoritatemque suscepistis. Vos,  
inquam, adolescentes ipsos, auditores  
vestros, pro dignitate vestra ac sapien-  
tia sæpe commonere debetis: doctri-  
nam sine virtute exitium fieri atque  
infortunium: frustra se Romæ ab opti-  
mis studiis opes & honores quærere,  
frustra principum virorum expectare

benevolentiam & gratiam, nisi præclara vitæ ratio scientiæ ingenioque præluceat. Non esse Romæ, quod quidam improbi dictitant, omnia expostita; & pecuniæ magnitudine, aut potentis alicujus gratia, ad omnia aditum patefieri. Fuerint hæc vitia temporum præteritorum. Nostra quidem, tum superior ætas, eos vidit sanctissimos principes, qui non minus innocentiam vitæ, quam doctrinæ præstantiam ante oculos habuerunt. Horum nemini profecto concedit BENEDICTUS XIV. optimus ac sapientissimus Pontifex, qui cum in omni vitæ genere præclarissimarum rerum scientiam cum maxima vitæ honestate ac singulari virtute conjunxerit, non est dubitandum, quin hominum commendationem cum ab ingenio, tum a virtute ducat; atque eos præ ceteris maximis præmiis, honoribus ac beneficiis

ficiis sit ornaturus, qui ipsius non dissimiles, & doctrina & probitate præstabunt. Tam magnum & præclarum summæ auctoritatis exemplum cohortationibus vestris, optimi præceptores, fidem & robur, idemque orationi meæ terminum dabit.



DE

DE  
VI ET POTESTATE  
L I T E R A R U M  
O R A T I O X.

*Habita VII. Kal. Decembres*

MDCCLII.



*Emo Principi*

NICOLAO JUDICE

S. R. E. CARDINALI

Paulinus a S. Josepho S. P. D.



INGULARIS illa tua ac nemini non perspecta humanitas, qua me primum ab eo tempore, cum, Clemente XI. Pontifice Maximo, Apostolici Palatii praefecturam summam cum laude gereres, complexus es, Et qua deinde a Benedicto XIII. Cardinalis renunciatus, me semper, quaecunque se dedit occasio, prosequutus es singulariter, certe postulare videbatur, ut observantiam erga te meam aliqua literarum signi-

gnificatione publice testarer. Sed cum satis exploratum mihi esset acre illud ac perspicax tuum de bonis literis studiisque doctrinarum iudicium, facile intelligebam, nihil tibi probatum fore, nisi quod esset ingenio summe elaboratum atque perfectum. Itaque diem exspectabam, in qua tandem rude donatus, ab hoc publico diuturnoque docendi munere feriari possem; tantumque mihi otii suppeteret, quantum Geometricis quibusdam, quæ sæpe tecum communicaveram, cogitatis meis perficiendis limandisque satis esset: quæ quidem nomini tuo nuncupare statueram, ut tuorum essent erga me beneficiorum perpetuum monumentum. Sed cum interim docti quidam viri ex iis; qui domum tuam, tanquam bonarum artium & sapientiæ officinam frequentare solent, ad te detulerint, se illo die summa cum voluptate in Romano Gymnasio de singulari vi ac potestate literarum in animis hominum

per-

pervincendis me dicentem audiuisse, cum  
 scilicet solenni oratione studiorum initia  
 celebrarem; postero die unus ex familia-  
 ribus tuis ad me venit nomine tuo mihi  
 perhumaniter gratulatum, qui mihi affir-  
 mavit, te orationem ipsam perlegendam  
 valde cupere. Nihil moror: ecce illam,  
 qualiscunque ea sit, ad te mitto; obte-  
 storque te plurimum, ut quicquid in ipsa  
 minus emendate, minus polite diserteque  
 dictum offenderis, illud omne censoria ani-  
 madversione libere notes, expungas, cor-  
 rigas. Nihil enim mihi gratius, nihil  
 optabilius accidere poterit, quam, talem  
 virum sapientia, doctrina, literisque ex-  
 cultum, studiorum meorum judicem ac cen-  
 sorem habere. Interea vero pro tuis erga  
 me meritis dum tibi aliquam referre gra-  
 tiam, ut antea dixi, cogitabam, novo  
 me beneficii genere tibi me devinctum ef-  
 fe intelligo. E Collegio Nazareno VI.  
 Kal. Decembres MDCCXLII.



UO plura sunt, PP. amplissimi, quæ ad optimarum artium laudes celebrandas quotannis ex hoc loco afferuntur, eo certioribus argumentis intelligere potestis, nullum esse lumen ingenii, nullum eloquentiæ flumen, nullamque dicendi copiam, quæ earum dignitatem circumscribere possit, certisque terminis definire. Nam cum jam toties de illis, celeberrimo hoc die recurrente, clarissimi oratores verba fecerint, adhuc tamen tam multa, tam varia, tamque splendida sese offerunt argumenta, ut non tam invenire quid dicam, quam seligere quid potissimum dicendum sit, res mihi omnium longe difficillima videatur. Vix enim literas cogito, cum statim occurrunt animo utilitates & uberrima commoda, quibus illæ hominum vitam augent: occurrit

currit splendor & gloria, quam cuique amplissimam afferunt: occurrit voluptas maxima & incredibilis jucunditas, qua nos in omni fortunæ gradu cumulatissime afficiunt; ut proinde in tanta rerum dicendarum copia quid agam, quo me vertam, aut quam viam insistam, prorsus ignorem. At vero in tam ancipiti deliberatione cum diu multumque versatus essem, unam tandem animo prospexi literarum præstantiam ceteris præferendam, longeque ceteris illustriorem, quam & celebritate hujus loci & sapientia vestra dignam fore judicavi. Animadverti scilicet, eam esse literarum vim incredibilem ac prope divinam, ut in animis quoque hominum imperium habeant ac potestatem. Qua quidem re quid præclarius ad bonarum artium dignitatem dici, aut quid majus excogitari unquam possit, minime video.

Neque enim tenuis, aut vulgaris agitur doctrinæ triumphus, si elatos mortalium animos ac natura superbos illa vincere queat, sibi que subicere. Itaque nemini, quemadmodum spero, injucunda erit oratio mea: nam & vos, Adolescentes optimi, qui tandem futuri sint studiorum vestrorum fructus jam inde cognoscetis, & vos, PP. amplissimi, taciti reputabitis, quæ sint dignitatis vestræ ornamenta, & in quo gloriæ fastigio vos ipsa literarum studia collocaverint.

Quanta sit doctrinæ vis, quantumque in animis hominum valeat, poetæ fabulis pulcherrime fictis rem non obscure adumbrarunt: Orphei præsertim, quem dulcedine lyræ non modo sylvas & saxa ad se trahere, sed etiam feras immites & flumina cantu detinere finxerunt: qui proinde crudeles tigres & rapidos leones lenire,

ab

ab Horatio dictus est. At vero non ille sylvas, ut D. Gregorius Nazianzenus ait, sed sylvarum incolas vi & suavitate loquendi traxit: non saxa, sed dura hominum pectora mollivit: non feras, sed efferatos hominum mores mitigavit; postremo non flumina, sed juvenes in omnem voluptatem defluentes continuit. Equidem hac ratione primis illis temporibus conditæ urbes, & civitates constitutæ sunt. Sic abducti ab agris & sylvis homines, fera agrestisque vita mutata, leges rogatæ, jura judiciaque descripta, sapientis videlicet viri doctrina atque eloquentia. Neque aliud certe fuit regnorum initium; regumque nomen & potestas non aliunde profecta est. Nam cum aliquis in civitate existeret, qui ceteris sapientia præstaret, & quid æquum, quid iniquum, quid utile, quid honestum sit, sapienter definiret; quique

que præterea res tum privatas, tum publicas optime administrandi rationem traderet, populus ad eum frequens convenire, ab eo tum de bello, tum de pace consilium capere, atque ex ejus imperio, non vi & armis, sed voluntate & obsequio omnia facere, consuevit. Sic ille Nestor, cujus ex ore melle dulcior fluebat oratio, Piliis imperasse dicitur: sic Evander in Latio imperium tenuit auctoritate, quam sibi apud rudes populos admiratione literarum conciliavit: sic denique Numa Romanis leges præscripsit, singularis sapientiæ fama & Egeriæ Deæ colloquio celebratus. Itaque quod strenui duces ac fortissimi imperatores copiis atque exercitu instructi, & omnia vi, minis, igne ferroque vastantes, vix tamen obtinent, ut populos in ditionem suam redigant, id olim per se nullis armis nulloque terrore militum obti-



obtinuit doctrinæ ratio, cum tot illi gentes ac populi sese ultro dederint. Consecutis inde temporibus, omnes optime institutæ civitates, omnes liberi populi, omnes præclaræ respublicæ semper apud se doctissimos viros habere studuerunt, quos de politicis rebus, de œconomicis, de legibus, de judiciis ac de omni civili scientia consulerent. In his fuere Solon, Lycurgus, Zoroaster, Trismegistus aliique plurimi, qui sanctissimis legibus & institutis cives suos sapientissime gubernarunt. Neque vero mirum, quod populos ita doctrinæ fama sibi subjecerit, cui clarissimi quoque duces & imperatores terrarum orbis victores, manus dare, & ab ea vinci præclarum sibi duxerunt. Philippus rex Macedonum, vir magnitudine animi, & bellicis laudibus cum paucis comparandus, Athenienses bello gravi diuturnoque

noque vicerat ; cumque Athenas in suam potestatem redegisset, communis fuit tum ducum, tum etiam amicorum regis sententia, ut rex urbem sibi, ac Macedonum nomini tot annos infestissimam aliquando everteret, everfamque solo æquaret. Sed Philippus, eorum spreto consilio, recusavit, urbem doctrinæ, ut ipse ait, & literarum theatrum excindere. Quid vero Gn. ille Pompejus tot tantisque victoriis Europa, Asia, atque Africa terra marique partis jure optimo magnus, qui Possidonii philosophi auditor fieri, ejusque postibus laureatos fasces submittere, gloriæ sibi duxit? Quid C. Cæsar, qui M. Tullium Pompejanas partes secutum post Pharsalicum prælium non modo in gratiam recepit, sed eum quoque deinde perpetuo & coluit & singulari humanitate complexus est ; quod divinam ejus eloquentiam tanti faceret, ut

ut illum omnium triumphorum laurea dignum affirmaverit, multo præclarius esse asseverans, ingenii & Romanæ linguæ terminos, quam imperii fines promovere. Enimvero admirabilem esse literarum vim inde clarius intelligetis, si in perversis hominum moribus castigandis, pravisque affectibus leniendis eas plurimum posse animadvertatis. Omnes quidem, quotquot homines sunt, probe norunt, perturbationes animi morbos esse graves & periculosos, quibus ille longe deterius, quam æstu febrique corpora, conflictatur. Quid enim aliud est amor, odium, metus, voluptas, dolor, nisi gravissimæ animorum ægritudines, quibus illi misere cruciantur? Quarum sæpe tanta vis est atque acerbitas, ut homines ab iis intereant, vel impatientes morbi voluntariam sibi ipsi mortem consciscant. Quot, quæso, amor usque ad insaniam

K k

in-

induxit? Quot dolor exulceravit? Quot  
moeror ad mortem adegit? Sed plu-  
res profecto sanavit pharmacum illud,  
quod Homerus Nepenthes nominavit,  
sermo scilicet doctrina conditus. Hoc  
nimirum Helena Telemachum hospi-  
tem ingenti moerore confectum ad hi-  
laritatem revocavit, cum inter pocula  
paternam Ulyssis virtutem, resque ab  
eo præclare gestas commemorans, ado-  
lescentis animum reddidit alacriorem.  
Et sane quorsum spectabant Tuscula-  
næ M. Tullii quæstiones de tolerando  
dolore, de ægritudine lenienda, ac de  
reliquis animi perturbationibus sedan-  
dis? Quo tendebant Platonis, Clito-  
machi, Carneadis, & aliorum de lu-  
ctu minuendo opuscula? Quo virorum  
illustrium tot de consolatione com-  
mentaria, Sulpitii ad Ciceronem, Ci-  
ceronis ipsius ad semet de interitu fi-  
liæ consolandum, Senecæ consolatio  
ad

ad Polybium, ad Marciam, ad Helviam matrem, Plutarchi ad Apollonium, ad uxorem; & scripta alia, quibus viri sapientes parem magnitudini doloris medicinam attulerunt? Intelligebant enim ejusmodi viri, extremis malis extrema remedia esse adhibenda: proinde Philosophiæ præceptis atque omni doctrinæ genere usi sunt, qua sola potentissima vi sese malorum acerbitati mederi, & languentes ac prope desperatos animos ad sanitatem posse traducere putaverunt. Audite quid M. Tullius in Tusculanis quæstionibus de consolatione dicat, quam ipse sibi ob amissam carissimam filiam pene doloris vi exanimato, a literis & doctrina quæfivit. Ægritudinis sedatio, inquit, & hesternæ disputatione sedata est, & in consolationis libro, quem in medio (non enim sapientes eramus) mœrore & dolore conscripsimus. Quodque ve-

tat Chrysippus ad recentes quasi tumores animi remedium adhibere, id nos fecimus, naturæque vim attulimus, ut magnitudini medicinæ doloris magnitudo concederet. O magna doctrinæ vis, quæ acerbissimum vulnus paterno pectori recens inflictum, si minus sanare, at certe lenire potuit.

Verum inter ceteras animi ægritudines, quibus homines, quasi mortifero morbo urgeri, atque admodum dies noctesque vexari solent, duæ sunt omnium maxime periculosæ, libido atque iracundia. Sunt hæ profecto geminæ furiaë tædis ardentibus armatæ, quæ hominem in omne flagitiorum genus præcipitem agunt: neque ulla vis est, aut virtus, quæ illum cohibere possit atque retrahere. Non parentum obsequia, non amicorum consilia, non suppliciorum metus, non ipsa vitæ discrimina quicquam valent, ut animus ab alteru-

terutra hujusmodi face inflammatus, queat a concepto scelere dimoveri. Rationis enim lumine orbatus, in præceps ruat necesse est. Sed o admirandam, literarum virtutem, o vim doctrinæ incredibilem: attendite, quæso, factum singulari admiratione dignum, quod nisi Valerius Maximus, Diogenes Laërtius, Lucianus, tum etiam ex nostris sanctissimi viri Hieronymus, Augustinus & Ambrosius literis tradidissent, vix cuiquam credibile videretur. Erat Athenis Polemo, adolescens luxuria perditissimus, a summo mane ad vespæram usque ebrius & crapulæ indulgens, quem Athenienses, ut Lucianus refert, se nunquam sobrium vidisse affirmabant. Hic, lucente jam sole, e nocturno convivio domum rediens, ut erat unguentis delibutus, floribus coronatus & pellucida veste amictus, Xenocratis celeberrimi philosophi scholam,

lam, doctorum hominum turba refer-  
tam ingreditur. Atque hic crapulam,  
exhalans vinoque languidus, non mo-  
do inter honestissimos juvenes eo la-  
sciviæ habitu confedit, sed etiam ore  
impuro disputationem interpellare au-  
sus est. Tum omnes indignitate rei  
commoti, stomachari, fremere, indi-  
gnari audacissimi hominis petulantiam.  
At Xenocrates, vultu nihil immuta-  
to, omissis iis, de quibus diserebat,  
de modestia ac temperantia loqui coe-  
pit, tanta quidem vi & gravitate, ut  
Polemo quasi gravi somno experrectus,  
statim resipiscere visus sit. Proinde pri-  
mum coronam capite detractam proij-  
cit, deinde brachium in pudoris & mo-  
destiæ signum intra pallium reducit,  
demum effusam oris hilaritatem contra-  
xit, atque omnem prorsus luxuriam  
ac turpitudinem abdicavit; adeo ut &  
philosophus postea clarus evaserit, &  
ipfi



ipsi magistro in schola regenda successerit. Ecquis quantum doctrina valeat, plane non videt, si ex una Xenocratis lectione juvenem perditum luxuria pudicum & continentem, turpissimum ganeonem philosophum præclarum fieri videat? Quid si dicam illum ipsum in reliqua vita ea gravitate, temperantia ac pudore se gessisse, ut ad eum scorta accedere non auderent? O inauditam sapientiæ virtutem omnium literis & prædicatione dignam. At vero de iracundia, quam Ennius insanix principium esse dixit, haud minorem victoriam attendite. Hanc autem eloquentia, quæ flexanima non immerito a Pacuvio poeta dicta est, veluti propriam sibi vindicat: quam proinde vobis, studiosi eloquentiæ adolescentes, longe jucundiores fore non dubito. Oderat C. Cæsar Q. Ligarium acerbis animo atque infesto, quod ille pro  
Gn.

Gn. Pompejo in acie Pharsalica steterat, tum etiam quod multa alia contra dignitatem suam eum fecisse non ignorabat. Quamobrem constituerat apud se cum eo nullo unquam tempore reconciliari. Cum autem Ciceronem pro eodem Ligario sibi supplicaturum audire non recusasset, amicos præmonuit, Ciceronem abs se, non ignoscendi animo, sed officii gratia auditum iri. Quid enim obstat, ait, quo minus M. Tullium pro Ligario dicentem audiamus, quem jampridem hominem improbum & hostem nostrum esse constat? Age porro: dixit Cicero pro Ligario, at tanta dicendi arte atque ingenio, tanta ipsius Cæsaris propter clementiam commendatione, tantaque erga reum miseratione ac precibus, ut Cæsar, mutata voluntate, injurias omnes Ligario condonaverit, atque in gratiam receperit. Sed audite rem a Plutarcho diligen-

ligentius expositam. Posteaquam Cicerō (inquit) dicere orsus est, mirifice eum commovit: variisque affectibus & mira gratia ejus oratio ita progressa est, ut colorem identidem Cæsaris facies variaret, perspicuumque omnibus esset, eum animi motibus concitari & ad misericordiam flecti. Denique ubi pugnam Pharsalicam orator attingit, usque adeo animo perculsus est, ut toto corpore contremuerit, atque ei de manibus libelli aliquot, quos tenebat, exciderint. Itaque precibus expugnatus, Ligarium crimine absolvit. Audistis, Auditores, Cæsarem illum virum fortissimum atque invictum, qui tot victorias reportaverat, quot bella gesserat, tot gentes populosque domuerat, quot prælia commiserat, a Cicerone eloquentiæ vi expugnatum, oratori dare manus, reo parcere atque inimicum in gratiam amicitiamque re-

L I

cipe-

cipere? Quæ victoria tam nova & incredibilis, quæ cum hac comparari, unquam possit? Quæ tanta virtus ac potestas, quæ victorem gentium & imperii Romani moderatorem cogeret ad hominem sibi infensissimum complectendum, cui hostem se perpetuum fore obfirmata voluntate declaraverat? O quam vere ipse M. Tullius eloquentiam animorum dominatricem centies & millicies nominavit. Quam recte Euripides agebat, quæcunque ferrum moliri atque efficere potest vis hostium, ea omnia confici oratione viri eloquentis. Profecto me dies deficeret, si clarissimas & innumerabiles commemorare velim victorias, quas eloquentia in omni temporum memoria tetulit, principum regumque animis expugnatis. Sed hic non eloquentiæ laudes celebrandi locus est, cum in præsens omnium disciplinarum causam agendam susceperim.

Quæ

Quæ quidem singulæ tantam in se vim continent, ut animos hominum natura cælestes & divinos sibi subicere queant. Quid enim de medendi facultate, quid de jurisprudentia dicam? Utinam illæ in nobis haberent minus auctoritatis & imperii: profecto nos earum cultoribus fortunas, opes, vitam denique ipsam haud tam facile crederemus. Medicos quidem, eloquentes præsertim, vitæ necisque nostræ imperatores statim fieri, C. Plinius senior iniquo animo ferebat. Enimvero honorem illis nos liberaliter deferre, sacræ literæ jubent. Jurisperitos autem, in hac potissimum civitate, tanti facimus, ut eorum judicio consilioque cuncta fere, dirigi, gubernarique videantur. Hinc est, quod tam sæpe homines, non splendore generis, non opibus, non aliqua ratione præclaros, sed obscuro & aliquando etiam infimo loco natos, vi-

demus apud principes viros & clarissimos reges amicitia, gratia & auctoritate valere, quorum ipsi doctrina consilioque omnino nituntur. Equidem memoriz proditum est, Alexandrum Severum nihil unquam, nisi ex doctorum hominum scientia, gerere consuevisse. Nec nobis hic vetustiora confectari opus est: quot modo sunt in Urbe ante oculos omnium nobilissimi Præsules, & amplissimi Cardinales, qui hominum doctrina præstantium sententiam in gravissimis negociis exquirunt, eorum consilia sequuntur, omnia demum ex unius sapientis viri judicio deliberant? Et erit quisquam, qui dubitet, magnam inesse doctrinæ vim magnamque auctoritatem, cum videat viros genere ac dignitate primarios, tum etiam ætate graves, qui omnibus imperare, nemini parere consueverint, homini tamen literato sese ultro subicere, suoque

que illius præferre iudicium, qui cum iisdem sit neque ætate, neque ceteris vitæ ornamentis ullo modo comparandus?

Valeant ergo valeant, qui hoc tempore de literarum studiis demisse cogitant & perperam obloquuntur: Non jacent profecto literæ, non otiantur: neque despectui sunt ulli, ut isti dicunt, literarum cultores. Habet, habuitque semper suam vim, suum robur scientia & doctrinæ præstantia: atque id non solum in vulgo & in multitudine imperitorum, sed etiam in regum & clarissimorum principum animis, qui a nemine vinci, nemini cedere, nisi sapientibus viris, præclarum sibi esse ducunt. Quamobrem, Auditores, si quis erit in posterum, qui, vobis audientibus, literarum dignitatem contemnere audeat, aut doctrinæ studia nullius utilitatis, nullius gloriæ, nul-

nullius denique momenti esse judicet,  
hunc vos vel amentem, vel dignitatis  
sue parum cupidum esse putatote.

## DE LAUDIBUS LEONIS X.

IN ANNIVERSARIIS EJUS

PARENTALIBUS

## ORATIO XI.

*Habita VII. Kal. Martias MDCCXLV.*

**T**RISTIS semper & acer-  
ba mihi accidit illius diei  
memoria, in quo Leo X.  
Pont. Max. incredibili  
bonorum omnium mœ-  
rore summaque totius Urbis complo-  
ratione & lacrimis interiit. O diem  
reipublicæ ac religioni funestissimum.  
O luctuosam tristissimamque Pop. Rom.  
calamitatem. Jam quinque supra vi-  
ginti



ginti & ducentos enumerantur anni,  
 ex quo ille publicæ felicitati præceptus  
 est, &, tanquam recenti refricato vul-  
 nere, adhuc miseris modis dolemus.  
 Solenni quotannis officio in hoc reli-  
 gionis & literarum domicilio Leoni  
 ipsi iusta persolvimus, clarissimam il-  
 lius memoriam singulari laudatione,  
 prosequentes: sed tantum abest, ut  
 pietatis huiusmodi significatione satis  
 nobis fecisse existimemus, aut in nobis  
 extincti desiderium minuat, ut illud  
 contra magis ac magis in dies augeri  
 sentiamus. Etenim tanta fuit Leonis X.  
 virtus, tam incredibilis sapientia, tan-  
 ta in omnes, præsertim vero in viros  
 doctos, liberalitas ac beneficentia, ut  
 quotquot iisdem temporibus extite-  
 runt scriptores, illum summis laudi-  
 bus ad cælum extulerint: illum mu-  
 nificentissimum principem, illum Pon-  
 tificem optimum ac sempiterna recor-  
 datio-

datione dignum, unanimi consensione prædicaverint. In tanta igitur celebritate laudum tantoque virtutum plausu, quo me vertam, aut quid consilii capiam, prorsus ignoro. Neque enim possunt, tam brevi ad dicendum tempore constituto, amplissimæ Leonis virtutes vel numerando recenseri: neque mihi mens est ire per singula præclarissima ejus facta, & vos diutissime, in audiendo defatigare. Itaque digitum ad fontem, ut ajunt, intendam; atque operam dabo, ut paucis intelligatis, Leonem X. hoc tantum sui desiderium reliquisse, hanc tantam gloriæ diuturnitatem esse consecutum ex liberalitate in literarum cultores, ex summo denique optimarum artium patrocinio. Hinc profecto ille sibi nominis immortalitatem comparavit; atque, hinc quoque hodierno die erit mihi præcipuum ac proprium de ejus laudibus

bus argumentum , ceteris quidem ab eo præclare gestis silentio prætermiſſis, quæ fere ſingulis annis ex hoc ampliſſimo loco celebrari conſueverunt .

Digna ſane viro principe laus eſt liberalitas , quam primam & peculiarem imperantium dotem Alexander Severus nuncupare ſolebat : qua ſi qui careant , vix illi principis nomine digni eſſe videntur . Nimirum qui rerum potiuntur , hac una virtute populorum benevolentiam ſibi maxime conciliant , imperiumque ſibi beneficiis longe melius , quam armis tuentur . Quod cum ſatis optimi principes intelligerent , illud dies nocteſque cogitabant , quo pacto poſſent de omnibus benemereri ; ac diem illum , in quo non aliquem beneficio ornatum ſibiſque devinctum dimiſſent , ſibimet omnino periſſe putabant : quemadmodum præ ceteris de Tito Cæſare , de Trajano imperato-

M m re

re aliisque plurimis historiæ loquuntur. At vero quanquam principes ipsi liberalitatis laude tantopere commendantur, sit tamen sæpe, ut ea ipsa sic abutantur, ut propter illam, non tam in laudem, quam in sermonem & vituperationem hominum veniant: quod nimirum, qua in re liberalitas ejusmodi sita sit, minime intelligant. Alii enim in venationibus, in ludis sumptuosius & spectaculis magnificentissimis pecuniæ magnam vim profundunt: alii in tabulis pictis, signis & marmoribus, alii denique in magnificentia ædificiorum, in fontibus ac pyramidibus ad cælum usque extollendis, immensas publici ærarii opes insumunt atque disperdunt. Verum errant, profecto errant, si non in publicis commodis, sed in vanis hujusmodi substructionibus veræ liberalitatis laudem contineri sibi persuadeant. Falluntur, inquit  
Taci-

Tacitus, quibus luxuria specie liberalitatis imponit: perdere multi sciunt, donare nesciunt. Hinc est, quod Plinius, ut veram & germanam Trajani ab inani & fucata præteritorum Cæsarium, liberalitatem distingueret, ambitio, inquit, & jactantia & effusio & quidvis potius, quam liberalitas existimanda est; cui ratio non constat, Et Isocrates regem suum Nicoclem, admonebat, ut splendidissimus quidem esset, sed in his rerum sumptibus liberalitatem ostenderet, quæ fructum nunquam interiturum ex se parerent.

Quæ cum ita sint, plane dubitari non potest, quin Leo X. veræ liberalitatis laudem probe noverit, eamque fuerit perfecte assecutus. Ex regia enim Medicea familia natus, & in paterna domo, munificentiae & splendoris veluti officina liberaliter educatus, cum ipso pene nutricis lacte germanæ vir-

tutis & laudis sensus altius imbiberat. Noverat quidem adolescens mira ingenii dexteritate præditus, Græcis præterea ac latinis literis sapienter instructus, quantum discriminis inter veram & fucatam liberalitatem intercederet. Noverat, majores suos, immortalis memoriæ viros, Cœsum proavum, Petrum avum & Laurentium patrem, summo reipublicæ bono in optimarum artium commoda immensas fere opes summa cum laude prodegisse. Proinde ipse quoque in omni vitæ genere & Cardinalis & Pontifex hanc eandem Medicæ domus gloriam, literarum patrocínio comparatam, quasi propriam sibi asseruit, & quam maxime potuit, amplificavit. Nam ut silentio præteream, quam liberali gratoque animo egregius adolescens se gereret erga Angelum Politianum, Demetrium Chalcondylam, Scipionem Cartero-  
ma-

macum aliosque viros literarum dignitate clarissimos, quos ad humanitatis studia, ad eloquentiam, ad philosophiam & ad omnem eruditionem tum Græcam, tum Latinam magistros habuit; ut nihil loquar de officiis ac liberalitate, qua usus est plurima erga viros doctrina præstantes, cum ab Innocentio VIII. Cardinalis in ipso ætatis flore renunciatus, in Academia Pisana versaretur, ut juri addiscendo operam daret; postremo ut missum faciam omne illud fortunatissimum tempus, quo paterna ejus domus opulentia, fortunis, gratia, auctoritate opibusque maxime floruit; cui mirum non videatur, quod adversante deinde fortuna, & communi Italiæ fato Mediceæ quoque domus ruinam & vastitatem involvente, ille nihilominus idem erga literatos homines studium, eundem animum eandemque voluntatem per-

perpetuo conservaret? Nemo vestrum ignorat tristissima ea tempora, quæ bellorum tumultibus agitata, seditio-  
num turbarumque tempestate quadam Italiam fere universam misere jacta-  
runt. Ea tunc fuit Mediceæ gentis ca-  
lamitas, ut civium improborum invi-  
diæ, furori ac telis cedere, patrios-  
que splendidissimos lares fuga desere-  
re cogeretur. Cuique ex hac flamma  
periculoque Cardinalis Medices evo-  
lasset, decem & octo annos per Ita-  
liam, Galliam atque Germaniam per-  
vagari compulsus est. In hoc autem  
tam misero, tam difficili diuturno-  
que exilio quis crederet, Joannem Me-  
dicem, facultates, quas sibi reliquas  
fortuna fecerat, literatis hominibus li-  
beraliter nunquam destitisse impertiri?  
Et sane etiam tum fuerunt Romæ,  
fuerunt Mediolani, fuerunt Genuæ at-  
que Florentiæ viri literarum cultores,  
quos



quos suis ille sumptibus alebat, & quibus poterat, opibus sustentabat. Vix cuiquam credibile videretur, aut oratorum more a me verbis auctum, & exaggeratum id, quod dicam, nisi Paulus Jovius Nucerinus Antistes rem literis testatam faceret. Talis erat, inquit, Cardinalis Medices etiamdum exularet, erga viros doctos liberalitas, ut non defuerint aliqui, qui juvenem serio admonerent, ut sibi ab ejusmodi largitate temperaret: venturum enim tempus, quo ipse propter rei familiaris inopiam, neque alios, neque se sustentare posset. Sed ille, egone, ait, viros doctos deseram? Ego ab illis unquam divelli patiar? Malo equidem cum ipsis exul atque egens extremum vitæ spiritum ducere, quam sine illis in patriam reverti atque regnare. O præclaram vocem magnanimo viro dignam. O incredibilem erga literarum

rum studia animi propensionem. Jam vero minime decebat, ut tanta ac tam singularis virtus, quam immortalis Dei providentia amplificando communi literarum bono destinaverat, diutius delitesceret. Itaque, extincto Julio II. Pontifice, ipse Cardinalis Medices ad summum Pontificatus apicem Leonis X. nomine, ingenti Pop. Rom. plausu & bonorum omnium gratulatione evectus est. Quis autem hic brevi orationis ambitu complecti possit, quæ & quanta ille in Pontificatu liberalissime fecerit ad dignitatem literarum provehendam? Si homo privatus, patria pulsus, exulans atque egens tam liberalem se præbuit eruditibus hominibus, quam modo audivistis, quid eum putatis, cum Romanus Pontifex, Ecclesiæ caput & princeps fuerit renunciatus, esse facturum? Non ignoro equidem quandoque fieri, ut homi-

hominum mores , maxima dignitate,  
 accedente , immutentur , longeque alii  
 ac prius , esse videantur . At constans  
 eademque semper fuit Leonis X. erga  
 literatos voluntas , crevitque in eo sum-  
 ma cum dignitate liberalitas . Quare  
 vix Lateranensi Concilio , quod Ju-  
 lius II. inchoaverat , feliciter absolu-  
 to , vix sedatis iis , quas Carvajal &  
 Sanseverinus Cardinales in Pisano con-  
 venticulo excitaverant , turbis ; vix  
 denique Italiae rebus pace & tranquil-  
 litate compositis , cum continuo litera-  
 rum studiis ad Urbem , unde per varias  
 temporum acerbitates diu exulaverant ,  
 revocandis omnem animum adjecit .  
 Verum optimis disciplinis in Urbe re-  
 stituendis tempus nimis inopportunum  
 & alienum nactus es , Leo Pontifex  
 Maxime . Nonne Pontificii ærarii opes  
 diuturnitate bellorum prorsus attritæ ?  
 Nonne Ecclesiasticæ ditionis provinciæ ,

N n aut

aut igne ferroque vastata, aut multo  
ære alieno obstricta? Nonne demum,  
Roma ipsa, imperii sedes, gravissimis  
oppressa vectigalibus? Hæc profecto ne-  
mo non videt, qui Pontificatum Julii  
armis perturbatum ac plus nimio bel-  
licosum omnino non ignorat. Sed hæc  
principes alios percellant impedian-  
que, quo minus erga literas & literatos  
se munificos ac liberales ostendant;  
non autem Leonem X., qui nominis  
sui magnitudini parem habet animum  
ac beneficentiam. Itaque jam ex Ita-  
lia universa, ex Græcia, Germania,  
Gallia, aliisque remotissimis provin-  
ciis ad Urbem properant, Leone ipso  
magnis propositis præmiis invitante,  
viri doctrina, literis & eruditione cla-  
rissimi; atque omnes in Leone, non  
tam Mecœnatem aliquem beneficum,  
quam amantissimum literarum paren-  
tem inveniunt. Etenim quotquot La-  
tinis

tinis Græcisque literis eminebant, quotquot dicendi elegantia, aut poetica facultate clari, quotquot Philosophia, sacrarum literarum, aut juris scientia præstabant, cuncti quidem uberrimos doctrinæ fructus a liberalissimo Pontifice reportarunt. O liberalitatem singularem. O fortunata ac vere aurea tempora. Laudaverunt veteres annalium scriptores Augustum Cæsarem, quod Publ. Virgilium, Lucium Varum & Horatium Flaccum amplissimis præmiis cohonestaverit, tum etiam quod ingenti liberalitate cum M. Vitruvio Pollione usus sit. Laudaverunt alii Vespasianum Cæsarem, hominem alioquin pecuniæ cupidum, quod præstantes aliquot poetas coemisset, & Basso Salejo egregio vati quingenta festeria donasset. Laudaverunt alii postremo Hadrianum Cæsarem, quod eos divitiis honoribusque decoraverit, ac

N n 2

va-

vacare vitæ reliquum jufferit, qui Romæ docuissent, & propter ingravescentem ætatem muneri suo satisfacere amplius non possent. Hæc autem quota pars est eorum, quos Leo X. summa liberalitate excepit, fortunis auxit opibusque cumulavit? Dies, aut memoriæ vis me deficeret, si dicendo numerare velim oratores, historicos, philosophos, jurisperitos, geometras, aliarumque disciplinarum cultores, ejus beneficentiæ testes locupletissimos? Non commemorabo, id quod apud omnes pervulgatum est, viros amplissimos Bembum & Sadolerum sibi ab epistolis esse voluisse. Silentio prætereo duo clarissima Græciæ lumina, Lascharem Rhidocenum & Marcum Masurum Cretensem, quos summo honore coluit, & utrumque sacerdotiis & infulis decoravit. Mitto Joannem Antonium Pollionem, Mutium Aurelium,

Ca-

Camillum Paleottrum, Julianum Camertem, Latinum Juvenalem, Jo: Franciscum Roboreum, Guidonem, Polthumum aliosque sexcentos, quos paterna benignitate complexos & opibus & præfecturis & magistratibus amplificavit. Sed tacere omnino non possum præclara illa duo Dominicani Ordinis ornamenta, Thomam de Vio & Sac̃ten Pagninum civem meum: quorum alterum Theologicis studiis & doctrina celeberrimum ad Romanæ purpuræ dignitatem evexit, & ad refrænandam Lutheri audaciam in Germaniam legatum Apostolicum misit: alterum vero Græcis Hebraicisque literis nemini secundum Florentia Romanam attraxit, ut eruditissimum in Urbe absolveret de sacris literis commentarium, præclarum sibi fore existimans, si illud nomini suo inscriberetur. Quid plura? Audite Pauli Jovii gravissimi.

visſimum teſtimonium. Nulla in re, inquit, ardentius & effuſius, quam ad liberalitatis gloriam anhelavit; eos principes indignos exiſtimans, qui nequaquam benefica manu fortunæ muneribus uterentur. Nemo enim vel civis, vel peregrinus, qui paulo nobilioris artis famam teneret, nemo vel male ſanus poeta, nemo alicujus optimarum literarum partis non ignarus unquam fuit, qui benignitatem humaniſſimi principis non ſenſerit. O ſi tales Principes, quæ Leonem conſecuta ſunt, tempora nobis attuliſſent, proſecto Urbem minus pulchram, at longe doctiorem haberemus. Neque enim hic magnificentiſſima tecta ac moles, neque tot pyramides & obeliſcos, neque tot fontes fluminum inſtar defluentes peregrini atque advenæ tantopere ſuſpicerent, ſed infinitam doctorum hominum multitudinem beneficentia principis



cipis sustentatam, quæ doctrinarum studio, vel sacras literas illustraret, vel scriptis hæreticorum tela retunderet. At vero, quæ fuerit vel in hoc sapientia Leonis, attendite. Cum inteligeret homo sapiens ac providus, hanc tantam suam liberalitatem nihil literis profuturam, nisi beneficentiam ejusmodi ad venturas quoque ætates protulisset, Romanum hoc amplissimum Gymnasium in media Urbe a fundamentis excitavit, stabile ac perpetuo mansurum bonis artibus domicilium. Noverat enim vir sapientissimus, benefacta principum, præclara quanvis & illustria, parum emolumentum ac laudis habere, si brevi eorum vitæ curriculo circumscribantur, neque ad posteritatem sese ullo modo extendant. Cælestibus flammis ea quidem simillima esse videntur, quæ aliquando fulgore insolito radiantes in æthere apparent,

rent, & ad se omnium oculos & admirationem trahunt, sed fere statim ex alto ruunt atque evanescunt. Amavit quoque literas & literatos Eugenius IV., de quo Platina scribens, liberalis fuit, inquit, in omnes: tum maxime in literatos, quorum familiaritate delectabatur. Nam Leonardum Aretinum, Carolum Poggium, Aurispam, Trapezuntium, Blondum, viros doctissimos, inter suos admisit. Amavit literas & literatos Nicolaus V., homo sapientia & doctrina cum paucis comparandus: qui viros Theologia & quovis alio optimarum artium genere conspicuos summa liberalitate ad se recepit; & conquisitis ex tota Græcia voluminibus, iisque in Latinam linguam converfis, adeo ingenia fovit excitavitque, ut ejus temporis historici de illo affirmare non dubitaverint, disciplinarum omnium studia Romæ nunquam

quam magis, quam eo imperante, effloruisse. Amavit denique literas & literatos Pius II. vir ingenio, literis & eloquentia clarissimus, qui in summo quoque Ecclesiæ fastigio collocatus, nunquam doctrinæ studia intermisit, tum etiam viros doctos pecunia juvit, maximisque honoribus decoravit. Verum quid postea? Nemo est eorum temporum sic ignarus, ut nesciat, Romanis hisce Pontificibus vita functis, omne pariter cum ipsis literarum decus & patrocinium interiisse. Nimirum uno eodemque tempore, in quo Pontifices illi sapientissimi extincti sunt, occidit quoque omnis doctrinæ lux, omnis literatorum hominum spes atque felicitas. Enimvero Leo X. singularem suam erga literas & literatos beneficentiam, non caducam, neque brevi unius ætatis spatio definitam esse, voluit, sed sempiternam & immortalem.

O o lem.

lem. Voluit scilicet in hoc Romano Gymnasio veterem eloquentiam perpetuo regnare: proinde Janum Parrhasium Cosentinum id temporis dicendi facultate clarissimum, ducentorum aureorum stipendio proposito, ad hanc provinciam accersivit, datis ad eum literis humanissimis: quem deinde Amasæi, Beroaldi, Mureti, Manutii, Cortesii, Antoniani, Ugones, Fontanini aliique primi ordinis oratores consecuti sunt, qui pro Romana eloquentia ac bonis literis contra barbaros earum corruptores, tanquam pro aris & focis, strenue decertarunt. Hic duas jam ætates Philosophia parens ac magistra virtutum, tranquillam habuit stationem. Hic mathematicæ disciplinæ, hic medendi facultas, hic civilis & Pontificii juris scientia, hic denique sacrarum literarum doctrina, perpetuos habuere, & nunc habent, magistros

stros sapientia & eruditione præstantes, quos omnes percensere, aut de singulorum laudibus dicere, nimis longum foret, ac permolestum. Quid vero loquar de iis, quæ ad hujus academix dignitatem firmandam perpetuoque stabiliendam, Leo X. providentissime constituit? Quid hic referam præclarum & satis amplum stipendium optimarum artium professoribus de publico ærario liberaliter decretum? Quid demum binas illas Apostolicas sanctiones commemorabo, quibus duplici veluti propugnaculo hanc bonarum artium arcem ita firmavit & communivit, ut nulla unquam futurorum temporum calamitas, nulla eam posset improborum hominum vis & audacia labefactare?

Quænam igitur tam providæ ac tam singulari beneficentissimi Pontificis liberalitati par oratio inveniri unquam poterit? Non modo ille, quandiu vi-

xit, honestissimas disciplinas ac viros doctos munificentia prope regia profecutus est, sed ad posteros quoque & ad omnem ætatem propagari voluit beneficentiæ suæ fructus uberri-  
mos. De vobis ille, Quirites, de liberis vestris, serisque nepotibus anxius fuit atque sollicitus, cum in Urbe de Pontificio ærario optimarum artium sedem perpetuumque domicilium stabilivit. Quo majore ille tandem poterat beneficio de hac civitate, de Pop. Rom. de universa literarum republica benemereri, quam hoc celeberrimum toto orbe Gymnasium constituendo, in quo tum Romani cives, tum peregrini atque hospites haberent semper ad omne disciplinarum genus peritissimos duces doctissimosque magistros? Quæ cum ita sint, jam finem dicendi faciam: at prius quantum potero, voce contentam, ut cuncti hoc exaudiant: Leo X.

ex

ex optimarum artium patrocínio jure  
& merito immortalis tot sæculorum  
fama vivit ; & tandiu profecto vivet  
celebritate gloriæ , laudatione grata-  
que posterorum memoria immortalis ,  
quandiu bonis artibus & decus & no-  
men & laudes manebunt .



DE

## DE FELICITATE

VIRI LITERATI

## ORATIO XII.

*Habita Idibus Novembr. MDCCXLVII.*

ET US est & apud omnes  
 fere homines pervagata  
 opinio, sorte sua conten-  
 tum esse neminem. Ete-  
 nim alter alterum bea-  
 tum putat seque præ illo miserum,  
 suasque res deterioris esse fortunæ con-  
 queritur. Quamobrem miles fortuna-  
 tos in primis mercatores, mercator ve-  
 ro milites beatos prædicat: agricola o-  
 tium & commoda civitatis habet ante  
 oculos, civis agricolarum vitam placi-  
 dam & procul a negotiis positam re-  
 putat beatissimam. Proinde fit, ut  
 suæ



suæ quemque fortunæ poeniteat : nemo  
 sibi in suscepto vitæ instituto placeat ,  
 sed alienam suæ præferat sortem , sua-  
 que feliciorem inuideat : quemadmo-  
 dum rem hanc Venusinus poeta in ser-  
 mone primo ad Mecoenatem elegantis-  
 sime prosequitur . At vero quanquam  
 in terris , si verum fateri volumus ,  
 nulla sit rerum conditio , nulla homi-  
 num fortuna tam splendida atque o-  
 pulenta , quæ absolutam possit ple-  
 namque hominis felicitatem efficere ,  
 quam nimirum nobis in altera & im-  
 mortali vita Deus Opt. Max. in cælo  
 servatam voluit , ut proinde nemo unus  
 in terris felix , nemo sit vere ex omni  
 parte beatus ; nihilominus dum mihi  
 sapientis viri status ante oculos obver-  
 satur , dum omnem ejus vitæ rationem  
 tacita cogitatione contemplor , mutata  
 profecto opinione , hominem certe qui-  
 dem beatum apud nos reperiri posse  
 mini-

minime dubito. Ita plane auditores : ego equidem in hac sententia sum, hominem doctrinæ studiis deditum, hominem doctum, unoque verbo, hominem sapientem esse plane beatum, suaque sorte jure & merito haberi ac dici posse contentum. Hæretisne animo & rem quasi omnino incredibilem vobis propositam esse putatis? Nequaquam. Sed si id mirum propter rei novitatem, aut minus probabile propter auctoritatem eorum, qui repugnant, vobis esse videatur, oro vos atque obtestor, ut ne me levitatis, aut erroris, indicta causa, damnare velitis, sed rationes & argumenta, quæ me in hanc sententiam pertraxerunt, benigne attenteque audiatis. Quod quidem si nunquam alias, hodierno die minime dubito, vos esse facturos : neque enim levis, neque vulgaris, at multo gravissima res agitur : illa scilicet vitæ felicitas, quæ nobis in  
hac

hac ipsa, quam vivimus, vita contingere potest, & quam omnes tanquam maximum & extremum bonorum summo-  
pere expetunt & unice quærunt.

Neminem vestrum dubitare arbitror, quin vera mortalium felicitas in animi quiete ac tranquillitate potissimum sita sit. Sed qua tandem ratione eam quis assequi perpetuoque frui possit, non est communis atque una omnium sententia. Putant plurimi, immensis opibus congestis, sese beatissimos omnium fore, quod nimirum cuncta, ut ajunt, pecuniæ obediunt, quod opes hominem nihilo indigentem sufficientemque sibi faciant. Sed minime advertunt, quot molestias gravissimasque curas afferant opes illæ, quæ adimi, quæ amitti possunt, quæ denique in arbitrio ac potestate fortunæ positæ sunt. Taceo, quod nunquam satiatur, sed crescit in dies, cupiditatis sitis: atque animus hæc

P p inhi-

inhians nunquam id tantum habet, quo expleri queat, cum avaritiæ nihil unquam sit satis. Hinc Horatius Flaccus sapienter pronunciavit: non possidentem multa vocaveris recte beatum. Alii vero pollicentur sibi felicitatem, si ad primariam aliquam dignitatem, si ad supremum magistratum iter sibi munierint. At, pro Deus immortalis, quæ res tam lubrica & incerta, quam quæ vel a multitudinis favore, vel a præpotentis hominis voluntate & gratia pendet? Quam sæpe magnas spes & bene confirmatas una nox, aut aliqua parva rumoris aura subvertit? Non est in hac Urbe res nova oculis nostris, aut insolens. Quid vero homines illi, qui deliciis affluunt, qui gemmis auroque ornati, qui unguentis delibuti incedunt, ac somno luxuque perdit in otio ac quiete vitam ducunt, nonne tibi lauti ac beati esse videntur? Errat

rat vehementer, errat, qui ejusmodi homines (si homines magis quam pecudes dicendi sint) tranquillam ac beatam vitam agere, sibi persuadeat. Anguntur illi sæpe animo ipsisque displicet, otio inertiaque marcescere; & cum nihil splendidum, nihil se suisque majoribus dignum agere possint, vitam doloris ac molestiæ plenam traducunt. Cum igitur nec divitiarum copia, nec honorum splendor, nec vitæ mollioris otium, quæ bona plerique homines prima & omnium longe præstantissima putant, sinceram in animo tranquillitatem pariant, neque ex iis optata vitæ felicitas expeti possit; quid aliud restat; nisi ut in sapientiæ studio, aut nusquam alibi, beatæ vitæ rationem consistere posse judicemus? Hinc M. Cicero, quid est, inquit, per Deos optabilius sapientia? Quid præstantius? Quid homini melius? Quid homine dignius?

Verum ut ad id, quod propositum est, propius accedamus, cogitate mecum, Auditores, quid tandem sit pax illa & animi quies, quam sapientis propriam esse dicimus, nisi hominem ab omni sollicitudine animique perturbatione vacuum esse & immunem? Hoc autem consequi profecto, præterquam sapiens, nemo potest. Cum enim animus noster in duas veluti partes, ut philosophi volunt, divisus sit; alteram rationis participem, alteram vero expertem & nobis cum brutis animantibus communem; persæpe fit, ut in hac motus turbulentissimi, tum ad iracundiam, tum ad cupiditatem impellentes exoriantur, ex quibus permultæ aliæ ægritudines ac perturbationes, tanquam familiæ, in nos derivantur: in quas nisi ratio, quasi dux & moderatrix, imperium teneat, in maximas calamitates gravissimasque ærumnas hominem dela-

delabi necesse est. Hinc enim odia, hinc livor, hinc ambitio, hinc sexcentæ aliæ teterrimæ pestes, quæ rationis jugum excutere, eamque de sede sua deturbare conantur. Unde autem homini in tanto rerum discrimine summoque periculo arripienda sunt tela ad infestissimos ejusmodi hostes confodiendos longeque propulsandos, nisi auxiliares sapientia manus viresque conferat? Ita est profecto. Bonarum artium studia, philosophorum monita, historicorum exempla, musarum cantus, sunt quædam quasi propugnacula, quibus hostium impetum & aggressiones homo sapiens repellit. Proinde nullum tam triste infortunium, nulla tam acerba calamitas occurrit, ut vere possit ejus animi tranquillitatem perturbare. Cogitat enim quid forti & sapiente homine dignum sit: quid gravitas, quid animi magnitudo, quid vita hactenus

ctenus præclare acta, quid literarum studia, quid denique publica dignitas abs se postulet atque in eo statu rerum efflagitet. Possem hoc loco tum ex veteri, tum ex recentiore historia infinita fere eorum exempla in medium proferre, qui e literarum sinu tantum quietis ac tranquillitatis hauserunt, ut asperrima quæque æquissimo animo toleraverint. Non de Anaxagora, non de Dione, aut Xenophonte loquar, quos in acerbissimo filiorum funere nihil ingemuisse, nihil animo commotos fuisse, memoriæ proditum est. Satis sit ad memoriam vobis revocare Dionysium illum Syracusanum tyrannum, qui propter improbitatem e fastigio regiae dignitatis dejectus & in exilium pulsus, ad eam miseram conditionem reductus est, ut Corinthi pueros grammaticam doceret. Hic aliquando interrogatus, quid Plato, quid Philo-  
fo-



sophia tandem sibi profuisset, libere respondit: id sibi profuisse, ut jacturam regni & atrocitatem fortunæ placide, tranquilleque perferret. O magnam doctrinæ vim, quæ facit, ut tyranni quoque, quorum animus conscientiæ stimulis, tanquam ardentibus furiarum tædis agitari perpetuo solet, dulcedinem suam degustent curarumque levamen inveniant. Sed fortasse Dionysius poenam illam æquo animo tolerabat, quam justam ac sceleri suo debitam esse intelligebat. Quid si homo innocens, imo spectatissimæ virtutis exemplum, bonis omnibus, honoribus, patria, carissimis filiis, vita denique spoliari se, summa animi tranquillitate summaque constantia spectet? Severinum Boethium dico, clarissimum illud Romanæ virtutis lumen, qui consulari dignitate, amplissimis opibus ac patria amissis, nihil est animo com-

commotus; sed eadem mentis atque oris serenitate & diuturni carceris squalorem toleravit, & carnificis vultum telumque excepit. Erat ille Romæ ex illustri Torquatorum familia natus, Græcis ac Latinis literis ab adolescentia eruditus: erat Geometriæ studiis instructus, in Arithmetica, in Musica apprimè versatus. Quicquid ex Logicæ artis subtilitate, quicquid ex naturali scientia, aut morali disciplina fuerat ab Aristotele subtiliter obscureque literis traditum, summo ille ingenio, commentariis doctisque expositionibus illustraverat: cumque Ticinum conspiratione malorum a Theodorico Gothorum Rege relegatus fuisset, pulcherri- mum illud de consolatione volumen conscripsit, in quo M. Tullium sibi proposuit, qui, ut extinctæ filiaë desiderium leniret, de animorum immortalitate disceptans, Tulliam vitæ super-  
stitem

# ORATIO XII. 305

stitem comprobavit; ita Boethius de falso ac vero bono, tum etiam de providentia disputans, nihil sine divino numine mortalibus evenire declarat. At Ciceronem ipsum in eo superasse videtur, quod cum ille carmen non attigerit, Boethius, quo utile dulci misceret, rem tum oratione, tum carmine ita est prosecutus, ut ad utrumque sibi ingenium non defuisse demonstraverit. Ecce vobis in hoc clarissimo viro non adumbratam, sed expressam veram sapientis imaginem. Vidistis animi tranquillitatem incredibilem maximis curarum fluctibus minime perturbatam. Vidistis constantiam nullis adversis casibus perculsam, aut oppressam. Vidistis denique, quid possint doctrinae studia ad assequendam mortalis vitae felicitatem! Quemadmodum enim qui Olympi verticem attigerunt, procellas quidem & tempestates infra se positas vident, dum ipsi

Q q

inter-

interea nullis ventorum turbinibus, nullis imbribus obnoxii sunt, imo semper eadem cæli facie eademque serenitate gaudent; ita sapiens turbulentissima quæque despiciens, semper quietus ac tranquillus, placidissima vitæ ratione perfruitur. Omnis quippe animi ægritudo levare potest suavissima meditatione literarum. Atque hinc est, quod Aristippus homines doctrinæ deditos non immerito Deorum simulacra nuncupaverit: quod nimirum, sicut illi sempiterna pace ac immutabili vitæ tranquillitate lætantur, ita sapientis animus in beatissimo literarum otio perpetuum conquiescit.

At dicet quispiam, si tanta literati hominis pax est, & tam firma animi tranquillitas, quid est, quod sæpe inter illos odia & contentiones acerrimæ de levissima etiam re, deque uno verbo excitentur, & maledicentissimis

mis

mis sese libellis invicem proscindant ? Quis ignorat rixas & tragædias inter Laurentium Vallam & Poggium, inter Politianum & Merulam, inter Accursium & Budæum, inter Marinum & Murtulam aliosque permultos magni nominis literatos ? Ut nihil loquar de acerbissimis inimicitiiis, quas in Italia memoria nostra eruditi quidam inter se palam gesserunt. Imo, si quod res est, fateri volumus, ab ipsis fere literarum incunabulis, æmulatione, & superbix comes invidia, literatorum animos occuparunt. Etenim Homerum Zoilus etiam post ipsius facta, scriptis adversus eum libris, ausus est insectari, unde illi cognomen *Ὀμπερομάσιγος*. Sic quoque Antiochus Lemnius Socrati, Cydon Pythagoræ, Xenophanes Colophonius Hesiodo, Amphion Cous Pindaro, Timocreon Simonidi, Asinius Pollio M. Tul-

lio ob invidiam fuere quam maxime infensi. Ut taceam Rhemnium Polemonem Alexandrinum grammaticum, qui M. Varroni viro doctissimo tantopere invidit, ut illum acerbe reprehendere ausus sit, & non Varro- nem, sed Verrem per summum contemptum appellaverit. Darem profecto, Auditores, adversario manus victas, & causa omnino caderem, nisi vos singulari mentis acumine & sapientia præditos cogitarem, qui veritatem a cavillationibus discernere optime nostis. Continent sane literarum studia in se sublime aliquid ac divinum, per quod non minus doctus ab indocto, quam a brutis homo distinguitur. Habent vero id cum ceteris rebus commune, ut quantum optimus earum usus utilis est, & ad vitæ felicitatem opportunus, tantum earum abusus ac perversa ratio reipublicæ

blicæ noceat. Quid stomacho conducibilis, quam vinum? Quid tamen illius copia & ebrietate perniciosius, cui Lycurgus, quo viam prorsus intercluderet, vites omnes excidi imperavit? Quid humano generi ferro & igne ad omnem vitæ usum magis necessarium? Quibus nihilominus si ad populorum internecionem & Urbium incendia homines abutantur, nihil est, quod magis noxium & exitiabile excogitari possit. Ita quoque nihil est doctrinæ studiis ad humanæ vitæ felicitatem opportunius, nihil ad extirpanda vitia, faceseque cupiditatum restringendas magis aptum, si quidem illis probe utaris. Quod si eisdem ad gloriæ cupiditatem & ambitionem, si ad lites & jurgia homines abutantur, tantum abest, ut eorum animi tranquillitate perfruantur, ut potius inquieti, queruli & angoribus pleni in maximas se calamita-

mitates impingant . Beata vita , inquit Seneca , sine virtute esse non potest : proinde miseri & infelices ejusmodi homines ad nos non pertinent . De homine quidem sapiente disputo , ut jam antea dixi , non de literatoribus , qui ætatem in litibus flocci æstimandis , in gerris & nugis , conterunt . Pernego vero illum esse , aut dici posse sapientem , qui sibi non sapit . Neque is sapere plane videtur , qui non intelligit , nihil esse homini invidia perniciosius magisque cavendum : nihil magis virum literatum dedecere , quam maledicentia , & alienæ laudis obrectatio . Itaque longe abest a viro sapiente , de quo loquimur , æmulatio , longe abest invidia , odium atque contentio , longe abest demum quicquid a leni placidoque animo prorsus abhorret .

At enim quod quispiam , sedatis animi



nimi motibus, curis vacuam & perturbationibus vitam ducat, eritne idcirco beatus? Profecto beatam vitam, ut M. Tullius ait, non depulsiōe mali, sed adoptione boni judicemus oportet. Itane? Quasi vero animum pace ac tranquillitate tanta frui, bonum maximum dicendum non sit, ac ceteris omnibus præferendum. At quis adeo rudis, adeo rerum omnium ignarus existit, ut nesciat, quanta sit semperque fuerit hominum litterarum gloria, quanta dignitas & amplitudo, quæ, ut corpus umbra, illos consequitur? Quis ignorat, ejusmodi bona sapientiæ studiis constituta semper fuisse, quasi fundum avitum & amplissimum patrimonium? Sunt hæc per se clara, neque in iis opus est argumentis, aut tempore abuti. Plenæ sunt historiæ, pleni literarum annales. Verum non opes, non honores,  
non

non dignitates, non gloria, non triumphi comparandi ullo modo sunt cum ea felicitate, quæ solet ex optimis studiis uberrime degustari. Te, Cæsar Auguste, testem appello, qui imperio terrarum potitus, perduellibus profligatis, ferocissimis nationibus domitis, tot clarissimis triumphis actis, totoque Orbe pacato, maximam potentiam adeptus, & in altissimo gloriæ fastigio positus, nihilominus de fortuna sæpe conquestus es, quod ea vitæ tranquillitate careres, qua homo privatus in literarum otio perfruitur. O incredibilem literarum vim, o singularem doctrinæ suavitatem, quæ sapientissimi viri iudicio longe præstat immensis opibus, & victoriis omnibus ac triumphis est omnium maxime anteferenda. Sed hæc Augustum quasi ad emphasin pronunciasse, forte quis suspicetur. Non ita profecto. Nam ceteræ

teræ omnes tum animi, tum corporis voluptates habent sua tempora, certasque periodos, quas ultra progredi minime possunt. Venatio, palæstra, ludus aliæque oblectationes plurimæ, quibus juvenilis ætas tantopere gaudet atque exultat, pariunt senectuti molestiam. At vero firma perpetuaque stabilis est suavissima voluptas, quæ ex doctrinæ studiis degustatur. Imo tantum abest, ut quæ delectatio in discendo sentitur, ingravescente ætate, minuatur, aut satietatem tædiumque afferat, ut experimento potius constet, eam in dies augeri, & majorem sui semper in animo cupiditatem excitare. Etenim ex annalium memoria accepimus, sapientes fere omnes etiam ætate longævos ad extremum usque spiritum doctrinam in amore ac deliciis habuisse. Gorgiam quidem Leontinum Isocratis ma-

R r

gi-

gistrum legimus, ad centesimum & septimum ætatis annum doctrinæ studio nunquam abstinuisse. Isocrates autem, quem eloquentiæ patrem Cicero appellare solitus est, sex & nonaginta annos natus orationem panegyricam scripsit, & ad nonum usque & nonagesimum, in quo e vita decessit, rhetoricam docuit. Carneades quoque, cum esset nonaginta annorum, non prius philosophandi, quam vivendi finem fecit. Quid vero Plato ille divinus, qui octogesimo ætatis anno in scribendo defixus, mortuus est? De quo illud merito dixerim, quod Valerius Maximus de M. Varrone sene pronunciavit: in eodem lectulo & spiritus ejus & egregiorum operum cursus extinctus est. Neque minorem e doctrinæ studio voluptatem perceperunt sanctissimi PP. Gregorius Nazianzenus, Basilius, Hieronymus, Ambro.

Ambrosius, Augustinus aliique inter Græcos & Latinos sexcenti, qui in literis canescere ad summam senectutem, eundemque sibi vitæ ac doctrinæ terminum esse voluerunt. Silentio prætereo, ne in dicendo longior sim, innumeros fere recentioris memoriæ viros, sapientia & eruditione clarissimos, qui nuper in Italia, in Germania, in Gallia aliisque Europæ regnis floruerunt: quos integram & bene longam ætatem in optimis studiis egisse, plurima illa & immortalia, quæ nobis reliquerunt volumina, satis superque testantur. Verum quid longinqua, aut externa conquirimus, cum domesticum nobis ante oculos, clarissimumque hujus rei obversetur exemplum? Nemo vestrum ignorat, quot quantosque studiorum labores Benedictus XIV. Pont. Max. jam inde ab adolescentia suscepit, & quantopere

se in doctrinæ studia ingurgitaverit . Ego quidem , ut verum fatear , hac de re olim minime mirabar pro eo , quo maxime pollet ingenio , tum etiam quod ætate tunc florens , & virium robore firmior esset . Huc accedit , quod in ea studiorum genera incumbere deberet , quæ munerum abs se susceptorum ratio postulare videbatur . At vero quid illi opus fuit , ut ubi primo Anconitanus Episcopus , deinde Archiepiscopus Bononiensis renunciatus est , nihil omnino de iis , quæ ad optimum Ecclesiæ pastorem pertinent , omittens , se tantum sacris studiis daret , quantum plurima ejus volumina de Canonizatione Sanctorum recte instituenda , aliaque multa de Ecclesiasticis ritibus & institutis evulgata typis nos docent ? Quid postea ? Pontifex ipse Maximus factus , cum jam sextum supra sexagesimum ageret annum , Romanam Ecclesiam septem

septem jam annos sapientissime gubernavit : at quanta interim , Deus immortalis , contentione perpetuoque labore studiorum ? Quem diem procul a libris studiisque traduxit immunem ? Quot sanctiones Apostolicas , quot encyclicas epistolas , quot decreta saluberrima pro Ecclesiastica disciplina , aut restituenda , aut facta tecta servanda solus ipse unus commentatus est , ordinavit , perscripsit ? Jam inde tot prodierunt volumina sacræ eruditionis & antiquitatis plena , ut non ab uno homine , summa jam senectute confecto , & infinitis prope Christianæ Reipublicæ negotiis impedito , sed a multis potius , vel ab eo , qui viribus integer sit , & otio plurimo abundet , profecta esse videantur . Cum igitur sapientissimus Pontifex nullum alium sibi de Pontificatu fructum decerpserit , præter ingens istud per-

perpetuumque doctrinæ studium, quis tandem non intelligit, quam magna sit ac pene incredibilis doctrinæ ipsius voluptas, quam neque annorum diuturnitas, neque imbecillitas senectutis, neque ipsa denique mentis lassitudo minuere potest? Ita est profecto. Dicam voce qua maxima potero: doctrinæ studia nullum tædium, nullam afferunt satietatem; imo semper augetur inexplebilis eorum fitis & immensa cupiditas. Contra vero honores amplissimi, & suprema ipsa domnandi ratio, quam propter, si jus violari fas est, maxime violandum esse Julius Cæsar affirmare ausus est, tot curas & angores animo creat, ut in omni fere ætate summi reges clarissimique imperatores, tranquillioris vitæ causa, sese imperio abdicare non dubitaverint. Proinde mirandum non est, quod literati hominis tranquillitatem



tem & otium Augustus adeo euperet, adeo doctis invideret, ut mallet inter eos privatum agere, quam orbi terræ universo imperitare.

Quæ cum ita sint, jam satis intelligitis, sapientis vitam esse omnium longe felicissimam, eamque opibus & triumphis & gloriæ summorum imperatorum jure & merito esse antefereendam. Exulant enim sapientis animo perturbationes ac vitiorum teterrimæ pestes, quæ mortalium felicitatem ac dulcissimam pacem usquequaque perturbant. O fortunatos nimium sapientes. O viros plane beatos, qui procul a cæcis cupiditatibus scelerumque tumultu semoti, in placidissima vitæ statione quiescunt. Quis tantam illis, ac tam stabilem felicitatem non invidet? Quis eosdem forte sua vere contentos esse non arbitretur? Utinam vobis, Adolescentes optimi, hoc ipsum unum beatif-

## 320 ORATIO XII.

beatissimæ vitæ genus experiri tandem aliquando liceat. Utinam vos diligentibus intentoque doctrinæ studio eo demum perveniatis, ut id, quod dicimus, revera ita esse intelligatis; nimirum inter varias & molestissimas hujus mundi curas, inter gravissimas humanæ vitæ sollicitudines, solum sapientem esse beatum.

F I N I S. ○









